

Цубарз

Адабиятрал ва жматийсса политикалул журнал

Мирза ДАВЫДОВ,
дагъусттаннал
халкъуннал шаэр

АБАДЛИССА УТТАРАШИВУ

Поэма

Хас бувссар
Нурмахаммад
Хижимахаммадовлун

Пухъруннал чувшиву кьюкьин дувансса
Арсру къалявхъуссар лакрал аьрщарай,
Жанналияр ххисса балардал хъхъичегу
Бавцгуссар, чаннаннил зунтурду хьуну.

Мув чувшиву дуссар насиллануву
Хъиннура аьнт хъанай мийннал оьттуву,
Цикссагу ливтгуссар язисса арсру
Душманнал хъхъичи никру лахлан
къадурну.

Гитлердул ххиличгьру цгунил чантг куну,
Бивкгулул ярагъру кгунттил бувгьуну,
Аьрасатнал дазуйн язид лавхъукун,
Гъаз хьуна къучагътал, ца ххяли хьуну.

Мийннавух хгписар Нурмахаммадегу –
Чгивисса кюрттарал азгъунсса барзу,
Гъавалул батальон цайнма мютгисса
Бавкъуна душманнал ялун тгюпанну...

ХИЖИМАХИММАДОВ

Нурмахаммад Энгельсович



2/2022

март - апрель



Сергей Аьлимович МЕЛИКОВ

Ттул дакІнин хїнну шунни Аьрасатнал аьралуннал жагьилсса хїаписар НурмахІаммад ХїажимахІаммадов ивкІуссар тІисса хавар. Донбасрайсса спецоперациялуву гьуртту хьуну, ганал бюхттулсса даражалий цалва бурж биттур бувну бур. Ганал кулпатращал кьурчІишиву кІи дачІлай ура. Ццах бакьасса зунтталчув, га ивкІуссар Дагьусттаннал Ккуллал районналиясса. Ганал, виричувшиву дурну, цалла цїа абад дурссар. Ттуца ганал нитти-буттал, гьан-маччамийннал кьюву хьхьара дан кь-ахьунссар. Амма ттун цинявннан кІул хьуну ччива: НурмахІаммад кунма, чумартсса жагьилтуран жува буржлувссару. Дагьусттаннал ва Аьрасатнал халкь зущал ахІал буссар!



Цубарз

Адабиятрал ва жяматийсса политикалул журнал
Литературно-художественный и общественно-политический журнал

Кива зуруй цал буккайссар

Периодичность - раз в 2 месяца

Учредитель:

Агенство информации и печати
Республики Дагестан

Журнал основан в 1952 году

2/2022

март - апрель

Государственное
бюджетное учреждение
Республики Дагестан
“Редакция республиканских литератур-
ных журналов “Соколенок” и
“Литературный Дагестан”

КАЯЛУВЧИ - ХЪУНАМА РЕДАКТОР
Мурад МахIаммадович АхIмадов

ЖЯМАТИЙССА СОВЕТ:

Советрал хъунимий:

К. Давдиев
С. Илиясов
С. Абдуллаев
Аб. АбIиева
З. АбдурахIманова
И. Къаяев
Къ. КъурбанмахIаммадов
А. МахIаммадов
К. Ибрапилова
Р. Муслимов
Х. РахIимов
А. ХIажиев
Ш. Шалласуев

РЕДКОЛЛЕГИЯ:

Хх. Аминова
Э. Абдуллаев
А. Абдуллаева
Р. Башаев
М. Давыдов
Х. Ильясов (*редактор*)
С. Къасумов
А. Кукуева
К. Мазаев
И. МахIаммадов
И. Саидова
С. ХIажиева

Электронный адрес редакции:

litdag@mail.ru

ВИВ БУМУР

ПОЭЗИЯ

М. Давыдов. Абадлссса уттаришву. <i>Поэма</i>	3
К. Мазаев. Бюхттул зунтту багъунни.....	7
ХI. ХIадисов. Абад хъусса ца.....	8
И. ЧчитIял. Виричув НурмахIаммад.....	9
И. МахIаммадов. ХIакъсса виричув.....	10
М. Аълилов. Виричувнал аьпалун.....	12

ПУБЛИЦИСТИКА

А. Аьбдуллаева. На лаккучувра.....	13
Лакку мазрал форум ДГПУ-луву	
Ю. Хаппалаев. Ниттил маз.....	20
К. Мазийхъал. Шаэрнащал навалу.....	45

ПРОЗА

Уссурвалсса литературалува

Р. БахIаммадов. КатIри.....	60
------------------------------------	----

ТАРИХРАЛ ХХУТТАРДИВА

Аь. Магъдиев. Ккуркуллал ччянивасса тарихрава кIулмур.....	74
---	----

АДАБИЯТРАЛ КРИТИКА

К. ХIусайнаева. Ца нуз.....	79
С. Мусаев. ХIавинахъал Саэдлул магъир литературалул прозалиймий асарду.....	82

БУККУЛТРАЛ НАЗМУРДАВА

ХI. Цаххаева. НурмахIаммадлул аьпалун.....	91
П. Къурбанова. Виричувнаха.....	91
ХI. Магъдиева. НурмахIаммадлуха.....	92
А. МихIадова. НурмахIаммадлун.....	96

Регистрационный номер: серия ПИ №ТУ05-00410
выдан Управлением Роскомнадзора по Республике Дагестан от 22.04. 2019 г.

Новолуние №2

март - апрель

На лакском языке

Выход в свет 13.04. 2022 г.

Тираж 421экз. Печать офсетная.

Бумага офсетная. Формат 70х108 1/16

Усл.печ. л. 8,4. Усл. изд. л. 8,7

Заказ №1201 Цена свободная.

Типография: ООО «Издательство «Феникс - пресс»

Адрес типографии: 367018, РД, г. Махачкала, пр-т Петра I, 61

Редакция и издатель: Государственное бюджетное учреждение Республики Дагестан

“Редакция республиканских литературных журналов

“Соколенок” и “Литературный Дагестан”.

Адрес редакции и издателя: 367000, РД, г. Махачкала, ул. Даниялова, д. 55.

Поэзия

Мирза ДАВЫДОВ,
дагъусттаннал халкъуннал шаэр

АБАДЛИССА УТТАРИШВУ

Поэма

*Хас бувссар
НурмахАаммад ХАжимахАаммадовлун*

I

*Ппухъруннал чувшиву кьюкьин дувансса
Арсеру кьялявхъуссар лакрал аьрицарай,
Жанналияр ххисса балардал хъхьичІгу
БавцІуссар, чаннаннил зунтурду хьуну.*

*Мув чувшиву дуссар насиллануву
Хьиннура аьнт хъанай мийннал оьттуву,
Цикссагу ливтІуссар язисса арсеру
Душманнал хъхьичІ никру лахІан кьадурну.*



*Гитлердул ххиличІру цІунил чантІ куну,
БивкІудул ярагъру кІунттил бувгъуну,
Аьрасатнал дазуйн язид лавхъукун,
Гьаз хьуна кьучагьтал, ца ххяли хьуну.*

Мийннавух хIатисар НурмахIаммадгу –
Чивисса кюрттарал азгъунсса барзу,
Гъавалул батальон цайнма мютIисса
Бавкбуна душманнал ялун тIюпанну.

Ччинну хханссия гай ччарнийн даркбюсса,
Гъуен дуллалисса гъарзат ккарччаву
БивкIуллул машина хъусса цIивикъант,
Жиндралсса цIиникъру цIир-цIиртIи бувсса.

АрхIалсса бакъая дяъвилул гужру,
Нацистурал кюкюкя дия цIун хъанай,
Вирттал сагъну буна, бугъан къаст хъуну,
Щалвагу батальон бия вив ласлай.

ХъхъичIра-хъхъичI командир угъан тамахIрай,
НурмахIаммадлучIан бия гъан хъанай.
Щаву дирсса къучагъ, мютIи хъунсса ххай,
Мунийну Донбассрал яхI гъагъан бан ччай.

Лагмава урувгун цаламийннахгу,
Цахъва цалва куна НурмахIаммадлул:
«Тай циняв ясирну бугъан битаяр
Тайннахлу ца нава хъинни ивкIуну,

БивкIуллул машина рахIму бакъасса
Тай кунмамийнналли бацIан бантIисса,
Алиш бйякъын бувсса Украиннайгу...
ЧантI кусса фашизма бугъ дувантIисса.

Ттул дустал къучагътал, ттул мубарактал,
Къянкъасса заккана хъусса уссурвал,
Зуясса тIалавшин диркIхъурчан аьнтсса,
ХIалал итияра, мув ттул бурж бия...

2

Щарал къувтIи хъусса
Оьттул майданнив
Оьттун лицIлай ия
Барзунттал лачин.
Оьттуллучув сагъна,
Угъан къаст хъусса,
Ясустурал кюкюклул
Ялун бивгъуна.

Махъва-махъ гъаз бувну
Барзул яругу,

Урувгуна ссавних
Барзунттал барзу.
Оьнкъурал ранг хъусса
Ттуруллавату
Бурувгуна ниттил
Хъювсулсса яру.

Тавтсса оьттул къянкъа
Дурсса мурччивгу,
КIуну сукку дуллай,
Щурцу бувуна:
«Багъишла ува на,

Авзизсса нинуй,
Ттуява цама ан,
Къахъунссар ттуща.
Вилва хъазамрал накI
Ттун хIалал дува,
Уххай куну, ттул рухI
Паракъат дува.
Дяъвирдал майданнай
Цикссагу дуссар
ЯтIа-тIар бухлавгсса
Вирттаврал рухIру.
Мийннавухсса цану
ИкIувча нагу,
Хъурчан хIалал ити
Инагу, ччиссай,
Щакъалихна личIи
Хъун багъуннича,
Ттухлу ххира бува
Ттул чIири ссихъу,
Буттал ххира буван
Нясив къавхъусса...

Вай ттулва къучагътал
Ххассал къабуну,
Душманнал канивун
Ясирну гъаяр,
Ясирай бикIувча
Ттул хъунма ляхъин,
ЦцулIа хъуну, буттал
ЯхI гъагъан баяр,
Гъюжу-гъярж буккийча
Базурду чурххал...

Ххари махъанарди,
Язидтал, зугу,

Ялув ссав, лув лухччи
Дуссаксса жапрай,
Виричувнал цIанин
Бакъассар ажал.
НурмахIаммад, вил нур
Идавсил нурну
ДикIантIиссар зунттал
Насиллануву.

Вил гъарца оьттул кIунтI
Донбассрал чуллай

Гъанхъи, лагма лаги
Зулва бивкIулул,
Жун кIулссар литIунгу,
КIулссар сагъ хъунгу,
Душмантурайх оьттул
Къисас лахъангу.

Ва ттуятусса зун
Ссайгъатри, куну,
Граната дурна
Шякъ чин каниву,
Ччанналусса аьрици
Хъюлчу хъун дурну,
Лагма жаназарттал
Дия ччар хъуну.

Гъаз хъусса хханссия
ЛухIи тIюпан марч,
Ххурххулул лухччи-ссав
Дурна учин ццах,
Га ххурхху ниттихъал
Яс-леххавуну
Щалва дунияллийх
Бия ппив хъуну.

Ца ниттил дакъая
ДакI оьттун дурцсса,
Ца ниттил бакъая
Мяу бивхъусса,
Щава-щаварисса
Щалла дуниял
Мяурдал мукъавун
Дюркъесса хханссия.

3

КIура баянтIиссар
ХхунххутIул тIумIайн.
Гъарца инт дуркIтари
Ццунил цIулаглай,
ДикIантIиссар оьвтIий
Ччаву хъумийннайн...

НякI-къачIа ссавнилва
Лухччинул дазуь,
Дев кунма, алвагъну
Утту бивхъусса,

Щуну зунттул махълий
Дур шяравалу,
Чирисса дунугу,
Ца машгъур хъусса.

Чирисса, Чюлусса
КIа шяравуя
Лайлатул хIикматну
Ина лявхъусса,
Биза байсса кунма,
Барзул ххяллуя
Ина биза бувна
Щунул хъачIрая.
Ссавруннай, аьрцарай
Чув ухъурчагу
Ливкний ккаккан дурна
Вилла чувшиву:
Бургъил кIири байсса
Аьрабнал чуллай
Винна рахIатишиврух
Акъяяв луглай,
МахIаммад идавссил
Дин дурурчусса
Умматрал хIасратру
Уну бугъ дуллай,
Мюрци оьрчIалгума,

Лагма карусса,
Зулмулул ссиржентру
Дуцари дуллай.

Хъазамрай къучагънал
Орден ларчIнугу,
Муния бакъая
Вин пахру-ххара.
Лагма лаган бувну,
Вилва къучагътал
Чачаннавун ина
БавхIуна ссапар.

Сириянавугу,
Чачаннавугу
Фашистал чантI кусса
Украиннайгу,
Вил вирттавлрал къюкъа –
Ссавнил паранну,
Къызгъинсса дявирдал
Ар-майданнайгу,
Вирттал кунма бия,
Хъхъу-къини талай,
Ццах бакъа, бивкIулул
Иттав буруглай.

4

Ляхъан увхъурчагу лакку царссанил
Язисса арс хъунна циняр ниттихъан,
Дагъусттан - хIикматсса зунттал билаят
Хъиннува лахъ бунни вил игитишиврул.

Аьрасатнал яла бюхттулмур зунттуйн
Вилва миллатрал ца ина гъаз дунни,
Цурттавусса яла чаннамур цIукуй,
«Дагъусттан» тIисса махъ цIурттай ливчунни.

Лак тIисса махъ тачIав къабавмийгума
«Хъурдай лаккучувну» тIутIи бувунни,
Цукунна ца ниттил арсра чинтIисса,
Щалва Аьрасатнал арс хъуну уна.

Вил зунттал халкъуннал виричувшиву
Тарихраву дуссар, мусий чирчуну,
КъахъунтIиссар лиххан дуван мув чичру
Цараца, цинаца, я бураннаца.
Га чичрулул ца хIарп тти инагура,
Миллатрал пахрулул чанна цIукура!

МАЗЯЙХЪАЛ Казбек

БЮХТТУЛ ЗУНТТУ БАГЪУННИ



*Бюхттул зунтту багъунни,
Дунъял ялун леркъунни,
Вил каниву пIакъ уку,
Ттул дакIниву птив хъунни...*

*

*Вил хияллан ци бавив,
Нязанный цIарал ччувчсса,
ДикIул дакIнин ци бавив,
АьтIий, къупа тIий лирчIсса?*

*

*Вил чIивитIун ци бавив,
Аслан буттан ци бавив,
АьтIий мукъал лицIлайсса,
Ялгъуз баван ци бавив?*

*

*Ххяххябаргъ аьтIий буккай,
ЦIубарз дуаьрдай лагай,*

*Вил пурмалин я щукун,
ДакIния парча багъай.*

*

*Хъартусса аьрици лаллай,
Къакъанссар ниттил макъгу,
Гъантри, барзру, чIун лаглай,
Чуенссар буттал дакIгу.*

*Жалин хъунссар вил душгу,
Хъуннар хъунссар нинугу,
Вил гъунаргу, вил цIагу
ТачIав къахъунссар хъулу.*

*ЛичIанссар оьттун руцIлай,
Чачун цIурхъхъу тIий дакIгу,
Аьсрурду чанна дуллай,
ЛичIантIиссар вил яхIгу.*

ХИАДИСХЪАЛ ХІадис

АБАД ХЪУССА ЦІА

*НурмахІаммад
ХІажимаХІаммадовлун*

*Ватан шайссарив ядан куннайн кув ххяхлай, дяъвай,
Къини дурккуний оьсса Буттал ттиликІрах лякІлай ?!
Ватан ядан буккайссар ярагъ кІунттил бувгъуну,
Аьратталсса хъазамгу душманнайн ябивхъуну.*

*Лагайссар, жард къакуну, цІаравунгу ххяххуну,
ТІутІайх бивчсса оьрмугу, жангу ххира къадурну.
Вирттавралли лахъайсса дурксса оьсса къинирду,
Ккаччал иттавн жиндралсса яхІлил ччаллу къуевІуну.*

*Лархъссар къини инагу, марціну, лажин кІялану,
Царал ччуччин душмантал, вицІухра цІу ларчІуну.
Оьрмулуяр хъхъичІунну Ватан ххирар увкуну,
ЦурттачІангу левхссара абад дурну цІа-бакІгу.*



ЧЧИТИЯЛ Ися

ВИРИЧУВ НУРМАХАММАД

*Ккуллардал гъай касса лакрал аьрцарай,
Вана ца виричув ттигу кIучI уллай,
Къянкъасса бушиву лак ккаккан буллай,
Виричувнал цIуку Къянийн бучIавай.*

*Дазу-зума дакъар лакрал вирттаван,
Французнал, Польшанал, Болгариянал,
ХIабашинал, чаннасса Италиянал,
АцIния мукъаксса ур Аьрасатнал.*

*Лакрал хъазамраву цIуку ххи хъунни,
Вирттавалмур къюкъа Къяннал хъун дунни,
НурмахIаммадлул цIа абадсса хъунни,
Аьрасат лакраха зукълан бивкIунни.*

*Хьурдай тIий усса ур жула президент,
Дагъусттан кунмасса цинявпа солдат,
Къайлухъал мархрая куннасса къудрат
Духьурча ядуван ци бур тIий Ватан.*

*Шанна «Орден мужества» бутталгу дуссар,
Вил мусил цIукул мий багълул лахъ данссар,
НурмахIаммад, Энгельс, зул къянкъа цIарду,
Бюхттул буллантиссар къимат миллатрал.*

*Ява, къамул ува, АхIмадхан - СултIан,
Хахул муркIа бувсса НурмахIаммадгу,
КIану гъарта бара шайссаксса лакран,
ЦикIулли, бюхъайхха цаймийгу бучIан...*

*БакIру лахIан дурну мазанарду, къян!
Зуя пахрулий бур Аьрасатнал къан,
ЯхI къацIул бувгъуну зуну мачча-гъан,
НурмахIаммадлул душ зузи хъун буван.*

Ильяс МАХАММАДОВ

*Аьрасатнал Виричу тIисса цIанин лайкъ хьусса
НурмаIаммад XIажимурадовлун хас бувссар.*

ХИАКЪССА ВИРИЧУВ

*Бувссар ттул Лаккуй вирттал
Цаннаяр ца цIа дансса,
Къизгъинсса дявирдаву
Виричунал цIа ларсъсса.*

*Интнил хIусутсса кьини
Украиннай билаятрай
Вин жан дулун багъуна
Буттал КIанттухлу талай.*

*Щалла оьрму хьхьичI тIивтIисса
Му жагьилсса оьрмулий
Вил даКIнил хIучI къакунав
Рай къабулун къаст дурний?*

*Аскисса душманнахъхун
Рай къабулун къаст дурний
Янил хьхьичIун къабагнав
Нину-пу, кулпат, гъанми?*

*Дирзсса цIаниха лавхъсса
Шайссар учайхха арсру.
Виричув Нур-МахIаммад,
Вилла цIа дунни абад.*

*Га дяввилул къизгъинний
Къуннайн ца данди увккун,
Ккулларду бухлавгукун
Граната пьакьчин дурна.*

*Бювхъусса мурхьирайри
Дюрхъу ахълесса шайсса,
ЯхI бусса пухъруннаяр
ЯхI бу арсру бизайсса.*



*Дагъусттанная бувкссар
Вирттал цIарду бюхттулсса,
Хьиннура бюхттул дурссар
Ина зунтталчувнал цIа.*

*ГъантIиссар цюлли интгу,
ДучIантIиссар ялагу,
Амма вил цIа жул даКIний
ЛичIантIиссар абадлий.*

ИНТ

Суннай-гъаннай марххалттал хинни-ччинни,
Мигу – бургъил дассан дунни, ларгунни.
Инт най дур!
Къанчуллуду, читІул кюрттарав чІер-чІер,
Кучардаву оърчІал тяхъасса гьер-гьер.
Инт най дур!
Кърнил марщай – щюлли мюриш урттул махмур,
Мурхъирдай хъя чавайсса къупал авур.
Инт най дур!
Дюхлудсса гъавалувугу интнил къанкъ,
Бивгъусса ссихІуравугу интнил къанкъ.
Багъирдаву, ахъуву шуруй бур халкъ,
КъабучІир интнил къини гъан дан нахІакъ.
«Ца интнил къинилул зуруй яайссар»,
Жула буттал буттахъал тІий ттун бавессар.
Инт най дуй!
Хърссул чІелму ницал хърттай ливккунни,
ГъайтІалалгу хъарас канил дургъунни.
Цалчинсса хъарасрал барачат ххару,
Ца балай кунма, аърщарай чивчунни.
Инт най дур!
Цушин даркъусса хъуннав,
Къурув чІаллу бюхъаннав,
ЗахІмат дузрайн букканнав,
Зуйнгу хъинсса бияннав!



ВИРИЧУВНАЛ АБПАЛУН

ЗахІмат кьини дучІайсса,
Вирттаврал бакІрачІанни,
Вирттал хьинмий кІул шайсса,
Мукунсса кьинирдаїри.

Дурккуний, кьини лахъан,
Гьарцаннаца кьашайссар,
Ина тІурча лархъунни,
Жанналий хІайп кьакуну.

Агь, ттуруллал бувгьу баргь,
Нязанний ккарксса тІутІий,
ХІайп бакъаяв вил чурххай,
БивкІулул мугьру бищун.

Лакрал ттуруллал ттуриший,
ЛивчІуссарав цІаннаву?
Жул кьиблалул дагъаний,
Дургьуссаравкьай луххал?

ЧиваркІ бувкссар Къяния,
Буттал улкІуйх цІа дурксса,
Мийннал цІа абад дунни,
Вилла жангу харж дурну.

Вирттал бувкссар чІявусса,
Лакрал мюрици цархъава,
НурмахІаммад, вил цІанил
Мий циняв абад бунни.

Хьурдай нава жагьилсса,
Ца арс увайрив ккаккан,
Вил цІа арснан дирзуну,
Муная пахру буллан.

Нину хьхьичІ кьадарцІунав?
Бутта хьхьичІ кьаавцІунав?

Ккуккулийсса душнищал,
Щарсса хьхьичІ кьадарцІунав?!

ЯхІ гъавгьун ливчІуннихха,
Ас-намус бусса бутта,
МурицІув цядиркІуннихха
Ххира нину ва щарсса.

Баргь ттуруллал бувгьунав?
Бивчунав чІутІул чяхъа?
Душмантурайн лажинну
Ина жан дуллалиний.

Ххув Заннал улайссар тІар,
КІанала уцайссар тІар,
Циванавав кІа Заннал,
Вил душ ятин бувайсса?

Ялагь, вил хІавтІлил аьрици,
Паммалул шану хьуннав,
ХІавтІлил хьхьичІух чарттугу,
Алжаннул кьапу хьуннав!

Вил рухІ хьинний дишиннав,
Пирдавс алжан булуннав,
Вин кьабуллумур оьрму
Вилва душнин булуннав!

Тти ина гъан дува чІун,
Аьрцаращал дакІ дачІлай.
Ниттилгу гъанссар оьрму
Вил бивкІулул дард ккухІлай.

Бивхьуну бухьурчагу
Вил чурх лухІи аьрцарав,
НурмахІаммад, вил симан
Абадлий жул хьхьичІ дуссар.

Тудушустика

Анриана АБДУЛЛАЕВА

НА ЛАККУЧУВРА



Ца лахІзалий щалвагу билаятрайх ппив хьунни 25 шинавусса Виричув НурмахІаммад ХІажимахІаммадовлул ца. Ца лахІзалий щалвагу Аьрасатнал агьуланун, кьакІулнангу кІул хьунни душиву Аьрасатнаву вирттаврал мина Дагъусттан, бушиву Дагъусттаннай лак тІисса кьучагъсса миллат. Бушиву лакрал миллатраву «ЩилчІав хьхьичІ ник рищайар, ивчІан ацІанна» учайсса, жанналияр яхІ хьхьичІунсса, нигь - ццах дакъасса вирттал.

Оьрмулуву мудангу бирияйссар виричувшиву дансса лахІза, учай. ТІайлар. Амма дяьвилул цІараву, НурмахІаммадул кунна, душманнал хьхьичІ ник кьарирщуну, жан дуллуса виричувшиврул кьимат хьиннува бюхттулссар. Гьай- гьай, цумурцагу ниттин кунма, Сапижатлунгу арс сагъ- саламатну цилва чІарав ччанссия. Ци бансар, аьраличувнал пишалул бурж бур Ватан дуруччаву, дяьвилул цІараву хьхьичІ ххуттай ацІаву. НурмахІаммад ччимур ниттил цилла хьурдай учинсса арсгу, ххаллилсса дусгу, гьанчувгу ивкІшиву буслай бур цинявпагу га кІулмий.



Сапижат, нину:

Сентябрьданул 29 - ний 26 шин хьунтИссия ттул аьзисса арсан. Гиккава най уна, кьянкьасса, адаминашиву дусса иклайва. Хьунанал хIурмат, чIивинал рахIат биклайва. НурмахIаммад увсса чIумал на шяраву ттулва нитти – буттачIа буссия. Яла шилунмай бувкIра, гагу садикрайн улунсса пикрилий. Чурх буссагу, ччяни зат лаласайссагу ияча, ряхра шиннагу кьархьуну, гьан увссия школалийн. Навагу школалий байбихьулун классиртгаву дарс дихьлай буссия, ттуцала архIал уцайссия. Ттухь мудан биклайссия шаппа ххал бан лавсьсса тетрадьру.Цува чIивисса унува, ттуца гайгу лавсун ачайссия. Вилвамур сумка гьаз барча гьарича тIисса ттухь, учайва: «Дадай, на адаминарахха,на вин кумаг бан аьркинссар».ЧIивима арс садикрайн занай ия. На ца даврия цамунийн лечлай, авара хьанахьисса чIалай, пикри мабара, на иян анна, уцингу гьанна тIий, хьар цайнна лахьлан иклайва. Гиккава най уна, хьуна адаминал дакI дусса ия.

ЧIивину унава каратэлун, лачIун букваврил секциярдайн занай уссия. Гьарзат кIул хьун ччисса ия. Классраву хьхьичIунну, циняв цала хьирив бачин бувну иклайва. Учительтурангу ххирассия. Га цукун тарбия ав тIун биклайва. Жижара бан бувкIсса цинявпагу учительтал бия : «ТачIав иттав авцIуну, махьунмай махь бувну, кьадакIнийри. Чири - кьирисса тIулдакьашиву дарчагума, багьишла ити , утти кьаданна учайва»,- тIий. Ттула буттагу учитель ия, жу жувагу учительнал хIурмат кIулну тарбия хьусса бивкIру. НурмахIаммадлун кIира- шанна шин хьусса чIун дия. Бутта ца рязийну увкIунни: «Ласнацал бакьара куну, пикри мабара, ттул душ,ваная вил махь ацIансса, арулуннан кIанайсса арс укканссар»,- тIий. Циявхьур, бутта яттил хьирив лавгсса

кквккун,чІивисса оьрчІ архсса манзилланий ганал хьхьичІун лавгун ия. Жу Семендердай ялапар хъанай буссия таний. НурмахІамад цалчинмур классраву дуклакисса чІун дур. Шава акъасса хІисав хьуну, ци увривав тІий, къазразан бувну бура. Манарда тІий уна,мютІи ан къавхьуну, жучІатува нанисса ттула ппу тІайла уккан, автостанциялийн ияннин, лавгун ия. Ца ппурттуву аруйлчинмур классраву дуклакисса оьрчІ увкІунни цала буттачІату: «Дадай, буттачІа хъамалу Ингушнал Президент Евкуров ия. Нагу, га куна, воздушно - десантнийлувун ухханна»,- тІий. 9- мур классраву Гъумук дуклай уссия. КІия увкІсса чІумал увкунни: « Адаминал мурхь бугъан, къатри дан ва арс ан аьркинссар, тІун бикІайхха. Цалчинмур даву на дав, дадай. КІай Гъумукун бувххун нанисса кІанттурдай бувгъусса мурхьру, на бувгъусса мурхьрур»

Экстерном школагу къуртал бувну, ЕГЭ- гу лавайсса кьиматирттай дуллуну, Рязаннай дуклан увххуна. Бюхьу- бажар бусса ия. Цалчинсса семестерданий зачет дуллушиву бусан оьвтІий ур.

- На зачет дулав, на ва вилгу, ттулва ххирасса историялул учитель Асият Мусаевналгу хІурматрайнур дуллусса,- увкунни.

Цусса шинал байранналул гьантрай шавайн итаавкъусса чІумал, ца хьунмасса, цува къачІалачІисса тІутІал кацІгу лавсун увкІунни.

- Вин барчаллагь, дадай, на укун тарбия увсса. Ттуяр хьунисса оьрчІру бур портянка дахІин, чІатІа дизан, цала хьирив лакьин, марцІшиву дан къакІулсса. Щукру ттул ина бусса,- тІий, хъямала агьлай улувкъуну ур.

ТІайлашиву ххирасса ия, дусшиву дан кІула, чІявусса дусталгу бия.Чув ухьурчагу, вив лавсун икІайва. Рязаннай дуклакисса чІумалгу тиха оьрус дустурацал учІайва. Вайннангу жува цукунсса инсантал буссарив кІулну бикІан аьркинссар, учайва.

Махьунай нанисса чІумал : «Ттул душваврах ххуйну дургу»,- куну, царссагу, бан бувасса душгу ттуйн тапшур бувна. Нагу хьярч бав: «ОьрчІру тарбия буллай бивкІсса ттуца, душ тарбия бан шайссарив?»,- куну.

- Ина тарбия бувсса душ ца къянкъуш бикІантІиссар,- увкунни.

2017- ку шинал къуртал бувна академия. Тикка Ставрополлайн 247- мур гьавалул десантрал казачий полкравун тІайла увккуна. Ххюра шин шавай дуссия тийх зий. Къуртал шайхту, шавай зана хьунна, вичІан, ттулва кулпатрачІан тІий уссия.

Мартрал І4- нний, кулпат бувну, шин хьунтІиссия. ЩарссаничІан оьвкуну, ганил бувсун бия, роддомраин нанишиву.

- Ххуйсса хьхьу дур, на дуаь данна,- увкуну ганихьгу, яла ттуйн оьвкунни: «Ина микка чунчІав къагъанссарахха, дадай».

- На шикку бура, арс, вай ца чулийн буккайхту, оьвчинна, пикри бити.

- Оьвмачара, чичи,- кунни.

Душ байхту, сурат гьан дав.

- Аллагьнан ххирасса бизаннав, - кунни.

Тавакью бунни, душнил вичІилухун азан буккияра, куну.Му буклакисса видеогу гьан дав.

- Барчаллагь, дадай, щукру ина бусса мийннал чІарав. Дуниялгу, инагу ттун цара.

Ттул кьянкбуш дадай чайссия.

Баннинма, душнин ттулла ца дызанна тий ияча, мадизара, хьамитайпа, на кунма, кьянкбасса биклан кьяаьркинссар,- увкуссия.

Яла Таймия тисса аьраб ца дызан пикри бувну бия кинналагу.

Гиккава най унасса виричув ия. Ттул ттиликИну уссия. Дахьварухха жува яхьанан тисса, тгун икИайва. Гьарица кьинилийн чивима уссийшал дахханасса бахшишру дайссия. Фантазия дусса икИайва. Чивисса чумалва заправкалий зий, арцу ляркьуну, тгухьхун дулайссия. Навагу, ххуттава кьяуккан, ялув бавцуну бикИайссия. Аьркинний дяьвигу байссия, иш багьний, танмихИгу байссия, ца иттав кьяавцуссар, бакИ гьаз дурну, ссихИ кьадуркссар. Дустурашчал янна - ус даххана дуллан икИайва. Тгун мув тгааьн кьябизайва. Уттигу мукук какарча, ххуллий ликкан увну, уцинна шавай, учав. Мунияр махь щилчИав уссава ххал хьунни кьатИув. Ликки ва цана учав. Дадай, утти оьрчИал хьхьичИ на начливун маутлардар,- тий ур лакку мазрай. На вихь цал увкуссия, вин кьябувцунни, ликки учав. Зума кьяавхьуну, лирккун усругу, бачИва ччаннашчал увкИссар.

НурмаИамад ччинал цалва хьурдай учинсса арс ия. Цалва кулпатран цукунсса адамина уссарив ккаккан ан кьяивтунни.

Я Аллагь, дуният паракьат хьуннав. Царагунину, на кунна, аьтИути кьаданнав. Украиннавун лавгсса оьрчИру дакИ ххарину цалва бава - ттаттачИан зана хьуннав.

Энгельс, шу:

Чивинийва сивсусса, кьянкьа - кьурчИсса оьрчИ ия. АцИра шинаву, спортрахун агьну, Дагьусттаннал, Ухсавнил Ккавказуллал, Кьиблалул федерал округрал чемпион хьуссия. Итхьявхсса, хьхьичИунай нанисса ия. На, га чивину унава, ганахь учайссия: «Мукьул, дуллалисса даврил махь ацИан лахьхьи. Булав махь - бугьи. Учав махь - жаваб дула».

Ца чумал увкунни:

- Вил тренер ттуйн дяьвай ур, на таначИан кьазананна,- тий.

- Багьана бакьана, та виин дяьван кьяикИайссар, вий аьй дикИантИссар,- учав.

Бувцуну лавгунни. Увкумуних вичИи дишайва, бувсмур лаласайва.

Училищелувун увхсса чумал, ванан дахьра 15 шин дия. Тиву ва оьрмулувусса кьябикИайссар. Яла жагьилма студентная кIул хьуну, командующий хьярч буллай ивкИун ур: «Я, ттул арс, ина ххишаласса уну, шавату уккан уврав?»,- тий. Арсенлгу жаваб дулуну дия: «Тгухь буттал увкунни, адамина хьун ччай ухьурча, аьрали училище букки». Училищалувун увххун, дачИи шин шайхту, на ганачИан лавгссия. Ва ттул кIану бур, буттай, тий, рязийну ия. Училищалуву, спортрал бьст - ччаллаву гьуртту хьуну, курсрал, училищалул, щалвагу Рязаннал областьрал, СНГ - лул чемпион хьуна. Лайкь хьусса спортрал мастер тисса ца ларсуна. Училище бувккуну махь, Ярагьуннил гужирдал хIаписар хIисаврай кийла гьан увна Сириянавун. ЦалцИи шуну, шаву дирнугу ивкИссар. Тиха медальланушчал ва Сириянал Президент Асадлуясса Барчаллагьрал чагьарданушчал увкIуна. Сириянавасса оьрчИангума лакку маз лахьхьин бувну бия. Ца чумал оьвтИий ур видеосвязьрай. Чарав авцуну ур ца лухИи-пурщисса

оърчІ. Дядя Энгельс, салам аьлайкум. Цукун ура, ци иш бур?- тІий ур. Мувгу лаккучув урив?- цІухлай ура. Акъар, буттай, на ванан лакку маз лахъхьин бав. Асадлул къаралланувасса оърчІ ия. Бангладешрая оьвкунни, хавар бавну, жижара бан. Нуриклул лахъхьин бувсса махъру ттун ттигу хъама къабивтунни тІий, лакку- оьрусрай гьалгъа бунни.

Жу, ппу ва арс бакъассагу, коллегахъулгу, дусталгу бивкІру. Цувагу цалла даву кІулсса ия, аьркинмур ттухъгу цІуххайва. ДақІ ххарину дикІайва тІайла авцІусса, адамина кунасса уну тІий.

Къиблалул федерал округрай роталул командирну уссия. На мунахъ учайссия:

- Ттул бутта хІухчу ия, ттухъ бусансса акъая, вил махъ на ура. КъакІулмур цІуххи.

- Ттухъхъун яла захІматмур, оьккимур рота дуллунни, - тІий, рязий акъа ия.

- Вийн вихшала дуну тІийри. Хъунимийннал дурсса вихшала лайкъ дан аьркинссар, - учав.

УрчІва зурувату ванал рота гъавалул десантрал аьралунна яла хъхъичІунмур рота хъунни. ЧІярусса наградарттугу лайкъ дунни. 202І- ку шинал гъавалул десантрал аьралуннал учениярттаву НурмахІаммадул цалчинсса кІану бувгъуна. Ванан медаль ва Грамота дулун цува ВДВ - лул командующий увкІун ия. На ванацІа ххарину икІайссия. Тти навагу оьрму лавгун ура, ваймийнналсса НурмахІаммадул банссар тІий икІайссия. Хъару гъаргъун ливчІунна. Ганина куна: «На ивчІарчагу, щилчІав хъхъичІ ник къарищунтІиссар, буттай», - тІун икІайва.

Жан дулайсса ххуллий, къучагънал кунна, дуллунни.

Ттул дустал бур: «Жун ина ххивав сивсусса, бюхъу- хъит буссача, жагъилсса арс вияр ялтту увккунни. Билятрал Президент лаккучувра тІутІи унни. Аьрасатнал ца яла агъаммур каналланул журналист лакку мазрай гьалгъатІи унни,»- тІий.

Мадина, култат:

НурмахІаммадула ттун жулва инсантурацІа баллан бикІайва, амма нава буцланнин, ттун га къакІулссия. На мукун увкукун, циняв махІаттал хъанан бикІайва, НурмахІаммадния цинявннан кІулссар, вин цукун къакІулли, тІий. На Къизлярдай ялапар хъанай буссия, муvgу Ставрополлай ия. Ттуяту ганахъ гъанссаннал бувсун бия. Телефоннавух чичлай ца барзуксса хІал хъуна. Яла ца жулва Къяннал хъатІи бусса чІумал ккавказсару жу цаннан ца. Ттун ххуй бивзуна ганал ихтилат, мяърипат. Ганаща гъарзат бигъану бувчІин бан, ца-кІива мукъуйну цалва чулийнмай кІура баен бан шайва. Бусан-учин кІулсса, цІу- цІампир бусса ия. Ттул нитти - буттащал кІул хъусса чІумал, гайннан хъинну ххуй ивзуна. НурмахІаммадлу на лавкъуну ччай бия. Ялув къаливккун, нахІуну бувчІин бувна. На рязий хъувкун, ххари хъуну, ттуя вин бахшиш дуссар, на вин ца ххуйсса каниш ласунна, увкуна. Буллусса махъ бацІан байсса ия.

Жува чІявусса оьрчІру банну учайва. ЗахІмат хъанарча, кІирагу бавачІан гъан булланну, жува бигъалагнцІа. Жулва оьрчІан лакку маз кІулу бикІан аьркинссар, жува гай лакку мазрай гьалгъа тІутІи буллантІиссару, тІун икІайва.

Рукъижат, ниттилссу:

Жу шанма ссу буссару. Хаварду бусу, хъярч- махсартту бувумур на буссия. НурмахАаммадлул ляличИнура ттушал макъу дакъайва. ДакИниймургу бусайссия. Хъярчру буллангу ххирассия. Циняв жул уссур-ссуннал оърчАх аякъа дусса ия. Цуманал ци дантИссарив буслан икАйва. Цинявппа, ххира буллай, хъяралун бакълан икАйва. Ванал илкинсса дакИнил бутА цинявннайн бияйва. ЛяличИсса, нур дирзсса оърчИ ия.

АтА, буттарссу:

Ттула къумашиву мукъурттийну бусан къахъунссар. Итххяххсса, бусан - учин кIулсса, оърмулул шиннардиha къалавхъхъуну аькълу бусса уссия. Маччанах ччаву дусса икАйва. Га увкIукун, къатта чаннал буцАйва, лавгукун, бачIва шайва, дакI хъирив кIункIу тIун дикАйва. Цува ххира хъуннав тIисса ия. ЯхI бусса, чувшиву дусса ия чIивинияцIава.

Гульжагъра, буттарссу:

ЧIивину унава итххяххсса, гъармуниву хъхъичIун ливчусса оърчИ ия. На Нальчикрай ялапар хъанай буссия.Тихун соревнованиярттайн учАйва. Цалчинсса кIану къабугъарча, настроение дакъа икАйва, тти бутта ттухун дяввантИссар, тIий. Хъиривмийнну ххув хъунтИссара тIий, паракъат уллан бикАйссия. ЧIявусса луттирду буккайва. Ххирая шеърирду ккалангу. Цалвагу чичайва. Гъарица чулуха гъунар буллусса ия.

ГъарначIан ияйва, гъарнах къулагъас дайва.Чув ухъурчагу, вив лавсун икАйва. Цува авцIусса кIану чIюлу байсса ия.

Асмара, буттарссу.

НурмахАаммад жул шамийлчинмур никирайсса аьраличувъя. Ростоврай аьрали академиялуву дуклай ивкIссар ХIажимахАаммад тIисса жул буттал ссурахъу. МарцIну ххювардай дуклай ивкIун ур. Физкультуралул мукъва лавсуну, мув бакъин бан, экзамен цIунил дуллай , лахъния бассейнналувун ххяхххун, бакI щуну, ивкIуссар.

- Вил занакъулушиннараву, гъарица тIуллаву, адаминашивриву, чумартшивриву ттула уссу чIалан икАйва тIий, НурмахАаммадлуха зума тIийна бур ХIажимахАаммадлул ссу Саият.

Сисаву, къянкъашиву, яхI оьтту- ттурчIаву бия НурмахАаммадлул.

P.S. Украиннал аьрщарай хъанахъимунил къювулул бувгъусса ттул бакIрава цукунчIав буклай бакъар школалул сахIналий бувккусса шеърилул ххару:

*Пятнадцать республик, как сестры живут,
Пятнадцать республик покой берегут,
Пятнадцать республик за дружбу стоят,
За дружбу народов, за дружбу ребят.*

ДакІний мазрайва бур Абачара ХІусайнаевлулмий

*«Украин аьрцарай ххуй душил карав,
Жан дулун багъуна вин жагьилнува» -*

тІсса, Хъунмасса Буттал КІантул цІанийсса дяъвилий жан дуллусса уссийн хас бувсса шеърилувасса ххаругу.

ХъхьичІ дацІлай дур авурсса Киев шагърулул сурат, Софийский собор, Крещатик кІичІиравалу. Цал ттигу гъанна Киев шагъру ккаккан тІийна ливчІунна. ДакІния буклай бакъар Харьковъраясса тетя Нинагу. Ци бувкІривав танил бакІрачІан? Укунсса чІуннугу дучІанссар куну, щин дакІнийн багъанссияв?

ХІайп, ссурвал кунма бивкІсса Аьрасатнал ва Украиннал дяний дагъаву, Украиннал хъунимий Америка хІаласса хІукуматиртал кусси буллай, хъунмур ссу кунма, аякъалийсса Аьрасатнащал питнардай букваву.

Жулва бава- ттатахъул бикІайва, хъунимийннан хъинмур дакІнийн багъаннав, тІий. Украиннал ва Евросоюзрал билаятирттал хъунимийннан хъинмур дакІнийн багъну, дуняллий паракъатшиву ликканнав.



Лакку мазрал форум



ДГПУ-2022 шин.

Юсуп ХАППАЛАЕВ,
Дагъусттаннал халкъуннал шаэр

НИТТИЛ МАЗ

1

Мискинсар тИий ниттил маз
Тасттикъ байннал душманна.
Ина уча мунайн «къаз»,
Насу чIарах, циваннав?

Оьл ттизин къабюхъайнал,
Хъю дарккусса дур, учай.
Амма жулва Пюхчардал
Цалла нехгума хъун дай.

Аьрици мискинни чайма,
Мискинни щала цува.
Аякъа, къуллугъ барча,
Цир ганичIа халича?

Халкъуннал мазгу аьрицир,
Бувгъумур гъанна шайсса,
Жухъра дур утти каши
Жулва мазраха зунсса.

2

Лякълул оьрчI гъарца ниттин
Ххирасса бикIай хъинну.
Шаэрнал шеьри ятин
Бансарив, сагъну уну?

Шаэр, чIун хIайт мачара,
Къалиправун махъ бакъин.
Чу хъхъицIлай, дакI ччуччин да,
Буккул яру къалакъин.

*Шеъри цусса такъвалий
Щуттайх эъи насуча,
Чу бунал макъанналий
Балайлигу учача.*

*Мабуккара тІаннуих сир,
Чюлу дан аърсса тахта,
КъахъунтІиссар вий тахсир,
Айгъур барчангу ахтта!*

3

*Найрдал гъарца тІутІуя
Нарза ласай, ницІ дулай,
Гъарица ницІакъали
Цусса ницІал буцІин бай.*

*Чичул чичрулул ххуллу –
ХъхъичІ-махъ цама къалавгмур!*

*Шаэр, вилмур тІутІал ар –
Халкъуннал дакІ, ниттил маз,
Шеъри, назму ва хавар,
Цусса макъан, бухсса саз!*

*Шаэр, вихъри ихтияр
Цусса ххуллий хха чичин.
Экъи лагу нехнияр,
Халкъуннал дакІ ядишин!*

*Занай вардишсса ххуллу
Муv ххуллулссаннал ххуллур.*

*Интту ардай тІутІаяр,
ТІутІайх бичу, ниттил маз!
Зунттай зяй щаращаяр
Зяй-зяй тІутІу, ниттил маз!*

ЛАККУ МАЗРАЛ ФОРУМ ДГПУ-луву

Мазрал кюру ужагърайри бусса

Февраль зурул 16-нний Дагъусттаннал педуниверситетрал актовый заллануvu хъунни лакку маз ябаврин хас дурсса форум. Шикку гъуртту хъунни ДГПУ-рал ректор Нариман Асварович Асваров, ДР-лул Халкъуннал мажлисрал председателнаал хъиривчу Камил Давдиев, ДР-лул Халкъуннал мажлисрал депутаттал Артур Ибрапилов, Марат Илиясов, ДР-лул БакІчиначІасса Хъунилсриннал советрал председателнаал хъиривчу Сиражуттин МахІаммадович Илиясов, ДР-лул Жяматийсса палаталул председателнаал хъиривчу Сапарбаг Аълиевич Аъбдуллаев, МахІачкъала шагърулул мэрнал кумагчи Шалласу Рамазанович Шалласуев, филологиялул элмурдал доктор, ДГПУ-лул дагъусттаннал мазурдил кафедралул профессор Хизри Илиясов, ДИРО-лул хъунаманал хъиривчу АхІмад Къурбанов, Аь.Тахо-Годил цІанийсса педагогикалул институнал элмийсса зузала Миясат Муслимова, Дагъусттаннал Технический университетрал ингилис мазрал кафедрал хъунмур Жанна Абуева, ДР-лул Халкъуннал Мажлисрал депутатнал кумагчи Асият Буттаева, Дагъусттаннал Культуралул зузалтрал профсоюзирттал комитетрал председатель Марзижат Буттаева, Дагъусттаннал Халкъуннал чичу Мирза Давыдов, Дагъусттаннал Халкъуннал шаэр Космина Ибрапилова, шаэр Алексей ХІажиев, ДГПУ-лул дагъусттаннал мазурдил кафедралул доцент Римляна Саадулаева ва мукунма цаймийгу.

Форумрал даву дачин дурну ия МахIачкьалалал депутатътурал мажлисрал председатель Марис Илиясов. Дайдирхьунни форум лакрал гимнрайну. Цинявпагу шикку гьуртту хьусса инсантал бия жулва мазрай дакI цIуцIисса, мув буручаврил буруккинттарайсса. Ихтилатру цинявпагу бия лакку маз бухлаган къабитансса чаран лякъавриясса.

Ахирданий, лакку мазрал отделениялий хьхьичIунну дуклакисса студентккахьан дуллунна арцуйнуса бахшишру.

Нариман АСВАРОВ,
ДГПУ-рал ректор



Суратрай: (кях) Нариман Асварович Асваров, ДГПУ-лул ректор; (дяний) М.С.Илиясов, МахIачкала шагьрулул депутатътурал собраниелул председатель; (урчIах) К.М. Давдиев, РД-лул НС-рал хьунаманал хьиривчу.

Дагъустаннал миллатирттаву ца агьамсса кIану бувгьусса миллат бур лакрал миллат. Щалвагу дагъустаннал агьуланул пахрулий цIарду кIицI дансса вирттал бур лакрал миллатраву. Лакрал цалла цIа аьламравугума чирчунни. ХIакьинуса ва батIаву миллатрал байранналун ккалли дансса батIаву дур. Шиккун бувкIун бур лакрал миллатрал язисса арсру ва душру. Укун итххьавхсса, гьунар бусса миллатрал маз тачIав бух къалагантIиссар. Ва Форумрал даву дачин дан махь буллалиссар МахIачкьалалал шагьрулул депутатътурал собраниелул председатель Марис Сиражуттинович Илиясовлухьхьун.

**Марис ИЛИЯСОВ, МахIачкъала шагърулул
депутатътурал собраниялул председатель**



Сураграй: *(киях)* Н.А.Асваров, ДГПУ-лул ректор; *(дяний)* М.С.Илиясов, МахIачкъала шагърулул депутатътурал собраниемлул председатель; *(урчIах)* К.М. Давдиев, РД-лул НС-рал хъунаманл хъиривчу.

ХIурмат бусса лакрал жямат, шиккун бувкIсса хъамал!

На зу барча буллай ура лакку мазрал Форумрачал. Жулва лакку маз бухкъалаган Дагъусттаннал паччахIлугърал педагогический университетрал лап агъамсса даву дуллалиссар ректор Нариман Асварович Асваровлул каялув-шиннарайну.

Лакку маз бакъахъурча, лакку миллатгу бакъассар! Буруччинну лакку маз!

Жулва мажлис байбишиннин, лакрал гимн щаллу дан тапшур буллай ура Апанинн Къапиевлул цIанийсса лакрал театрданул балайчи, Дагъусттан Республикалул Халкъуннал артист ХIажиабли Аьлиевлуын.

Камил ДАВДИЕВ,
РД-лул НС-рал хьунаманал хьиривчув



Сураграй: *(киях)* Марис Илиясов, *(урчIах)* Камил Давдиев

ХIакьину шикку жува гьаз буллалисса маз бухлагаврил масъала цинявпа-гу миллатиртган аьмсса бур. Инсантал зунттава шагърурдайн бизавугу ниттил мазрай гьалгъа тIутIимий чан шаврил ца багъана хъанай бур. Нитти-бутгахь ихтияр дур оьрчIан цанма ччимур маз лахъхьин бансса. ХIайп, чIявумийннал ниттил мазраяр чил билаятирттал мазру хъхьичIун ласлай бур. Ттул пикрилий, маз хъхьичIва-хъхьичI гьалгъа тIий бан аьркинссар кулпатраву. Муния ливчуну мукъах, школарттайгу мув лахъхьинсса ххуйсса шартIру дузал дан аьркинссар. Гьалгъа тIий буссакссар маз яшайсса. ХIакьину жунма ябан багълай бур жува лявхъусса буттал кIанугу, жува гьалгъа тIутIисса ниттил мазгу.

Хизри ИЛИЯСОВ, филологиялул элмурдал доктор,
ДГПУ-лул дагъустганнал мазурдил кафедралул профессор.



Суратрай: Хизри Илиясов (*кияхма*) ва Шалласу Шалласуев

АССАЛАМУ АЛАЙКУМ!

Хурмат бусса, дустал!

Жува бавтІуну буру лакку мазрал масъалартту ххал бигъин. Гъарца шинал дуняллий 30-40 мюрци миллатирттал мазру бат хьуну лаглай бур. Мувра тагъар дур Аьрасатнавугу. Миллатирттал мазру бакъба бан савав хьуссар тарихраву хъанай бивкІсса дяввирду. Гуж бумий, хъунимий миллатирттал мюрщимий, заэвмий бас буллай бивкІссар мудангу. Къуранналий куну бур: «Жу ляхъан барду личИ-личИийсса миллатру ва къавумру, зу цаннан ца кІул хъананшиврул», - куну («Мы создали вас разными племенами и народами, чтобы вы познавали друг друга!»), амма шикку цания ца миллатрал маз ваймийннуяр гужссар куну бакъар. Циняв мазру архІалссар. Мюрщисса мазру къабикІайссар, мюрщисса миллатру бикІайсса.

Маз, тарих ва дин – яла агъаммий миллатрал лишаннури. «Зеххара миллатраща маз, ца никирава халкъ гъаттарайн кІура баянтІссар» - вай Геббельслул махъру нахІу лавчІун бунуккар цаппара ттисса глобалистал.

Глобализмалул заманнай мюрци миллатирттал мазру къалаллай бур хъуни миллатирттал, мукунма лакку мазгу. ЧчатІул мазурдищалсса, яъни, хІукуматрал мазурдищалсса бят-ччалливу вай бух хъанай бур. Агана жува, цичІав къазий щябикІарча, лакку мазрал ахиргу оьнин дукканссар.

Бала буну бур жунма урбанизациялулгу, зунттава халкъ ялавай арийн бизан баврил, яла-яла 1944 шинал Банайлийн депортировать баврил.

Чулу щавуйн цу бичаву хъанай бур, сайки, хушрай шагърулийн бивзсса лак шилу цаймий мазурдил «хъхъириувун» багъаву. Агана мичу, ягу ингуш шагърулийн изарча, хъунмасса бала бакъар, га ур гава цалва ниттил мазрай гьалгъа тий.

Лакку маз ябаврил, мув буруччаврил къяйдарду ххал дуллай, зий бивкссар Мариям Чибиевна Илиясова, Амуттинов Амучи Михайлович, Надир Мухадович Хачилаев. Гай бия цалва ниттил мазрай дакI цуцисса патриотъгал. Гайннан тийхава чIалай бия жулва мазрал ялун биянсса бала. Гайннал дуллай бивксса бусравсса даву жува къаритал къабучири, ялунгума мув чялиш дуккан дуван аьркинни.

Маз буруччаву мий овванмасса махъру бакъар. Мийннуву дуссар куртIсса мяъна: ябуван аьркинссар мазраву буцири махъру, хIатта кIанттул диалектру ва говорду духлаган ритан къабучиссар. Махъру тIайлану зумух ласлан ва чичаван аьркинссар, грамматический нормардайн буну. Жулва мазрал марцIшиву дуруччин аьркинссар: баянгу тIааьнсса, дакIнингу ххирасса. Луттирдал чулухагу, явара, жува личIину мискинну бакъассару: грамматикалул учебникру ва словарьду бур Къаяевлул, Муркъилинскийл, Хайдакъовлул, Жидалаевлул, Халиовлул, Абдуллаевлул, Буржуновлул, Мусаевлул ва м.ц. Маз авадан шайссар цаймий мазурдищалсса хIала-гъурттушиврийну: дагъусттаннайсса мазурдищал ва оьруснал, аьрабнал, туркнал, парснал мазурдищал... Мукунма маз цулаган байссар ялун бивксса цусса элмийсса ва жяматийсса терминнал, дахху-ласулул, иш-бажаранчишиврул лексикалул, мукунма санятирттацун бавхIусса ярагъуннил цардал. Масъала, Лаккуй гъарца шяраву цилла-цилла санят диркIссар. Мий санятирттацун бавхIусса махъругу буссар.

Чара бакъа аьркинну дур анаварну къамул дан Дагъусттаннал мазурдил къанун. Хъхъичунну дуклакисса учениктуран ва студенттуран бахшишру дулаван аьркинни, гайннавун дуккаврихсса гъира хъиннува бутаншиврул. Мукунма миллатирттал мазурдил учительтуран харжру лахъ буван аьркинни. Районная тIайла буклан аьркинни дуклан студентъгал, гайннан стипендиярттугу бивхъуну. ПитIин аьркинни лакку маз лахъхъин буллалисса бигъалагай къинирдай зузисса школартту шагърурдай. ТIалавну бикIан аьркинссар лакку мазрай буккайсса луттирду, шуруци дуван аьркинссар лакку мазрайсса сайтру. Лакку мазрал дарсру школарттай дишаван аьркинни, факультативный кунна дакъача, агъаммий кунна. Мукунна детский яслирдайгума лакку маз лахъхъин буллан бур.

Газет, журналлайнсса подпискалул иш ххуйну бакъар. Редактортуран цими чIа тий занан багълай бур, кагу тIиртIуну, дуваракъай подписка тий, спонсортурацIух. Хъунмасса барчаллагъ хъуннав мув бусравсса давриву чIарав бацIаймийннан (Сиражуттин ва Марис Илиясовхъул, Сапарбаг Абдуллаев, Сайпуллах Абдуразаков, АбдурахIман МахIаммадов, Жабир Абакаров, Гульшан Хасаева, КъурбанмахIаммад КъурбанмахIаммадов, Мавлид ХIасанов, Марзижат Бутгаева ва цаймий). Амма мунийну масъала щаллу хъанай бакъар. Миллатирттал мазурдийсса газет-журналлу даингу хIукуматрал кумаграйнури буклай бивксса. Гъашину миллатирттал мазурдийсса журналлан хъанахъиссар 70 шин. Гай итабавкъуссагу хъунасса шаэр Расул ХIамзатовлул

хІарачатрайнури. Ганал юбилейран меценат Сулейман Керимовлул итадаркѳусса 8 миллиардран журналлу ѳырчІисса рангирдай итагу бавкѳуну, подпискагу щаллу дан хѳунссия. Амма циваннив кѳакІулли циняр арцу ххуллу бакѳин бан куну ккаккан дунни. Расул ХІамзатовлулния ххулардал хІакѳираву цичІав куну бакѳар, хІатта цанна цІа кѳусса, шагѳра ххуллуягума! Мазурдил хІакѳираву тІурча ганал куну бур: «Агана гѳунттий ттул маз бухлаган тІий бухѳурча, на хІакѳину ивчІан хІадурссара», - куну. Ххуллу бакѳин бансса ца-мур чаран лякѳин аѳркина, арцугу мазурдин, адабиятран итадаркѳуну.

Жу хІукму барду жулва Форумрал резолюция Дагѳусттаннал Правитель-стволийн дулун. Ганийгу чичин: подпискалул масѳала районнал хѳунимийн-най тапшур бан, куну. Лакрал шаннагу районналул хѳунимийри хѳхѳичІва-хѳхѳичІ маз бурчлансса шартІру ххал дуллан аѳркинмий. Бѳухѳай гайннан цанмагу мукун ччай бикІан, амма бѳухѳай хѳанахѳимур кѳабувчІлай бикІангу, мунияту кѳулагѳас кѳадуллай бикІангу. Агана лакку маз бакѳахѳурча, лакрал районнугурхха кѳадикІантІисса, администраторталгурихха кѳабикІантІисса. (Гѳашинусса подписка(2022 шин) : Лакрал район І8 экз, Ккуллал район – 8 экз, ЦІуссалакрал район –цавагу экз).

Цанасса ппурттуву дагѳусттаннал филологиялул факультетрай студен-тѳтал бур стипендияртту ласлай Керимовлул фондрая, МахІачевлул фондрая. ДукІу-кІулсса ласлай бивкІунни Аѳли Кѳаяевлул фондрая. Мий ххаллилсса, лакку маз ххассал бан дуллалисса давуртту ттигу дачин дан аѳркинни, утгара дуккан дан аѳркинни. Мукунмий иширтгая бучІири эбрат ласлан жунма.

Барчаллагѳ хѳунмасса.

*16.02.22, ДГПУ,
Лакку мазрал Форум,
Актѳый зал, ІІ ссят.*





Суратрай: Артур Анварович Исрапилов, РД НС-рал депутат

БувчІлай бур так укунсса батІавурттайну маз ябан кѡахъуншиву. Ци чулий-гу, ва масъалалия гьалгъа тІий, дакІ цІий бушиврия рязийну ура.Ттун хъинну бювххуна лакрал театрдануву Абачара ХІусайнаевлун І00 шин кІицІ лаглагис-са мажлисрай Дагъусттаннал мазрал ва литературалул институтрал директор МахІаммад Ибрагъимовлул Дагъусттаннал мазурдиву бухлагансса яла ни-гъачІаву думур лакку маз бур учаву. Мув гьарцагу лаккучувнан кьутІинсса зат бур. Мунияту, хІакъину жунма аькринну бур гьарцаннал, цалла каши-кьудрат ишла дурну, ва масъалалул ялув зун.

Сапарбаг АБДУЛЛАЕВ



Циксса жува батГларчангу, цимийл вай масъаларттая гьалгъа тГурчангу, инсаннан цанма ччай бакъахьурчан, маз лахъхьин къашайссар. Бущинна ца мисал. Республикалул къатГув ялапар хъанахъисса ттулва душнил арснал, телефонналувух овькуну, ттаттай, ттун лакку маз лахъхьин ччай бур увкукун, на хъинну ххари хьура. Жунмагу кГулсса 16-мур школалий дарсеру дихълахъисса ПатГимат Аьлиеваяту бавну, ттун мунил ттухъра дарсеру дихълай ччива тГий ия. Учин ччимур муври, ччан бикланни аьркинса. Маз лахъхьинсса гъира-гъавас буссаксар, мув ябан хъунтГисса. БавцГусса чарилун щин къадачайссар, учай. Маз яхъуншиврул, муний ва мунияту гьалгъа тГийнма биклан аьркинссар.

Шалласу ШАЛЛАСУЕВ,
МахIачкъала шагърулул хъунаманал кумагчи



НИТТИЛ МАЗ – МИЛЛАТРАЛ НИНУГУ-ППУГУР

Ниттил маз бухлагаврин яла заралмий хIуччарду ци буссарив ттулвамур пикри:

1. Шяраваллил кIанайсса шархъурду духлагаву:

– 1901-ку шинал 109 шяравалу диркIун дур Гъази-Гъумучиял округрай;

– 1941-ку шинал - 106 шяравалу, цинявпагу 51,0 азара инсан;

– 1981-ку шинал 40 шяравалу лирчIун дур дурагу Ккуллал ва Лакрал районнай, цинявпагу 22,0 азара инсан.

Совет хIукумат леркъуну махъ, агъалий кIирагу районнай чан хъуну бур (кIиккува яхъанайсса) – шамлийну! – ливчIун ур увагу 11,0 азара инсан.

Даву дакъар – бучIисса харж бакъар!

ЦIусса Лакрал районнал шархъаву Дагъусттаннал миллатру гъарза хъуну бур, шагъру хъун хъанай тIий. ЦIу миналий дурсса шяраваллу хъуни къатрал вив ласунссар – шагърулухъхъун дулунссар гихуннайсса аьрши (Къумтуркъала районналул).

2. Къамул къадурну дур Закон «О языках народов Дагестана» («Дагъусттаннал миллатирттал мазурдил» къанун).

3. Школартгал програмарттай дур дурагу 2-3 дарс лакку мазрал – ниттил мазрал!

4. Дурарагу дакъар ОГЭ, ЕГЭ, мувгу хъанахъиссар тАйланнасса мазрансса душманшиву, сан къабуллалаву!

5. Ниттил мазрал дарсру чІявусса учкъуларттай ччи-ччима муаъллимтурахь дур, муаъллимтурая тАлавшинна лахь дан аьркинни.

6. Газет-журнал (подписка) чичаву хъиннура лашинсса дур.

7. ХІакъинусса, сайки, 190,0 азара лаккучувная 90% шагърурдай бур. Циван- нив? Вай махъсса 30-40 шинай шярваллил кІанттухсса аякъа дурагу дакъая. Бя ччучлайнма бур хІакъинусса кьинигу цархъаву!

8. Анаварну газ буцаву, ягу кІилийну ттукІрахсса багъа чан баву.

9. Къатта-къуш бан ччиманан, аьрщи дулаву (700-800 кв. м).

10. Районнал хъунимийннал овъчаву дуван аьркинни агъалийнан (лакрайн): «Цу дуккан дуванну жулла Ватан!»-куну.

Лакку билаятрахсса ччаву цукунсса дикІан аьркинссарив пасихІну, гьарца базурду чантІ учин буллай, чичлай ур Гьарун Саэдов.

Тул дакІнил ва чурххал мархри

Лаккуйри бусса.

КІай къукъирча,

На бйякъусса къурукъра,

Ссавния багъсса цІукура.

Лакку мазрал пасихІшиву, аваданшиву, аьрипшиву жунмагу, цинявпагу да- гъусттанлуvtуран ккаккан дурунни, лакку мазрайн таржума бувну Индиянал «Махабхарата» ва гуржи мазрая «Циникърал луттиравусса нарт» («Витязь в тигровой шкуре») дагъусттаннал халкъуннал шаэр Юсуп Хаппалаевлул.

Щукру аьлхІамдулиллагъ! Умуд Аллагънайн бивхъуну буру – щак бакъар – лакку маз ца яла бусравмурну, авурмурну личІансса вай ххаллилсса дагъуст- таннал мазурдиву! Буруччара Лакку маз, Ниттил маз, бюхттулсса, тарих турдай чивчусса, ххаллилсса Лакрал агъалий!



Суратрай: (урчІах)М.И.Махаммадов, филологиялул элмурдал доктор,ДГПУ-лул аьмсса мазурдил кафедралул хьунама; (киях)С.М.Илиясов, ДР-лул БакІчиначІасса Хь-унилсриннал советрал председателнах хьиривчу

Шикку биялсса ихтилатру хьунни лакку маз буруччаврия. Гьай-гьай, тамансса дуван багьавайсса давурттугу ккаккан дунни. Амма на ца зат учинна: яла захІмагсса иш маз буруччавриву лакку мазралмур иш бур. Ваймий мазурдий студентьтал дуклан бухлай бухьурча, лакку мазрал учительтал хьун ччисса лап чансса бур. Иш укунма личІарча, дагъустганнал мазурдиву хьхьичІва-хьхьичІ бухлагантІимур лакку мазри, явара, гьа, кІулну бикІияра...



Сураграй: (кях) Б.Гъзиева, (дяний) Алексей ХАжиев, (урчлах) А.Буттаева.

Мазрал хІакъиравусса батІаву цалчин дакъар хъанахъисса. 2018 шинал шиккура хъусса батІаврий «Илчи» газетрал хъунама редактор Руслан Башиаевлул увкуна: «ЧІявуну батІлай, маз ябан аьркиншиврия буслайнияр, мув ябуллай хъинссар», – куну. Шикку хъусса ихтилатирттаву чІалай бур маз ябаврихун хъинну багъну бушиву. ДақІ ххари хъанай дур цІанасса жагъилталгу лакку мазрахун багъну бушиврия. ЧІявусса группарду тІивтІуну бур лакку маз лахъхъин буллалисса.

Маз бухлагайсса, муний гъалгъа тІутІисса инсантал бухлавгукунни. Му-кунсса тагъар лакку мазрая архну чІалай дур ттун.

Марат ИЛИЯСОВ



Суратрай: *(киялма)* Марат Сиражуттинович Илиясов, РД НС-рал депутат; *(урчІахунмай)* С.Абдуллаев, А.Исрапилов, С.Илиясов.

БатІаву мюнпат бусса хьунни, ххуйсса ихтилатру бунни. Амма, вай ихилатру мюнпатрайн букканшиврул, жулва маз буруччаву мурадрайсса давурттал плангу сакин дурну, мийннуха зунсса жаваблувсса инсанталгу цІакь бувну, КІулшивуртту дулаврол министерстволийн буккан аьркинссар. Вай масъаларттаха зун аьркинссар хІал кІулсса, хасъсса пишакартал, жуцава шайсса кумаг жугу банну. ХІадур бара зунма кІицІ лаган ччисса мазрал хІакъиравусса масъалартту. Жу мий гъаз банну чІал къавхьуну хьунтІисса Дагъустаннал Халкъуннал Мажлисрал сессиялий. ДР-лул КІулшивуртту хьхьичІуннай даврил ПаччахІлугърал программалуву жува гъаз буллалисса масъаларттацІун дархІусса дахханашивуртту дан хьунтІиссар.

Ширвани БАКМАЕВ



Лакку маз бухлагаврия гьалгъа тий уссия ванийнин цимийрагу шинал хь-хьичI, аьпа бан цал, филологиялул элмурдал доктор Нурислан Сиражуттинович Джидалаев. Аьлимчув леххаву тий ия, ниттил маз буруччинсса чаранну льякьяра тий, жулва маз бири-бат хьуну гьан най бур тий. Вана хIакьину жува ганил тимунийн бувкIун. Ва Форумрай хьусса ихтилат овванмасса ихтилатнува личIан къабучIиссар. Жува аьркинссар шикку бувсса хIукмурду Дагъусттан Республикалул хьунимийнначIан биян бан. На умудрай ура, жунма ххирасса лакку маз жува ябувантIишиврий...





Суратрай: М.Ш.Муслимова (киямур) ва Ж.Н.Абуева

Укунсса хъунабакъавурттая мюнпат бакъа къабикIайссар. Цана жулва маз ябаврил масъала чIявуну гъаз буллалисса масъала бур. КIицI лаган ччива махъсса ппурттуву най диркIсса лакку мазрайсса шеърирду буккарил конкурс. Мюрцимийнная хъунимийннайн бияннин, чIявусса инсантал гуртту хъунни конкурсрай, хъхъичIунсса кIантту бувгъумийннан дуллунни бахшишру. Укунсса мероприяярдалгу мазрахух лаган буллалиссар, мазрахсса гъира бутлатиссар. Укунсса давурттах яматийсса жагълтурал организацияртту зий душиврия дакI ххари хъанай дур. Жува буру шагърулийн бизавугу ца багъана хъанахъиссар, маз хъама битаврийн тIий. Къарязийра. Циксса шинну хъурир машгъурсса композитор Ширвани Чаллаев, Ватанналия архну ялапар хъанай? Цукун пасихIну, бюхханну, экъи най гъалгъа тIун икIай га лакку мазрай.

Маз буруччавриву хъуннасса хъар лахълахъиссар кулпатрал ва кIулшивуртту дулаврил идарартгал. Жулва мазрал ххуйшиврий, пасихIшиврий, аваданшиврий, мув бухкъалагантIишиврий хъиннура дакI дацIалай дур, цаймий миллатиртгал инсанталгума лакку мазрай гъалгъа тIутIиний. Цукун ххуйсса шеърирду чичлай бур лакку мазрай яру душ Нуцалай СултIанова.

ХIакъинусса къинигу вай масъаларттах зузисса Педагогикалул институт тIивтIуну бур дяъвилул чIумал, 1943 шинал.

ХIисав бара, цуксса бувчIлай бивкIун бурир та чIумалсса хIукуматран мазру сахъла бан, миллатиртгал культура ядан аьркиншиву.



Сураграй: Римляна Шамхаловна Саадуллаева, филологиялул элмурдал кандидат, ДГПУ-лул дагъустаннал мазурдил кафедралул доцент ва Камиль Давдиев, НС РД-лул хъунаманал хъиривчу

Ххирасса хъамал, хІурмат бусса лакрал жьмат!

Цалчин на барчаллагъ учин ччай бура ва хІакъинусса жулла батІаву дан дакІнин багъсса ва цІана шиккун бувкІун гьуртту хъанахъисса цинявннахъу. Цанчирчан, шикку жува гъаз буллалисса масъалартту хъинну агъамсса ва чара бакъасса буну тІий. Цимил тикрал хъанай бухъурчагу, жунма леххаву тІун багълай бур маз бухлаган къабитаншиврул. Хъинну хъуннасса къулагъас дан багълай бур лакку мазрал цІанакулсса тагъарданух ва мув ябаврих. Мазрал тагъар ххуйну дакъашиву хъиннура яргну чІалай дур шикку, дагъустаннал цинявппагу мазру ца кІанай лахълайсса факультетрай. Дагъустаннал педагогикалул университетраву лакку мазрал отделение зий дайдирахъуссар 2003-кусса шинал, факультет тІивтІусса къинилия шийннай. Мунин бияннингу, лакку маз лахълай бивкІссар филологический, дошкольный, байбихъулул классиртаву дарс дишай ва цаймийгу факультетиртгай. Университетраву зий ттул къуниясса шинну хъунни, мунияту жучІанма къамул буллалисса студентътурайну чІалай бур шиная шинайн лакку маз хъама бивтуну нанишиву. Агарда хъхъичІава лакку маз лахълай айивхъусса студентънал гъалатІру, лугъатрал махъру ягу чичавривусса гъалатІру бивкІхъурчан, махъсса шиннардий жу ххари хъанай буру лакку маз бувагу бувчІлайширия. Лакку мазрай гъалгъа тІутІаву къюкъалану чІалай бур жагъилтал. Шярава бувкІсса оърчІру бур лакку мазрал чІурдаву гъалатІру итабакъбакъисса, шагърулимийнная гъалгъавагу тІий бакъара. Ва

ишираву аьй дан багълай бур нитти-буттайгу, школалийгу, кучалийгу. Оьрму-лул даража баххана хъанай бур, технологиярдал хъунмасса кІану бугълай бур, вай масъалартту махъмий дагъусттаннал мазурдивугу бакъа бакъахъунссар. Амма ттун чІалайссаксса, яла ххуй дакъамур тагъар жулва лакку мазрал дур. Мазрал тагъар цирича, маз лахъхъин ччисса, лакку мазрал дарс дихълан ччай буру тІисса дуклаки оьрчІру чансса бур. Махъсса шиннардий чичлай бай-бивхъусса агъуллал, рутуллал, цІахъюрдал отделениярдаву чІявусса студентъ-тал бур лакралмур отделениялувуняр. Гъашину жул І курсраву ца студент ур увагу дуклай. Яла хъунмур группалуву 5-6 студент ур. На шикку къабусланна цуксса захІматну буссарив студент жучІана уцин, маз лахъланшиврул.

Мунил ялув пикри барчан ччива жува ва батІаврий, цукунсса чаранну язи бувгъуну хъинссарив, ци бан бюхъанссарив.

Даимангу хъхъичІунсса лакрал жямат, на мукІруну бура, мазрах ччаву дакъа бакъашиврий ва хІакъинусса батІаврия мюнпат хъунтІишиврий.

Хъунмасса барчаллагъ!

Пиразат МАГЪДИЕВА



Суратрай: А. Аьбдуллаева, И.Саидова, П.Магъдиева, *(урчІах)*

Аь.Аь. Тахо-Годил цІанийсса ДНИИП-лул ниттил мазурдил секторданул хъунмур элмийсса зузала

Лакрал школарттай мазрал ва литературалул дарсру дишаврия

Цаппара инсантал лакку мазрал дарсру факультатив хІисаврай дихълай бур тІий бухъувкун, уцин ччай бур, вай дарсру, циняв дарсру кунна, расписани-

ялийгу дирхуну, программалул гъанулий, циняр цаймий предметру кунна дихълай дуссар, куну.

Лакку мазрал ва литературалул дарсру дихълай буссар Лакрал, Ккуллал, Новолакрал районнал школарттай, Рутуллал районналийсса кIива школалий, Чарадиял районналийсса ца цколалий, МахIачкъалаллал, Буйнакскаллал, Каспийскаллал, Къизлардал, Къизилюртуллал школарттай. Гъарзат чIалачIисса куццуи ххуйну бакъар, ххал бигъин аьркинсса масъаларттугу чIявур.

Цалчин, шагърулул ва шяраваллил школарттай ишла бансса луттирду билсса бакъар, бакъар мукума мийннуцIунсса методикалул пособиярттугу. Ттининнин Ленинградрай «Просвещениялий» итабавкъусса луттирдал аьдад-гу циняв дулкакимийннан диял хъунсса дакъар.

Лакрал районнай мазрал ва литературалул дарсру, мий дарсру дишаврил пишакартурахъхун къадуллуну, ссятру диял даншиврул дачIлай бур личIи-личIийсса дарсру дишайсса учительтурайх, мунияту мий дарсру дишаврил даражагу хъинну лагъсса бур. ЧIявумий школарттай бакъар ва предметран хас бувсса кабинетру, мийннулгу хъуннасса агъамшиву дуссар оьрчIан ниттил маз ххира шаврин ва дарсру цилва багъайсса даражалий дишаврин.

Шагъурдал школарттай вай дарсру дихълай хъуну дур зувинния лирчусса шинну, амма дарсру цилва багъайсса даражалий дишинсса шартIру ттигу сакин дурну дакъар. Мийннан куну сакин дурсса программартту дур школарттай, дарс дишаврил къяйдардая чивчусса методикалул чагъардугу гъан байссар учительтуран кумагран. Дарс дишаву тIурча дайссар, шяраваллал школарттан хас бувсса луттирдайн бувну. Мий луттирдай шагърулул оьрчIан маз лахълан хъинну захIматссар.

Яла агъамсса масъала ялагу бур школалул бакI дургъумийннан ва нитти-буттан лакку маз ва литература дишаврил агъамшиву къадурчIлачIаву ва мий цалва ниттил маз лахъхъаву цилва багъайкун дуллалаврин тIайлабацIан къабаву.

Маз ябаву цинявппагу инсантурал буржну хъанай бур, мув даврингу жучIара, хъуннасса къадарчагу, бургаву дуллаи бур. Итабакълай бур мазурдий луттирду, газетру, журналлу, радиолувух ва телевизорданувух дур передачартту, зий бур халкъуннал мазурдийсса театрду. Вай гъарзад дунугу, маз кIулшаву багъайсса даражалий дакъар, хъунмасса къайгъу бан аьркинни ттиния тийнмайгу жулва маз ябуван.



Суратрай: П.Магъдиева (киях), **Мутаева Светлана** (дяний), Аь.Аь.Тахо-Годил цланийсса ДНИИП-лул ниттил мазурдил секторданул хьунмур элмийсса зузала, РД-лул Клушиву дулаврил отличник, Р.Саадуллаева (урчIах)

ДАГЪУСТТАН РЕСПУБЛИКАЛУЛ ШКОЛАРТТАЙ ХИАКЪИНУС СА КЪИНИ ЛАККУ МАЗ ЛАХЪХЪАВРИЛ ТАГЪАР

Лакку маз ва лакрал литература лахълай бур Лакрал, Ккуллал, Цуссалакрал районнал, Ахъушийл районналийсса Бархъаллал, Цалакъяннал, Уручуллал ва Хьюллал, Рутуллал районналий Дюкбуллал ва Ялув ЧIатлухъиял, къутаннайсса Карашиял, Сангардал ва Къубиял, ЧIарадиял районналийсса Шаллал, МахIачкъала, Каспийск, Буйнакск, Къизлар, Къизилюрт шагъурдал школарттай.

Цанасса чIумал лакку маз лахъхъаву – мув дуклаки оьрчIру мазрал системалуцал ва ганивусса правиларттащал кIул баврийну, гьалгьалул бюхъурду ва вардишру шаврийну щаллу къашайссар. Ва предметрал хьинну хьуннасса агьамшиву дуссар дуклаки оьрчIал мировоззрение хун давриву, гайннан дуклан лахъхъин баврил гьану бизавриву, акъкьлу-кIулши хун давриву ва оьрчIру адав-инсапрал чулуха тарбия бавриву.

Шиная шинайн чан хъанай бур Лакрал ва Ккуллал районнайсса дуклаки оьрчIал ккал. ХIакъинусса къини чIявумий лакрал агьали шагъурдай ялапар хъанай бур, чIявумий дуклаки оьрчIру ва душругу дуклай бур шагърулул школарттай. Лак Дагъусттаннал миллатирттаву яла шагъурдайсса халкъ гьарзану бусса миллатну ккалли хъанай бур.

Жунма кIулсса куцуй, цанасса чIумал шагърулул ва шярваллил школарттай Федерал паччахIлугърал аьмсса кIулшиву дулаврил стандартру къамул дурния махъ, шагърулул ва шярваллил школартту зун ккаккан бувну бур цара-ца дуккаврил планналий. Дуккаврил планналийн бувну, ниттил мазран ва литературийсса буккаврин байбихъулул классирттаву, ниттил мазран ва литературалун лаваймий классирттаву аьмну 3 сьят ккаккан дурну дур.

Маз кѳулсса ва маз къакѳулсса оърчѳашал цава-ца куцну зун бюхълай бакъар, муниѳу шагърулул школартгай зузисса учительтуран лакку маз лахъхъин буллан аъркинни, кѳилчинмур маз кунма. Шагърулул ва шѳяраваллил школартгай зузисса учительтуран кѳулну дикѳан аъркинссар цивппа зузисса школартгал хасшиннарду. Хъуннасса къулагъас дан аъркинссар шагърулул школартгай мукъурттил луртан гъарта ва авадан даврих, яъни, цѳусса махъру лахъхъин баврих. Махъру кѳулну бакъа хъурча, га мазрай гъалгъа тѳун къабюхъайссар. Шагърурдай ниттил маз шурущи баврил сфера дурагу дакъар. Муниѳу шагърулул школартгайн букѳлакѳисса оърчѳан чѳявумийннан лакку маз къакѳулли. Учителънан биялсса захѳмат бишин аъркинни дуклаки оърчѳан ниттил маз лахъхъин бан, га лахъхъаврих гъира бутан.

Махъсса шиннардий Аъ. Аъ. Тахо-Годил цѳанийсса Дагъусттаннал педагогикалул элму ахттар дуллалисса институтрал каялувшиврийну издательство «Просвещениялий» байбихъулул классирттансса лакку мазрал ва литературийсса буквавил луттирду итабавкъунни. Луттирду дуклаки оърчѳан хѳаз бизанну сакин бувсса бур, гиву чѳярусса суратру дур. Луттирдавусса текстру лакрал тарихран, гай ялапар хъанахъисса кѳанттурдан, лакрал вирттаван хас дурсса дур.

Гъашину 5 классрансагу луттирду бувкъунни, 6–9 классирттансса луттирдугу хѳадурну буссар. Мий луттирду итабавкъаву маз лахъхъавриву хъуннасса хъхъичѳуннайшивурттуну хъанахъиссар.

Мукунна Аъ. Аъ. Тахо-Годил цѳанийсса Дагъусттаннал педагогикалул элму ахттар дуллалисса институтрал каялувшиврийну хѳадур дурну дуссар байбихъулул классирттаву дарсру дихълахъисса учительтуран кумагрансса методический литература. Гайннуясса цаппара Аъ. Аъ. Тахо-Годил цѳанийсса Дагъусттаннал педагогикалул элму ахттар дуллалисса институтрал сайтрай дуллуну дуссар.

Жулва мазрал цѳанакулсса тагъар цукунсса дуссаривгу цумацаннангу чѳалай дур. Муниѳу яла хъунмур жуйвасса бурж – маз буруччаву ва ялун нанисса никирайн, жучѳанма бивсса кунма, мув тапшур баву хъанай дур.

Ниттил маз ябаврил масъала – мув миллатрал масъалану ккалли бан багълай бур. Мув масъалалуву хъунмасса кѳану бугъанссия школалул, амма цаппара школартгал каялушвиву дуллалимийннал чулуха хъунабакълай бур ниттил мазурдин ккаккан дурсса ссятру цаймий дарсирдан дуллусса кѳантту ягу шанна ссятран кѳанай ца ягу кѳира ссят дуллуссагу.

Ниттил маз ябан, мув буруччаву ва магъир баву мурадрай дуван бучѳир личѳи-личѳийсса давуртту:

1. Дикѳан аъркинни хѳукуматрал дачин дурсса мазурдицѳун дархѳусса политика, къамул дан аъркинни Дагъусттан миллатиртгал мазурдиясса закон.

2. Кѳулушвиву дулаврил ва элмулул министерствалул ниттил мазурдин ккаккан дурсса ссятру ишла даврил ялув къянкъасса низам дишин аъркинни.

3. 9–мур классраву чара бакъа дикѳан аъркинни ниттил мазрал ОГЭ.

4. Шагърулул оърчѳал багъирдаву ниттил мазру лахъхъайсса группартту тѳитѳин аъркинни.

5. Ниттил мазрал ва литературалул луттирду итабавкъаврил даву анавар дуккан дан аъркинни.

6. Ниттил мазурдин хасъсса, лакрал батѳавуртгай лакку мазрай гъалгъа буллан аъркинни.

7. Маз кулпатраву ябан, ганил агъамшиву бувчѳин буллалисса мероприятияртту, передачартту дуллан аъркинни.

ФОРУМ РЯССА СУРАТРУ



Суратрай: Хіажи-Абли Аблиев лакрал гимн щаллу буллаи



Суратрай: (кияха урч*Иахунмай*) М.А.Бутгаева, К.М.Исрапилова, А.Д.Къурбанов




Суратрай: (урч*Иахма*) Хизри Рах*И*мов, ДР-лул физический культуралул ва спор-
трал лайкь хъусса зузала



Репортаж х'адур дурмий: Хизри Илиясов, Андриана Аьбдуллаева, Имара Саидова.



МАЗЯЙХЪАЛ Казбек




ШАЭРНАЩАЛ НАВАЛУ

Шаэрнал иттаври тІайламур ххал хьун аьркинсса.
Жюль Ренар

Буттал улча буссаксар инсаннагу талихІ бусса.
Василий Белов

ДакІния къадуккай ттун га ляличІну кІирисса гьинтнил кьини. Тту-руллул къурхъ дакъасса някІсса ссавнил зумарду кІиришиврул, цал пур-кІурайн дурккун, аьрщарайн зирзуну, яла, ссурулунна гъаз хьун, кІункІу тІисса хханссия, – га щюлли талай кІялавххусса ццунсса чІаенналул гьунналуха яла гьанмий зунтурдугума чІалай бакъая. Аьжаивну дазу



дакъа пашмансса, пашманнугу дакІ цукуннив тІааьнсса асардал дуцІин дуллалисса кьини дия. Укун пашманнугу, тІааьнсса асарду ва шугълурду, так ца буттал улклуй бакъа яла цамур кІанттай аьлтту шайшивугу къакІулли.

Ци-цигу тамашасса пикрирду загьир шай инсаннал дакІниву ца-ца чІумал! «Ва ттулла буттал шярваллийн къаршину жулла дунияллул шарданул тамур чулух, заннахуча, ци дурвав? – пикри хьуна ттунгу цакуну га кІирисса гьинтнил кьини жулва дюхлулсса чІивисса тавханттуву щяивкІун уна. – Ци дурвавли тийх, шагьру бурвав, шярвалу дурвав, акъану инсаннал ша къабивзсса, вахІшийсса зунтурду бурвав, ягу дазу-зума дакъасса някІсса океан бурвав? Бюхъ-айхха тийх, ва ттулла буттал шярвалу кунна, чІигу чІирисса, дунияллул аьлагъужалиягу архсса шярвалугума дикІан. Духьурча, вай ттул къатрайн къаршисса къатраву цу ялапар хъанай урвав? ЦІана нава кунасса дулланмур дакъу урвав, ягу квавкцириннул къакъан дуресса, цурдалусса къари дурвав, дунияллий ливчІсса цилва гьантригу цукуннугу гьан буллай, бизарну щядиркІсса, ягу ци щюлли яру ссурухІи бурвав, на кунма,

дакІгу ссахрив цІунцІу тІий, шугълу-хияллай шябивкІсса? Ци миллатрал бурвав тай, ссал пикрирдай бурвав тай цІана, ссая ккалай бурвав?»

Паракъатшиву, иминшиву цІана шяраваллил! Ца бала-мусиват ялун най, ду-дуний ду-думургу къадиртун, шалва жямат зунттавунмай лавгсса хханссар. Амма ттул тІааьнну-пашмансса дакІ цІана паракъатну дур. Паракъатну дур, ва щюлли талай кІялавххусса чІаенналувун дюркъусса гъинтнил къини кунна, паракъатну дур, нава буттал улклуи уну тІий, паракъатну дур, машинарттал ххурххулия, шагърурдал атур-гутурдания, пІапІрусирттал пуркІурал бугълил бувцІусса кафердал ва рестораннал аьлагъужалия архну.

Абабай, шайча рахІат инсаннал чурх, хансса тІабиаьтрачІан ивукун! ЦІулагара нагу цакуну, вай жулва зунттавун учІайхту. Аьжаивну аькьлу нацІусса шанавун лавгун, дакІ чантІ куну, бакІравусса аькьлу дакІнил бавцусса кунма, ца хІикматну дакІ личІлул хьуну, дакІнигу яру ва вичІив хьусса кунмасса иш шай. Дуниялгу ляличІину яргсса, ляличІину чаннасса рангирдаву чІалан дикІай, аьрщарайгу так ххуймур ва илагъимур бакъа, оьккимур ва чапалмур, бувагу бакъасса кунма, чІалан бикІай. Ттинин ччанарккуну чІалай диркІсса, кІусса пикрирдал къурхъругу, тІабиаьтрачІан ивукун, бигъану ттирихІай. ДакІ тІурча, ваца нава аькьлу шанай, дакІ чантІсса чарил заманнайн агьсса куна, чІяву-чІявусса затру цІухлай, суаллу буллан дикІай, амма жаваб аьркин къашай, дакІнин цилла буллусса суалданува та ссят жавабгу лякъай. Муксса чантІ куну, муксса личІлул шай тІабиаьтрачІа дакІ.

Инагу увкІунав ттучІан га кІирисса гъинтнил къини вилва суаллащал, шаэр. Ттулмур дакІгу га къини жавабирттах мякъну дакъаяча, суаллах мякъну дия. ДакІ ццах учин дансса суаллах мякъну дия. Ццах учин дурна инагу ттул дакІ, шаэр, вилва суаллайну.

*Байрив, уссурвал,
Байрив, ссурвал,
Ссутнил дякъий чІахІа
Балай тІисса куц?*

*ЧахІамур аьтІий бур
Язугьсса чІуний,
Къукъу дакъин дурну
РатІнил зумарду.*

*Каманчалул ккуртта
Синттайх укунма,
Марч бур ссулу буклай
Музлинсса чІахІлуйх.*

*Щиха аьтІий бурвав
ЧахІа ратІничІа,
Нину-пну бакъасса,
Ятин оьрчІ кунма?*

АьтІи дува, шаэр, ина жул бунагъирттал дурцІусса дакІру, аьтІийрагу марцІ къашайрив ккаккан, аьтІи дува! ЦІунцІутІи дува, шаэр, ина жул мурчІисса дакІру, цІунцІу тІийрагу чанна къалахъайрив ккаккан, цІунцІутІи дува! Буллалу ина, шаэр, жухъхьун вилва аьдилсса суаллу, жавабру жушара лякъин шайрив ххал баннуча, буллалу суаллу! Так аьй мадара ина жуй, шаэр, вай жул вихъвасса миннатру бухсса бур тІий, вай, махъру бухсса бухъурчагу, дуниял ахир хьуннин, шаэрнахъ бай миннатрурча.

*Цаннакъай тти ина,
Хханххираву дакI,
Паиман хъанахъисса
Чани хъячайхту?*

*Хъхъу духларгун тIийрив
Вил паиманишиву?
Къини дуркIун тIийрив
Вил къумашиву?*

*Цаннукъай зугу, ттул
Чаннасса яруй,
Аьратталишив дуллай,
Хъхъемахлахисса?*

*Дустал лавгун тIийрув
Зу аьратталсса?
ДакI ялгъузну тIийрув
Хъхъемахлахисса?*

Вай жулва хъунив хъусса зунттаву дусшивруяр къимат бюхттулсса цичIар къадиркIссар тIун бикIайхха, замана баххана хъуну, дусшиврул къиматрив лагъ хъусса, акъану абадул-абадлий инсаннал дакI дуснах мякънурарив диркIсса? Мякъну дурхха ттулмургу дакI дуснах, хIакъсса дусгу ца икIайривав, шаэр? Агъ, ттул дустал, чув бурув зу? Ва ттул дакI-ния, зушал кIикъадачIлай, гъузилархъуну, къявхъ учин хIадурну дур, зулсса дакъарив? Вилмургу дурив, шаэр, дакI дустурах мякъну, ялгъузну-аьсивсса суаллу буллай урахха?

*Бичлай буна хъхъири
ЩатIайну тIутIайх,
Дичлай дуна ссавгу
ЦIурттайну тIутIайх,
Дунура лухччивгу
ЧируннатIутIайх,
Цанни дакIнийх бавкъу
МикI къабассайсса?*

Маритара жул дакIру микIирал дакъин, мабитара жул аькълу шанан, шаэр! Ккулла щуну, ившукун дакъа, къадурчIунахха Андрей Болконскийнгу кIа някIсса ссавнил мяъна, инагу аьй дува жуй, бювкъу бува жуй, бищун бува жу, так дурчIин дува жун кIа чаннасса, куртIсса ссавнил мяъна, шаэр! Бува жухъ вилва мариян-макътIутIул мазрай вилва иминсса, бюххансса гъалгъа! Идавс инарача, шаэр, Жабраил-идавсил кунна, гъалгъа тIутIи дува жушчал вай циняр тIутIив ва уртту, вай циняр чартту ва къунтту! Экъи нани дува вилва чIахIлул щютIуххува гай вилла яла чаннамий, яла илагъимий макъанну! Буси жухъ, шаэр, кIюрхнил иминшиврия, хъхъунил гъапулшиврия, буси жухъ бургъил тяхъашиврия, зурул пашманшиврия!

*Буси, хъхъирий, ина
Тухъ щюлли магъа,
Лагмара – зумардайх
ТIутIив ххяхханну!*

*Бусира, зунттурдув,
Зугу бусала,
Зунчал дургъу бакIру
Вях тIий дяхханну!*

Хъунмасса хІал бувссия, шаэр, на га кІирисса гъинтнил кьини вищал ихтилатрай. Жулва гьалгьалух вичІилий, чІунгу, хьхьичІуннай кьахъанай, дуний дарцІусса хханссия, – ттулва оьрмулугу гаксса лахъисса кьини ккарккун акъара.

Га кьини ттул хьхьичІ столланий буссия вил «Язимий» тІисса шеърирдал жуж. Навагу вил назмурду куннил хьирив кув ккалай акъассиявча, анжагъ, чІапІив ххилтІу дуллай, я тІайла бавцІусса ххуттардий аглан хъанай, ттунма ччянива ххира хъусса вил тунтсса мукъурттил мяъна цІуницІа цІусса пикрилул кІуллух авч дуван хІарачат буллай уссия. Га вил шеърирдал жужрацІа хъусса гай нукІузаманнул дарайрдал ва автрилул кьанкьгума ляличІину тІааьнсса, ляличІину аьнтсса дия, шаэр. (Га кьанкь хъуншиврул на ттунма яла ххирамай чичултрал луттирду ттулла ниттин ниттил ниттахъая бивсса гьаржлугу бишара). Вил шеърирдал жужрал чІапІив ххилтІу дуллай, ттуна навагу дягъинттул, нарзалул кьабуччавай, тІутІая тІутІайн лехлахисса найраха лашлай ивкІра. Вилмий назмурдал тІутІал нарзарив тухъсагу, тунтссагу бия. Гукун тухъсса, гукун тунтсса назмурдал нарзалия тІурча, дакІ паракъат дакъаний, дакІ рахІат дайсса, дакІ зурул чаннал нурданул дуцІин дайсса аьжаивсса шараб шай. Га кІирисса гъинтнил кьинигу паракъат дакъасса ттул дакІ рахІат хъун вил ва ца калимагу гьа хъуна, шаэр.

*Лухччи аьтІий духъурчагу,
Пиш яшай мюри тІутІаву...*

Ттул уссия ца дус. Ганал зумувсса махъругу чІявуну вай бикІайва: «Агъ, ттул дустал, зу ци тІурчагу, ва жулва оьрму кунцІа бур, кунцІа». ДикІайхъунссар кувний цума-цаннангу оьрму кунцІану чІалачІисса чІунгу. КьютІІ кьабанна, дуссия ттулгу мукунсса ца чІун. Амма инсан укун бьякъусса, мурчІисса пикрирдал карцирава уккан ан, ина куна, дакІ аькьилсса шаэрнал дурсса кІира калимагу гьа шай, ина кунасса инсангу уссархха ва дунияллий тІисса илгъам дакІнивун багъавугу гьа шай.

Укун хъунасса хІаллай вищал ихтилатрайгу ивкІун, на ахиргу кьатІув увкессия, шаэр. КьатІув уккайхту, ттул я тІайла бавцІуна жулла хІаятравусса кІяласса зяйтІичарил кьунттуйн. Жулла шяраву кунма чІявусса кьунттугу ттун чувчІав кьаккавкссар. Вай хъунисса, кІяласса зяйтІичарил кьунтту бур жул шарнил лагмавагу, жул лухччай ва кьурдаравгу. Лухччан ва хъуруннан цІардугума вай кьунтту хІисавравун лавсун дирзун дур: Шанкьунтгавалу, Хъункьунтгазаннилу, Хьхьиял кьунтту, Мялалкъун, Ччалакъун, Дав-давтІикъун, Дагъникъун. БакІуй дирхъусса жул чІирисса шарнил кІий, кІа кьабакІравугума бур ХІажилкъун тІисса, ца хъунмасса кьун. Буслан бикІай, хІалтІилухун Аьрасатнавун лавгсса ттул ниттил ниттил бутгахъ цциган шарссалнил: зул шарнил бакІрай ца хъунмасса кьун бур куну, бувчІунугума бивкІссар тІий. ЦІана ттулмур

я ва жулла хАятравусса къунттуй бавцІуна. ТачІав къаххяххайсса, га шинал ва къунттуй ца къярти ххярххуна. Ттун хІисав хьуна га къяртуха ттулла нину ляличІисса хІурмат буллай, – ганийн щин рутІлай, ганичІан ризкъи, оърчІ–бакІ гъан хьун къабитлай. ЦичІав къабувчІлай, махІатгал хьуну, на: «Яр, дадай, ина циссара, тти ххарттухагу буллалисса мув ци хІурматри?» – куну, цІувххуссия. «Ва тачІав къаххяххайсса къярти гъа-шину вина арс аннинни ххярхсса, дадал, – куна ттухъ ниттил ца тама-шасса щурщулий. – Жура ва ядан аъркинссар». Мйяжаннугу, га шинал ттун арс увна. Амма цІана, оьлил дуркуссияв, чІаххуврал оърчІал рирт-туссияв, къунттуй къярти дакъая. Га хьхьичІрамур ххарттул чІарах тІур-ча, га чІалай къачІалачІисса хьякрулувух ларай, хьахъи ришлай щюл-лисса, мюршсса тІутІал къяпушалсса цамур къярти ххярххун дия.

*Къунттуй параннарал хьяклу дуртунни,
Хьяклу дуртунни!
Ссах дази лаганна ина га хьяклу?
Ина га хьяклу?*

*Ина кІаччи хьунна, нагу мурхъ хьунна,
Нагу мурхъ хьунна,
Так ина кІаччира ттул дакІний ххярхсса,
Ттул дакІний ххярхсса!*

Агъ, шаэр, аьжаивсса, къадурчІин ччарчагу дурчІуннасса, дурчІлай-гу, дурчІин къашайсса зат дур ва дунял! Амма щил ци учирчагу, тІай-лахьунссар ва жулва оьрму, тІайлахьунссар ванил къанунгу. КъатІай-лахьурчагу, туну, цибаннун, тІабиаьтрал ва оьрмулун къанунналияр ххув хьун жуцава къашайхха. Жуйвасса бурж так ца бур: дуняллийн ци ликкарчагу, къадарданул жулва бакІрачІан ци буцирчагу, так инсанну личІан, так буттаьхал жуйнма аманат бувсса яхІ ва къирият дуруччин.

«Шаэр ххуйну кІул хьуншиврул, шаэрнал бутгал кІанугу ккаккан аър-кинссар», – куссар тІар та заманнайва Гётел. Га кІирисса гъинтнил къини ттунгу багъуна цакуну гъира вил бутгал шяравалу ккаккан, шаэр. Ттун чІявусса бавссия вил бутгал шяраваллия, бавссия вил шярава бувксса хьин-хьинсса инсантурая, кІулссия ттун гайннал ххаллилсса давурттая. Цимийлгу гъалак увссара на АьбдурахІманнул оь щаращисса шеър-дал, цимийлгу кайп увссара МухІуттиннул януну-иминсса назмурдал. Амма тия, Гъумучату архну ккаккарча дакъа, на вил бутгал шяраву къ-авхьуссия.

Га кІирисса гъинтнил къини тІурча, цакуну гъира багъуна ттун шаэ-ртувал минар тІий сийлувун дагьсса вил бутгал шяравалу ккаккан. Агъ, шаэр, ттун кІулли, цаймий кІанттава вай жулва зунттавул увкІсса хь-амаличувнан вай жулла шархъал жура-жандара, шиккусса инсантурал багъу-бизу кІул хьун ца-кІира шяравалу ккаккавугу гъа шайшиву. Амма

кІартташул хІал кІартташул залуннанни кІулсса. Нарив мякьну икІара
 вай жулла цархьал цанма-цанма хасъсса ссихІирах ва кьункьах, вайннул
 цанна-цанна лархьхьусса лугъатирттах ва ляличіишивурттах, шиккусса
 циняр аьжаившивурттах. Мукун укъаччавай мякьну икІарахха, ттула ца
 дуснал – шаэрнал къачирчагу, буттал улклуй унагу, буттал улклух мя-
 кьну. МахІатталсса иш, кьуния ххюва къатта бусса Ккуцрал шяравал-
 лилгума бия щихакІуй къалархьхьусса, цалвалусса лугъат, цаллалусса
 аьдатру. Ваксса чІирисса вайннал шяраватугума бувккун бия вайннал
 жяматрал пахру бан лайкъсса арсру. Утти тІурча бакъассар Ккуц. ДукІу
 махъа-махъма инсангу лавгунни, ва шяравалу къадиртун... ДакІнин ба-
 гъуна ттун га кІирисса гъинтнил кьини Гъухьаллалмур тарихгу. Вингу
 кІулссар мув тарих, шаэр. Ванияр мукьттуршра шинал хьхьичІ Гъа-
 зи-Гъумучиял шамххалахьал, цайнна мютІи къахъанай тІий, Гъухьаллал
 цар, жяматгу дардагъил бувну, чарий чару къабивтун, ппив-ххив дурну
 дур. Ххассал хьун бювхьумий тІурча, кув Хайдакьлив, кув Къадарлив
 ливхьун, гикку миналул хьуну бур. Гъурват ккавксса жулва буттахъан,
 шаэр, кІулу бивкІссар цирив мув. Гъурватрай ялгъузну ливчІсса Гъухь-
 аллал инсантуралгу гъан бувну бур Гъумучиял шамххалачІан чагъар,
 тти мютІину бикІанну вийн, так ихтияр дула жухьхьун, жул хьунма,
 ляхъу миналийн зана хьун, тІий. Щамххалагу рязи хьуну ур. Амма га-
 нал гай инсантал, хьхьичІара цалла шяравалу диркІсса кІанттай мина
 дишин къабивтун, Гъумучиял чІарав цІусса шяравалу дан бувну бур. Га-
 ния шийнмай хІакьинусса кьининингу Гъумучиял ва Гъухьаллал шяра-
 валлил дазуну ца ххарххулул утташиврийсса кІичІиравалу бур. Мукьт-
 туршраксса мукьттуршра шин ларгун дур тания шийннай. Тания шийн-
 най дунияллий хьусса дахханашивурттал хІисав-сан дулларча, инсаннал
 бакІ къагъ хьунгума бюхъай. Амма аьжаившиву дансса иш цамур бур...
 Цуксса ххаллилсса Гъумучи бивкІхьурчагу, ци Бабул-Баб, ци Гъази-Гъ-
 умучи куну, аьрабнал га бюхттул барчагу, Гъухьаллал ттигу-шилагу
 цивппа Гъумучатуссару къачайча, Гъухьалияссару чай. ЧачІав увкІсса
 хьамаличувнал тІурча, ва иш къабувчІуну, ваний махІатталшиву дай.
 «Вин баврив, шаэр? ЧІувсса зат ттуршрахьул шиннардийгу хьамакъа-
 битайссар». Хьамакъабивтун бур Гъухьаллал жяматрангу, ци-циксса
 дяьвирду гания шийнмай цанма ккаккарчагу, ци-циксса ккаши-мякъ
 цалва букарчагу, ци-циксса бухІан къашайсса баларду цалва бакІрачІан
 бучІарчагу, хьамакъабивтун бур кІиямаксса Гъухьаллал жяматран, вяъза
 буккинни куну, хьяврин бувну, мизитравун бавкьуну, цалва бур кусса
 чиваркІгу ливтІуну, цалла цар пуч дурсса шамххалахъайнсса лухІисса
 зид. Хьамакъаивтун ур Гъухьаллангу, щалва Дагъусттаннангу, шамхха-
 лахъая Гурда-къала буручлай, виричувну ивкІусса Къайдаргу. «Къясукс-
 са нава унугу, ттувува ссихІ буссаксса, къала цІакьну ябав», – куссар
 тІар махъва-махъ душмантурахъ Къайдардул. ДакІ мяш хьунну ябувну
 бур Гъухьаллал жяматралгу ванияр мукьттуршра шинал хьхьичІ цайнма

Къайдардул аманат бувсса яхИрал ва инсапрал къала. МахIатталшиву дансса за бакъаривкъай, ттуршрахъул шиннардил мутгалий Гъухъаллал цалва мазрал лугъатгума даххана дурну дакъар...

Утти тIурча жува, шаэр, къадиртун жулла шархъурдугу, бизлай буру шагърурдайнмай. Бизлай буру шагърурдайнмай, жулва яруннал хъхъичI жулла шархъурдугу эяллай дацIан дуллай. Агъ, шаэр, цучIав инсанту-рахъ шархъая шагърурдайнмай бизан къааьркинссар тIий акъахъунссар, я щилчIав, маизара куну, къаизангу най цучIав акъахъунссар. Аьй дакъар, бухъунссар най захIматния бигъанийнмай. Амма «дача» хIисаврайрагу дикIанхъувив, жунна аьркин къахъурча, жунна дучIи къалякъирча, жулва оьрчIаннагу аьркин хъунхъувив, жулва оьрчIал оьрчIаннагу дучIи лякъинхъувив куну, магъуйх мах, ягу «ккаччил багълийсса» шифер даркъуну, къаританссарагу духIин къахъанай, лякъри цIий ниттихъал жува бувсса жулва буттал къатригу ххячарачIелмултран ва исултран къадиртун, най буру...

*Хъхъири бия цIуницIу тIий,
Хъхъири бия цIуницIу тIий...
Хъунмасса хIаллай къурчIину
Хъхъири бия цIуницIу тIий.*

*Баргъ буккайва хъхъиривату,
Барз буккайва хъхъиривату...
Хъхъиримур цIуницIу тIий бия,
Хъхъиримур цIуницIу тIий бия...*

*Мусил гъаннамий къуннаву,
ХъхъирицIухсса бакIурдаву,
Чани хъуннин, батгу хъуну,
Бусса кIантту къалякъайва.*

*Ччя-ччя чявхъарду бичайва,
Лях-лях тIий, баргъгу битайва,
Амма мусил гъаннардумий
Лухччинува къаххяххайва...*

*Пашмансса барзгу цIуницIа
Хъхъирил дянива буккайва.
Ккураангу дурну, цIуницIа
Махъунмайва зана шайва.*

*Балай тIий бия къунну...
ЩютIа тIий бия марчгу...*

Агь, шаэр, экъи нани дувача вилва чІахІлул щютІуххува макъангу, уча инагу балай! Вихъхъун, шаэрнахъхъун, дакъарив дуллусса жулва буттал улклул цилла инсапрал тІайлашивугу, цилва яхІ ва къириятгу, вихъхъун дакъарив дуллусса жулва буттал улклул цилла ливтІумийннал ва уттавамийннал хІасратру ва ххаришивуртту, вихъхъун дакъарив дуллусса ганил цилва арсурваврал бивтсса ххуллул лахъишиву ва кІушиву, вихъхъун дакъарив дуллусса ганил цилла мусил устартурал магъиршиву ва хІарачат, вихъхъун дакъарив дуллусса жулва буттал улклул цилла макъаннал куртІшиву ва мазрал пасихІшиву?! Леххаву щийн чиви вийн бакъа, уча, шаэр, мякъну буруча, буттал улклуха цал ттигу балай! Айихъу аьвзал-заманная, уча жулла къинирдая, уча бучІантІимунягу! ЦучІав хъама-маитара, кІицІ бува циняв, кІицІ буван лайкъмий! АьтІи бува жу, ххари бува жу, уча, шаэр, цал ттигу вилва балай буттал улклуха! Вил рухІраву жулва буттал улча бухъурча, жун вил балайрдаву вил инсанлугърахсса ччавугу чІалантІиссар, щалва аьламгу чІалантІиссар. Аьламравугу буттал улча, буттал улклубугу аьлам ххал къашайсса шаэр, мув шаэр акъар. Ина вилва балай уча так буттал улклуха!

*Дучраву ххаллилмур
Ххуллурдай кІул шай.
Вирттавраву цІакъма
Дяъвилый кІул шай.*

*Дуснал тІайлашиву
Оькъини кІул шай.
Оьрмулул ххуйшиву
ИвчІайини кІул шай.*

Аьй мадара ина ттуй, шаэр, га кІирисса гъинтнил къини, вищалва гъ-алгъа тІий унува, на гъалак увккунни, куну. Бюхъайссарив, бюхъайссарив инсаннаща, буттал улклуя ихтилат нанийни, дакІ гъалак къадурккун ацІан? Инсаннал вев кувкун, ххяллалгума га вев зана битайхха, дунял сукку хъун нанисса бувчІуну, жанавартралгума леххаву рутайхха, гъарившиврул къума лавгун, авдалнаватугума агъи личайхха, бюхъайссарив, бюхъайссарив инсаннаща, буттал улклуясса пикри дакІнивун багъувкун, гъалак къаувккун ацІан?

Лаккучувнал дакІнин багъмур байссар тІар, ци хъхъичІун дагъарчагу, къабюхъанссия га къини ттуцагу вил буттал шяравун къаивну ацІан, шаэр.

*Дуняллийн увккун,
Чувнал тиш кувкун,
Лухччи шад хъуссар тІар,
Га тиш ххал хъуну.*

*Дунияллийн увккун,
Га хъян ивкӀукун,
Лухччи ццах куссар тӀар,
Хъяхъаву бавну.*

Ццах кусса хханссия га паракъатсса гъинтнил къинигу, на ххуллийн уккавривун. Дав-давтӀикъунттачӀан нава ийхту, баллан бивкӀунни Ттухъавх яларай, чохру-чохру хьуну, къунтгайх ришлай нанисса тяхъ-асса чӀиринеххал чӀугу. Цилла лахъисса магъгу лахӀлахӀи дурну, къунт-тая къунттайнгу лехлай, бувккунни ттул хъхъичӀун дакӀ аьчух вяркъу-гу. Цилва маз ттун къабувчӀлачӀавриягу хавар бакъа, буслан бивкӀунни ттухъ ца лахъисса шадсса хавар. Ина тийн акъарав нанисса тӀий, ВацӀил-лул чулиннай хъаругу липӀ-липӀтӀи дурну, ххуллийн увксса ттухъхьун, ссалам буллалисса кунма, обттух къанихсса иникӀукӀугума, зурзу тӀий, гъаваллаву бавцӀунни. КӀийнмайну бур цанних ца эшкъи хъусса кӀива духъажаригу, ххарину марщурдая марщурдайн лехлай, тӀуркӀу тӀий. На ххал шайхту, гай цакуну ца къунттуй щябивкӀунни, яла жагъ ххул-лийх нанисса ттух бургавай, жагъ цалва къищусса тажрубу бакӀругу ца махшилну гъанагъи дурну, ваксса ххуйсса дунияллий ванацагу цувалу ацӀан цукун бюхъайривав тӀисса кунма, махӀатталну цанних ца буруглан бивкӀунни. Агъ, аьнтӀикӀахъул, ххуйшиву зул, марцӀшиву, иминшиву зул ччаврил! Тай индейцыналгу, зулмий тажру ххуй бивзун, буллали хъ-навав лелуххантрал тӀинттая цалвамий тажру? Чариввагу къакӀулу, бивтсса ккулла кунма, гъаз хьунни ссавнийн верчӀичӀугу. Дурцунни ца тяхъасса макъан: «ВечӀе-чӀев, ваччи-чӀяв! ВечӀе-чӀев, ваччи-чӀяв!..» Цу-кун най бурвав таксса чӀивисса хханххиравату таксса лахъсса бюххансса балай?! КӀай Ваччиял ва ЧӀяйнналгу цалла шяраваллин цӀарду, вил ба-лайлул махъру тӀааьн бивзун, дирзунавав, верчӀичӀуй?

Най ура цӀанну-някӀсса ччиккул-бакӀвахӀурдал, цӀай-цӀай тӀисса хъ-ахъитӀутӀал, хъхъилул рангсса чӀирунна-тӀутӀалгу мискинну чӀюлу дурс-са КӀуннаарих тихунай. Агъ, ттул оьрчӀшиврул ар! Цимил хъухъунссара на вичӀа ттулла яттил чӀири кӀапӀаллануцал, цимил лаивкӀхъунссар на чявхълуя ва гъарая та Ччиккулкъунттулу?! ДакӀний бурив вин, ттул чӀи-риар, гай ттул оьрчӀшиврул умудру ва хияллу? Вил кӀукӀлусса кувссай щяивкӀун, бизаргу хъанай, тия Оьллаария гъаз хъусса самолётрахгу уру-глай, мяш хъанан икӀайссияхха на тай шагърулийнмай левххун нанисса инсантурай. Утти циванникъай гай яла хъин-хъинмий шагърурдайгума ва ттул дакӀ муданна-мудан так ва вих цӀунцӀу тӀун дикӀайсса, я ттул оьр-чӀшиврул ар, я ттул буттал улчай? Агъ, вагу цирив тти, ххаришивурив ягу хъювсулшивурив, гъалакну дакӀгу ришлай, иттархъенну кӀу хъуннихха, макърив вай, юхссагу гъухърив? Эгъе-гъе-гъей, ттул оьрчӀшивуй! Дургу ттух, вана на вичӀан левххун най! Левчура ттулва бусса чаралий КӀун-

наарих ялавай, вахІшину вев-гъарайгу тІий, хъхьичІ цичІаргу къачІалай, левчура. Ца лахІзалул мутталий хъура гилу ЧІахІраратІув. Агъра лякъа лавай явщул лахІ-лахІ тІисса, хъавтусса кувссайн. Ялув дур щюллину някІсса чІаенналул бугъ багъсса ссав, лагмарагу – гъапулсса, къюкІсса тІабиаът. Уххаврил рунг-рунг тІий ришлашисса ттулла къюкІлил чІуни-хагу ссалчІав чІукІа-чІитІгу баллай бакъар. ЧІири-чІири тІий уххавугу ларгун, ттул дакІ ришлашаву паракъат хъунни, – цакуну дуниялгу, аргълий нарза ласлай, авлий бувксса найрдал бизарсса гъуй-гъуйлул дур-цІунни.

Ахиргу на, ивзун, бахІав ттулва ссапар КъинцІиллаарих тихунмай. КъинцІиллаар! Ца заманнай бивкІссар тІар ва арив та чІумал Лаккуй яла машгъурсса Къукуннал ХІажимуса-хІажи-мубаракнал мадраса. Цана тІурча шикку мадрасалул аьш-бакІрагу дакъар. Ци-циксса хІазсса хаварду, ци-циксса кІирисса бястру, ци-циксса хъарду бавнававли ва КъинцІиллаарнин гай мюталимтурая? Ци-циксса аьжа-аьжаивсса хаварду ва ишру, аьвну лавгун, бат хъурвавли ялагу ва жулва дунияллий илланунгу ашкара къавхъунма?

Най ура хъахъи лаглай байбивхъусса лачІал хъуруннавах тихунай. Тана Щусса Лаккуйн дизан дурсса, някІсса щамарабакІуйсса Аьхъардал щарнил эяллугу. Пашманшиву, магъмуншиву, бизаршиву тай хъхъиня-кІсса эяллал! Ялув-Аьхъар, Лув-Аьхъар тІий сий дусса, пишакартурал шяравалуя тІар. Дакъинссар ланжар дан къабюхъайсса чІумул тай эяллу-гу аьрщаравух, дучІанссар ца заманнай шикку шяравалу диркІессия тІар тІисса чІунгу. Гъава найрдал бизарсса гъуй-гъуйлул бувцІунма бур. Дил-лай дайдирхъусса хъувату хъацІругу къарал дакъа цІир-цІир тІий, цал-ва бурулланул гюнгутІал оркестр бивщуну. Чузив ххючІагу бур цилла тІааьнсса «ппенпперитІ» рурцуну. Тинмайну угта-кЮласса марщурдай аргълий хъункІултІутІан ххявхсса ццуццул къатІрайгу щябивкІун, жалинчІелмултгу бур, цалва ххуйшиврия цанна адав хъанахъисса кунма, ца цукуннив ламусну: «ЧІев-пІпІчІив»... – тІий, балай тІий. Гъи аргъирай дур. Гъи! ТІабиаътраву яла чагъ думур, жулва зунттаву яла ххуймур чІун. ТІабиаът дурчІин бюхъаву, тІабиаътрах, душних кунна, эшкъи дан бюхъаву, жулламур рухІгу тІабиаътралмур рухІравух хІала дакъин бюхъаву – мувгу ца талихІ бур. Амма ттунна вай жулва зунттаву ляличІину так ца гъи дикІай дакІнин ларсъсса. Интнийн жучІара вихшала къадикІай. Жагъ гъили шавай, жагъ дяркъу шавай, хІатта майрал ахирданийгума марххала бавай, интнил дакІ цукунчІав цалий дацІан къаритай. Ссутгу жулва зунттаву чІяруну къюрусса, бизарсса дикІай: даркъуну ттурлугу, сив-сив тІий гъаралгу, уххансса кІантту ляхълан къабикІай. КІи тІурча жучІара, ухссавнил билаятирттай кунна, лапра лахъисса дикІай. Так ца щюлли гъинтнил дулай жулла тІабиаътран цилла яла дусса аргъ ва чагъ. Гъи жучІара лахъиссагу дикІай, буллугъссагу дикІай. Зунттаву гъи дучІайхту, чурххал хІалва цамур шай. Гъинттул, инсаннал дакІ па-

ракъат хьуну, рахІат хьуну, дуният уттарашиврийн, оърму абадшиврийн асардугу мюгІи хьуну, ца аьжаивну аькьилну цалий дацІай. Укун дакІ аькьилну цалий дацІай, Пушкиннул шеърирдал вивх увххун, гай ккалак-кийнигу. (Пушкиннун цанна ссутья тІар ххирасса, амма жулва зунтгавугу ссутьявав ганан баган дизантІисса?)

Цакуну, диллалисса лачІал хьуруннайх ва маршрутдайхгу щатІи-щатІив багъан буллай, буквкунни дюхлулсса хІукъу. Цакуну ва хІукъу-лушчал гила Аьхьарда-неххал ххурххулул чІугу гъаз хьунни шийн. КИришиврул ненттабакІрайх бичин бувсса гъухъал хьюрухъгу къавкъун, чурхгу цакуну рахІат хьуну, куклу хьунни. ЧІалан бивкІунни Аьхьарда-гъарахъсса бюхттулсса хІавирдал мицІругу. Къургу къуртал хьуну, ивра бюхттулсса, тик диркІсса неххал зуманийн. Абабай, шайча ца куклу, ца рахІат неххал чІунича инсаннал бакІ! Вана ВацІилул ухнилу леркъсса гъарахъалугу, гьаллулул зуманицІух тихунмай, ссурулунгу буруглай, ттак-ттак бавцІусса мукъва хІавигу, неххайн къус бивкІсса ттюнгъасса щавшилул мурхьругу. Гана Аьхьардал Хъун-ламугу, кІийнмайну ххуллул зуманицІ – дарщу-дарккуний ххуллулсса сахъла хьун бюрна бавхІуну бувсса чІагу... Аьзизсса, пашмансса, ивчІаннин дакІния ссащачІав лиххан дан къашайсса буттал кІанттул сурат! ДакІния дуккайссарив ттун, нава чув ухьурчагу, вай чарттал ва къунттал дяний музлинну лирчІсса ва леркъсса гъарахъалугу, вай бюхттулсса, хьунив шаврил бакІру къакълай байбивхъусса хІавирдугу, та цІувцІучарил Хъунламугу?.. Цимил лавгхъунссара на ттулла ниттишчал оьрчІний ва гъарахъун ттуккуй жулва къама гъаян?! Аьхьарав гъарахъун гъан бюхъаву (жул шяраву Хъуннех дакъая) – мув жул щарнил оьрчІан щаллусса байранну шайва. Яла-яла жул щарнил оьрчІал ххаришиву, Аьхьарату бунбутІив бувну, бучІансса дикІайва. УчІантІиссия цу-унугу ца оьрчІ, гъарахъа бунбутІал кацІру бувну, увккун ганал хъхьичІунгу, буллантІиссия миннатру цама оьрчІ: «Гъувар, ккариш, була ттунгу ца-кІива бунбутІи, пІякъ учин бан! Гъувар, була!» Агарда ганал къабулурча: «АцІу, чІурукъ, ттисса къини нагу наниссарача, яларача ина ттухъ алам тІунтІисса», – учинтІиссия къаччан бивкІсса оьрчІал. Ягу бучІантІиссия оьрчІру, гъарайзу Давдиягу къюлтІну, ттукрайх бишлан, щавшилул мурхьирдая щяпри къувкъуну. ЛяличІисса ххаришиву дикІайва ттунгу ттулла ниттишчал Аьхьарда-гъарахъун гъан. На, яннардугу ххиттул дуцІин дурну, гъарахъату зана хьуну нанисса инсантурайгума мяш хъанан икІайссия. ДакІния къалагай хъхьичІива-хъхьичІ нава гъарахъун лавгсса, яла, къамагу гъавуну, шаппай нанийни, ттулла янна багъайсса куццуй ххуйну ххиттул дурцІуну къачІалай (нава гъарахъату нанишиву чІалан), ттулла янналийн, гъаравату ларсун, иникІма дичлай, ттуйра нину хъяй диркІсса. Агъ, чув дуру зу, ттул оьрчІшиврул иминсса ххаришивурттуй?

ЧІявуну дакІнин багъай ва ца ишгу. Лавгру цал ниттишчал, ттуккуй тІахІнигу дархІуну, Аьхьарда-гъарахъун. Амма жун, гъарахъалттия

кьункьулагу дирхьуну, гьарайзу къалявкъуна. «Агъ, хІакьину хамис кьинирхха, ва валттул укиву базаллунни лавгун икІан... Аьжал Бажи хьунадаркъуна, кІа барчабакъуягу инсаннан хайр бияйссияв», – куна ниттил, лап къащигу хьуну. Яла, пикри буллай дарцІуну-дарцІунугу диркІун, хьулухун дагьсса ца билгу, хьап куну ларсун, нину гьарахьалттил цІив лархьуна. «Вар, дадай, ци зуннав?» – цІувххуссия на, ниттил дуллан нанимумниягу хавар бакъа. «Ахттакьун-маркІачІаннин ванах ялугьлан къашайча шикку...» – куну, нину билланух цІияллай ккутІ дуклан диркІуна. ПІахІнигу цІияллайх гьарахьун дуртун, кІилчин ккутІгу даршуну, жу шаппай лавгру. БувкІру гьунттимур кьини гьарахьун. Дяъван ивкІунни ниттихун гьарайзу: «Зулва-зулва къатравун магъуйх нагу ухларча, хьинну къулайну бикІанссарив? Вагу ттул къаттар, ттунна лархьхьусса мискиншиву ттулгу дуссар шиву... Мукун инсантурал къатта-къуш бацингу махьал къахьунсару зу... Къагъаянна на вил къама, кІа бувкІсса ххуллийх махьунмайва наси!» – тІий, авккунни гьарайзу. Ахиргу, ниттил маз-къаз бивхьуну, гьарайзугу дакъил увну, къамагу гьавуну, ганан ххишаласса маркІачІигу дуллуну, бувкІру шаппай. Цумацанналгу хьхьичІ дацІайхьунссар цалла оьрчІнийсса, ваца, макІра кунна, дакІний лирчІсса вай укунсса суратру. Цаймийннан бюхъайссар вай суратру, я цукунчІав хІаз къадизан, я цукунчІавсса мяъна вайннуву къачІалан, амма жунна тІурча вай суратру ляличІину аьзизсагу дикІай, бусса оьрмулий жулла дакІурдивагу вай тачІав къадуккай. Шай укунгу, чурив хархавар бакъа хьусса чІирисса хІаллайсса хьунабакъавугу, щиллив жухва бурган бувсса яруннал ххуйшивугу, тарив мажлисрай кусса балайгу – бусса оьрмулий ляличІисса мяъналул видурцІусса ишарану жулла дакІний мугьру бивщуну личІай. ЧІявуну жува, ай, мюрш-къюршри куну, яругу лавкъуну, къулагьас дакъа чІявусса иширттал чІарах буккару, яла тІурча, увккун цаманал, гай жунма чІиви-къивину чІалай бивкІсса затирттал вивух увххун, гай лапва куртІсса, лапва агьамсса затру бивкІшиву жунма тастикъ бай...

ПаччахІххуллугу къабивтун, на авчура хьунин ххуллийх, ВацІилуйх лавай. Сунув на лахъайхту, бургьил зулмат хьиннува ятин хьуна. Лавай гьаз хъанакъиссаксса, ликригу кІу хъанай, къацІ къавкъун, гужсса мякъгу багъну, ялу-ялун чурххал хІал ласлан бивкІуна. Бургьил ччуччин бувсса къюкъумарттул ва гьукІуврал кьункьалгу, ляличІину аьнтну рিশлай, хьиннува мякъ бутлай бия. КІиришиврул гьавава зйй-зййтІи бувсса хханссия. Цакуну кІия, ялату, суннил урттува ца кІюласса, къутІлатІисса щютІлил чІугу хьуна. Укун цумурдив ца шатлулли тІар щютІ учайсса... Агъ, хьурдай, ца щарашуйнгу кІара ивхьуну, уччиннин дяркъусса щинал нахІала бан! Мйяжаннугу, ккашил хьуний, мякъ хьуний бакъа, жунма ччатІул ва щинал къимат кІулну къабикІай. Канища итххярхху-

муницІуннив жува хъап-шап тІий лачІлан бикІару, жулла бурчІилу думунил кьимат тІурча жучІава къабикІай. Ттуршра шинаву дирчІарчагу, жува мудангу нину диркІуну, ялгъузну личІару, бакІру кІяла хьуну махъгу, «дадай!» тІий, макІра бизлан бикІару. Нину-ватан тІун бикІару жува, ватанналул абзизшиву кІицІ дуван ччиний. «Ватан чІиримургу хьуннас-сар, вар ватан цархха дикІайсса», – куну бур ца аькьилналгума. Нину диркІуну, ялгъузну ливчІнай бювкъу щилкІуй къабайхха, циванникъай, шаэр, жулла шархъурду жулва яруннал хъхьичІ эяллай дацІлай чІалай, жулла дакІру ялгъуз хъанахъийни, увккун ца-цассагу «аькьлукар» жуй-ва аьйрду дуллан икІайсса? Щилли аькьлу: махъ лирчІсса цимурцагу къадиртун, цанна хъхьичІгу цичІар къачІалай дуна, хъхьичІунайра тІий, дуниял хъамадиртун, левчуну наниманаллив, махъ лирчІмунил кьимат-гу кІулну, гикка ласун багъаймургу ларсун, гьарзатралгу алгуну, дакІгу дарцІуну, хъхьичІунай наниманаллив? Агарда лахъхьу цанма кІул хьумур хІакъину инсаннан хъамабитайсса бивкІссания, бюхъайссиявкъай инсан маймуннуя Зуруй щяикІан бюхъайсса даражалийн лахъан? Лавгмур цанссар тІий жува бухъурча, циванникъай туну жува, инсан Зуруйн лехлай унагу, ва цанасса заманнай жулва буттал буттахъал ляхъан бувсса магърал ва балайрдал ттигу-шилагу махІатталгу буллай, хІайран буллалисса? ЧІявуну жува, ай, ва заманалул яла агъаммур масъаларкъай тІий, ци-бунугу ца масъалалухун кьочару, так яла, махъ, масъалартту агъаммий цаймийгу льявкъуну, кІиссурайн къацІа тІий личІару. Ца кьини ттун кІул хьуна, нара дарс дишайсса ацІилчинмур классрал оьрчІан – цаннанмагу – инсан Зуруйн цимийлку шинал левхссарив къакІулшиву. ОьрчІал ттухъва, та левхссар куну цІувххукун, ттуцавагума цакуну бусан къавхьуна... Ва тарих дакІний къаличІаврий на я оьрчІай, я ттуйра личІину аьйгу къадурссия... Так хьинну дакІний бур, га кьини на чувъяв бувккуссия, жулла дунияллий секундрая секундрайн ца-ца инсан ккашил ивчІайссар, тІий. Минутрая минутрайгума акъа, ссятрая ссятрай-нгума акъа, секундрая секундрайн ца-ца инсан ккашил ивчІайссар! МахІаттал шара на жулва инсантурал космос мютІи буллай дуллалисса виричувшивурттай, хІайран шара ттизаманнул инсаннал бюхттулсса къудратрай. Амма пашман хьунсса зат бакъаривкъай: жучІара ва каши, ва къудрат, тийх, цаймий билаятирттай, ттигу ккаши. Азардахъул шин-нардий махІаттал хъанайна акъарив инсан цимийгу, цува кунасса инсан-нал жаннугу пана дурну, дацІан дурсса Мисриллал агърамирттайгу? 1 Амма, миллионну инсантурал ккашил литІлатІи бувну, жуламур инсан-лугъу Зуруйн леххайсса кашилийн дируннихха, заннахуча, ци учинавав ца азарда шинавун жунма кІанттай яхъанантІисса инсантурал ва иши-райн? Жулва оьрчІал жура дурмунийн ци учинавав тІисса пикри дакІ-ниву къабувгъуну, лайкъссаривкъай инсаннан оьрму бутлан, шаэр? Вай

укун ччанавккусса пикрирдугу балглай най, ттунмавагу хавар бакъанма на ВацІилу бивгун бия.

Ахиргу га кІирисса гъинтнил кѳини лагабургѳишал на вил буттал шяравун ивунав, шаэр. ЧЯву-чІявусса шугълурду, пикрирду ва асарду аьлтту хьуна га кѳини ттуву, вил буттал шяраваллил хьхьичІгу авцІуну, шаэр. Гай шугълурдая, пикрирдая ва асардая тти на къабусланна. Га кѳини ттун ххал хьуна ца сурат, га суратрив ттул дакІния, нава ивчІаннин, къадукканссар.

Ттун ххал хьуна хьуннасса шяравалу, сайки, шалла жяматрал къадиртесса. Ххал хьуна магъив дакъасса ххаллилсса цІувцІу-чарил тавхантту. Ххал хьуна мечІакъатІавун бахьлавгсса исвагъисса бюрнарду. Ххал хьуна, къатригу леркъуну, музлинну ливчІсса тамашалунма магъирну бувсса авкъатсса дарвазартту. Ххал хьуна, нузругу дакъа, а-абавхьсса, бачІвасса ппаллу. Циваннив, ва суратрахгу уруглай, ттун ришлай дия Шекспирдул заманалул къанкъ.

1913 шинал ХьурукІуннал шяраву жагъилтурал сакин дурну диркІссар «Цубарз» тІисса кружок. Га кружокравусса жагъилтал инсантал чантІ учин бансса чаранну ляхълай бивкІссар. Гайннал агъалинан ккаккан байсса бивкІссар пьесарду. Тай шиннардий хьинну машгъурну бивкІссар Чаринхъал МухІуттиннул «ХІавиват ва ХІажияв» тІисса Шекспирдул «Ромео ва Жульетталийн» тарг тІисса драма.

Ххал хьуна ттун ца хьунмав хьусса тулагу, магъгу лячІан дурну, пашманну цучІав акъасса кІичІиртгавух буклай.

Ххал хьуна башттан хьуннар хьусса къаригу. Га цурдалу, духсса лачакравугу кІучІ хьуну, цилла къатрал хьулух щядиркІун дия. Ххал хьуна, къарил никирттай щябивкІун, къарияргу хьунмав хьусса, къарчІгу бивкІун, синс ливксса ца лухІисса аьнакІигу. Бюхъайва къарин цилла хьуннаршивруха ва заэвшивруха цилла никирттайн лавхьсса аьнакІи хІисав къавхьуну бикІангу, ягу бюхъайва, хІисав хьуну бунагу, цилла чІарав рухІ зумувсса затрал ссихІ ччай, лихъан къабувну бикІангу. Амма къариву, аьнакІи лихъан бан ка гъаз данссания цирив, къюву дуллай, угь учинссавагу хІал бакъасса хханссия.

Ххал хьуна ттун ялагу ца бюхттулсса, алвагъсса хьхьирилул мурхьгу. Ганил чІапІив мурчал хІахІлилу дахъа сукку тІий бия. Цакуну марчгу гъаз хьуна, мурхьираватугу ца гъалаксса ххурхху ливчуна:

*Вана ХьурукІул,
Утти хьурув кІул?
Вана ХьурукІул,
Утти хьурув кІул?*


– тий, ххурхху тисса хханссия га хъхъирилул мурхъ. Га шярваллил – инсаннал мазраца кIицI дуван къабюхъайсса – къюкIсса хIасрат ва пашманшивугу так га ца хъхъирилул мурхъираву лирчIсса хханссия. Цакуну ттул пикрилул къувкъунни: «Агъа-гъай, чувъявавли ттунна ва сурат ккарксса? Вана вара куццуй къариртсса шярвалугу, ва къаригу, хIатта ва хъхъирилул мурхъгума гъич хъхъичIвагу ттун чуврив ккавкссар». Ди, тIайлассар! Цумурдив ца луттирай бувккуссар на ва зат. Заннахуча тарив на ва луттирай бувккун бивкIмур утти ттулва яруннангури ххал хъанхъисса? Ци-цигу аъжаивсса ишру хъунабакъай ва жулла дуняллий!

Аъжаивсса устар дур чIун,
Оърму, ник даххана дан,
Оърму, ххуллу къакIул мурчIун
Мяйжанмур чIалачIи бан!

Я шаэр! Дуссаривкъай «оърму, ххуллу къакIул мурчIулт», чIумуйн тапшур бувну, къабитансса ихтияр шаэрнахъ? Мунийн бувагу цирив учин, ихтиярдив мув, бияларив, юхссагу баччибакъулшивури? МурчIима мурчIина итан, къюкIма къюкIна итан, къудурма къудурна итан, хIасратрайма хIасратру ккухIлайна итаннив, ахир, заманалул цилва къалам шаэрнахъхъун булайсса?



Уссурвалсса литературалува



90 шин

Бахаммад РАСУЛОВ,
Дагъусттаннал халкъуннал чичу,
Аьрасатнал лайкъ хьусса учитель

АВТОРНАЯ

Расул Мусаевич Бахаммадов – педагог, чичу, фольклорист - увссар 1932 шинал Меусишал шяраву Дахадаевский районналий Дагъусттаннал АССР-даний. 1951 шинал къуртал бувссар Сергокъалаллал педагогическое училище, 1963 шинал – тарихийсса-филологиялул факультет Дагъусттаннал университетрал. Къуллугъ буллай ивкӀссар Совет Аьралуннаву (1952–1955).

Зий айивхьуссар 1951 шинал учительну Кищиял шяраву Дахадаевский районналий. Школартгал директорну зий ивкӀссар Зильбачи (1955-1956) ва Меусиша (1963-1972) шяраваллаву, совхоз «Маякрал» парткомрал секретарьну (1982-1985), Меусишиял Сельсоветрал исполкомрал председателъну Дахадаевский районналий (1990); пенсиялийн укканнин, бутгал шяраву дарги мазрал дарс дихълай ивкӀссар. Вместе с супругой Патимат Р. Бахаммадовлул ва Патиматлул кулпатраву хьуни бувссар арулва оьрчӀ.

Ялун нанисса никиран тарбия дуллай, гайннан кӀулшиву дуллай, Расул Мусаевичлул 60 шин дурссар. Меусишиял шяраву ганал тӀивтӀуссар «Жагъилсса литератор» (2000) тӀисса школа, ганил хьунамашивугу цува дуллай ивкӀссар. Га школалул дуклаки оьрчӀал произведенияртту бишлай бивкӀссар ниттил мазрай ва оьрус мазрай газет-журналлай, 2009 шинал тӀурча «Зунзул чани» тӀисса лу итабавкъуссар.

Ганал итавкъуссар мукьва даргаллал фольклорданул лу: «Абадсса лама» (1977), «Даргаллал халкъуннал магъри» (2006), «Даргаллал халкъуннал творчестволул ссурулкуртта» (2008), «КъюкӀлил тарг. Даргаллал халкъуннал балайрду» (2009).

Дагъустаннал луттирду итабакъай издательстволий бувккунни ванал луттирду: повестъру, хаварду ва шеърирду дарги мазрай («Инсаншиврул дудин» (1981), «Жавгъар», (1982), «ЧунахIал оърчIру» (1991), «БяливIсса аьрххи» (1995), «Къадар» (2001), «Язимий» (2002), «Арс» (2005), «Ттул шиннал чIюн» (2007), «ЧIумул ссихI бигъаву» (2015), «Оьрмулул ххуллий» (2017), «Хаварду» (2017), «Ттул шярвалу – Меусиша» (2019), «На увсса къини» (2019), «Тарихрал баратал» (2020) ва м.ц.

КАТИРИ

Та Буттал кIанттул цIанийсса Хъун дяъвилул шиннардий чансса бакъа хъунссия лухIи баларду ялун къабивсса кулпатру, яъни, «Виричу куна ивкIунни». Ягу без вести пропал тIисса чагъарду къабувкIсса. Гъай-гъай, мукунсса чагъардал инсантурал дакIру ччуччин дайва, хъин дан къашайсса щаву дурну дакIурдий, кIилчинмур хавардануллив чанссавагу умуд бишинсса кIану битайва дакIний.

Ца чIумал ттул ниттийн бувкIуна чагъар: «Агар вила ласнал, Му-саев БахIаммадлул 1918 - ку шинал увсса, гъав ккаккан ччарчан, тавакьюри бучIаву», - тIисса. Га бия Белгородрал областърал военкоматрал чивчусса чагъар. На ттулла щарссанищал ва арсенал оърчIащал авчуратихун. Гъай-гъай, ттуцца хъанай бия навалу ачингу, амма ттул бия цамур ишгу: ттул кIиягу арсгу, душгу бия тийх ялапар хъанай. Му бакъассагу, гай бия ххуй-ххуйсса къуллугъирттай щябивкIун: хъунама арс- хIакинну, чIавама арс - ятти-гъаттарал хIакинну, душ тIурча - оьрус мазрал учительницану. ХIакинтуралния ччиний ччатI лякъинтIиссар, шалва буруккин бикIайва душнил, цанчирчан, га бия Аьрасатнаву оьрус мазрал дарс дихълай. Мув дарс дихълахъисса учительницан кIулну бикIан аьркинни цил багъайкун оьрус маз, цийва оьруснал оърчIру къахъяншиврул, цилва хIурмат ялавай къабагъаншиврул. Ххишалларан, га бия хъунимий классирттал учительницану.

Ттулва аьпалухъхъун лавгусса нитти-бутта дакIнийн багъсса ттун, цIана цичIар, цучIав хIисав хъанай акъая. Утти ттула буттал гъаттайн нанисса ттул хъхъичI дарцIуна ниттил симан, бутта аьрая зана хъунтIиссар тIий, умуд къукъин къаччисса. Къумасса пикрирдал га, лап ххалуйн дурккун, илтIа хъуну, къаркъуну чIалай дия. Каруннил кIиссурттайсса ттаркIру дия лап ялун лирчуну чIалай, архимайрттайн дурккуну, лажиннарал, каруннил бурчугу, жиг-жиг бавтIуну, къакъартту дагъсса хханессия чIаврдай.

Тай дяъвилул шиннардий хъунмасса ккаши бувкуна гъарца чувнал. Лякъа дуччиншиврул, лябуккулун ччатIувун, накъливун, гъавккурттавул къутIай мечI бичайва. Арантурал дайсса давурттугу, утти хъаннил дувайва: хъу гъайчин, ттихIин, цулун, ахънилсса ичIуннай

духхин, вацлувун тIама дан ттул нинугу цурда лагайва. Га бия хъаннин дяъвилия бивсса бутIа. Амма яла агъанмур савав ттул нину къаркъуну нанисса - ганил дия цамур дард, къурчIишиву- шанма-шанма бивкIулул тил ласаву: кIия ливтIусса арсурвавраясса, цагу - лас я ливтIумийннавух, я сагъмийннавух акъар тIисса.

Хъхъувай, утту бивхъусса шаний жун - уссинма ссин баяйва ниттил аь-къяналул чIу. Цал-цал жугу, бивзуну, ниттищал аьтIун бикIайссия. Ттун ххан бикIайва жулва къатлул бачIвасса, пачлил пуркIурал духIи лаган бувсса чIирттува жущалва архIал аьтIисса. Душманнан-магу чIа къачинтIиссия на гукунсса къадар.

Шагърулул зумакъирагърайсса «Уссурваврал хIатталлий» дулла-лисса мероприяятилийн жу чIал хъуну бияя. Амма военкоматрал вакилтурал увкуна хъинну бюххансса, ххуйсса махъру, га шагъру душмантурая ххассал буллай, жанну дуллумийнная, утти тIурча га аьрщарай абадлийра мина дирхъусса. Гайннал ттула буттая дурс-са цIардал, ттининийн га ттуна чув, цукун ивкIуссарив къакIулсса, дакI рахIат дуккан дуруна, аьжаивсса пахрулул, ттунгъашиврул дур-цуна ттул дакI. Га гъайкалланий дия пар-пар тIий, мусил щекъирай чирчуну, буттал цIагу, фамилиягу. БувчIлай бия, буттал обттул цинну ва аьрщарай абадлий личIантIишиву.

- Ттининийн жуйн циваян баян къабувссар, шикку бутта ивкIу-шивруя? - цIувххуссия на военкоматрал зузалтрахъ.

- Жун дахъва вай гъантрай ляркъунни къуя аьскарнал къаркъалтту. ЦавайнначIа дакъая патIронну(патIроннай дикIайссар чирчуну цIа, фамилия ва га аьскар лярхъусса мина-гъанугу). Жун хIакъинусса къбинигу къакIулли цинявннал цIарду.

Жул кIиягу арс, душ бувкIуна ттул буттал гъатгайн. Жу бучIаврил савав кIулхъусса гайннал дусталгу бувкIуна жущал. «Ва жул аьрщи, шагъру душманная ххассал буллай, жан дуллума жула буттан ккалли уллай буру,- куна гайннал. - Зул арсру, душ, куяв утти хъинну хъунмасса хIурматрай бикIантIиссар жучIа». Мукунсса мукъурттил жул дакIру ххари дурна, жу буруккинттацIа бувна. «Ттул оьрчIру шикку ссувайну ливчIун бакъар. Яла талихI бакъама - мув бухху-букку бакъама, дустал чIарав бакъамари», - пикри хъуна ттун, гайннал гукун учайхту.

Ттул буттал, педагогнал дакI ххари дурна ялагу цамур иширал: га аьрасатнаву учительницану зузисса ттул душ бия школалул завучну бивтун, мув бакъассагу, ганил ларсун дия «Шинал учитель» тIисса цIагу.

- Ттул буссар оьрмулул бугъарасса, мйяцIа - мйяцIалла шинну хъусса нину ва ппу. Зу бувкIсса бйяхту, гайннал ттухъ миннат бу-вна, зуйн хъамалу оьвча куну, - куна, душнищал зузисса ца оьрус учительницал.

- Барчаллагъ хъунмасса, чара бакъа бучланну.

- Дачирасса каруннащалния къагъанссару жува гайннаннийн хъамалу. Ци ласурчан хъинни жура гайннансса хъамалушиннаран? - маслихат ккаккав душнищал.

- Къужлун, къарин ххирассар жулла дагъустаннал чяхир. Гай зура ларсун бувкисса чяхирдания ларсуну гъанну.

Хаятрал дарваза титайхту, жул хъхъичлун бувккуна ххюра-ряхра шинавусса учительнищал душ. Левчунма бувклун, ттул арснал оърчлахъхъун дулун, ка тиртлуна:

- На - Верочкара.

Ттул арснал оърчал ссихл къадурккуна.

- Мув душнихъхъун кагу дуллуну, яхши-хаш бува, - учав на арснал оърчлахъ.

Ряхра шин хъусса арснал оърчал, ганил кагу дургъуну, хъаласса чуний даргири мазрай куна:

- Наб Бяхаммадкъади биклар*.

- Бяхамкади, - тикрал дурна Верочкал.

- Наб Бяхамкади хлебиклар, Бяхаммадкъади биклар*

- Цимийлагу тикрал дурна душнил ттул арснал оърчал ца, ялагу цилва куццуй тайлану тикрал дурна.

- Бя-хям-ма-ка-ди, ачу ттущал турклу тун,- куну, ганал кагу дургъуну, хаятравусса къунналул баклулучлан увцуна.

Та къунналул баклуи дия хъуннасса ссихъу. Цилла витянхъравусса личи-личисса рангирал жанригу ккаккан бувну, ва ссихъул яру бакъар куну, ттул арснал оърчан бувчин бувна, гай яруннан кланайсса ккутлавун жангри ликлин аьркиншиву.

Личлуну Верочкахгу ягу бивтун, Бяхаммадкъадил, лавсун ганил канива някисса жангри, ссихъул иттави ливклуна. Верочкалгу, Бяхаммакдаинах буруглайгу бивклун, гамур иттан кланай лухисса рангирал жангри ливклуна. Цалла дурсса даврий дакл даркъусса оърчуру, лахъну хъан бивклуна.

- Тти жунма аьркинссар клисригу буван,- куну, Верочка Бяхаммадкъадинаял лухи-пурщисса каруннах, хисав дурну, буруглан бивклуна.

Гагу ганил кляласса карунний тамаша буллан ивклуна. Хъягу хъяй, гай клягу хаятравух занан бивклуна, ссах луглай бивкиссарив. Душнил кюласса щяпа лавсун бувклуна, оърчал турча - солома, ссихъун клисри буван.

Жу, тайламур бусан, махатталну гайннах тамаша буллай буру. Гьарма цалва-цалва мазрай гьалгъа тий унугу, гайннал ххуйну лаласайва куннал увкумур куннал. Гайннан баччи бакъая, бюхъайва

хисавгума хъанай къабиклан цивпа личи-личийсса мазурдий куннащал кув гьалгъа тий бушиву. «Гукунсса дусшиву диркиссия,

џана хъунимийннал дянивугу, цуксса ххуйну къабикІанссия! Бюхъай-ва жулва миллатирттал дянивугу тачІав дяъвилул къувтІив къалахъ-авангу, инсаннал захІмат бивхъуну дурсса хъус-хъиншиву, къатта-къушгу га џарал ччуччин къабаванссия. џана ттунгу, ттула буттал гъаттах луглай, шихун учІан къабагъанссия», - пикри хъуна ттун.

Чансса чяхирданул байхту, жул ихтилат гужлан хъуна. Га учительница ласгу учительну зий ухъувкун, жул ихтилат дуккаврия, школалия, учительтуран булайсса хІакълия бия. Ахиргу, гайннал ниттил Клавдиял цилла дакІнил къумашивриа буслан диркІуна. Ганил урчІвагу базу бия аьрщарайн кІункІу тІий, къус бивкІсса, бавкку-шавккусса хІаллил мурхъираха лашлай.

Ганил лас ия ца каних сакъатсса. Вай каруннах, ва сакъатсса ласналасагу бувну, вай ттулва ххювагу оьрчІ хъунигу бувну, дуккингу бувну, ччаннай баџан бувсар на,- тІий, байбивхъуна Клавдиял цилвамур ихтилат, хъунмав хъусса мурхъирал къяртраха лавхъхъусса каруннал кІисригу ккаккан буллая. Дахъва ччаннай бавџуну, оь чулуха ливчусса чІумал перестройка тІисса цамур бала бакІрайн бивунни.

Мяйжаннугу, га бия ххаллилсса, усттарсса каруннил заллу: хъаннил, арантурал янна, яъни, арантурал къяпригума буруххайсса бия ганил. Мув бакъассагу, гай ливчІсса касакирттая, дух хъусса янналия бия щавщуну щявн бутайсса исвагъисса џихъри. Гай џихъри ттул щарссанийн ххуй бивзсса бувчІайхту, ганил пишкеш бувна жунгу ца џихъа. Ххуйну кІулну дия ялагу ганин ппалул ххаллугу дуван, гайннуя жуларду, катІри щачангу.

Хъаннил ихтилат къуртал хъувкун, Клавдияхъхъун нагу буллуссия суал:

- Вил лас даъвилия сакъат хъуну увкІрив? - Ганил ласнал ца канил кІисри бия рухІ дакъа зурчІай тІий.

- Да,- ххари хъуна къужа, цахрагу къулагъас дунни тІисса куна.

- Ва ххари ан ччай бухъурчан, бувара ванащалгу џІухху-бусу,- ххи бувна Клавдиял.

- Цумур фронтрай уссияв талай?

- ВоронежрачІасса, -куна ганал, цанма тІааьнсса куццуйгу щяивкІун.

- Мув фронтрал командир генерал Голиковлул гъунардая чІявуну баяйва, - хъиннува къужа ххари хъунмур бувссия на. Ганал тунтну някІсса яру ххаришиврул пар-пар тІун бивкІуна.

- 1943 – ку шинал Брянский ва Воронежский фронтирттирттал мурахас бувна душманная Воронеж, Белгород ва Харьков шагъруду, яъни, га чІумал 200-300 километралул манзиланийсса ххулли тІивтІуна жулва аьралуннан. Гъай-гъай, мув чІумал жулва аьралуннаща бювхъуна душман ххит уккан ан. Брянский фронтрал командирнугу ия Рейтер. Гаксса захІматну ларсъсса ххувшаву утти

ккалли- сан къадуллайсса хавар ттунма баяйхту, ттул дакІ ѳьтун руцай,- къужлул яру мукбал бувцІуна.

На уссия ганал дакІ хьунмур буллай:

- Жулва абралуннал, цинявпагу совет хІукуматрал инсантурал га Хьун даъвилый дурсса хьуннасса чувшиву щичакІуй пуч дан къабюхъантІиссар. Мув личІантІиссар абадлий гьарца чувнал дакІниву. Инагуния ухьунссияв талай хьхьичІунмий абралуннавух?

- Тпайлассар, на снайперну уссия. - Га ивзун, цамур къатлува лавсун увкІуна ца чІивисса буттукья. Гагу тІивтІуну, гива дуккан дурна орденну, медальу. - Ургу шиккун, вайннул бусантІиссар вихь на дяъвилул чІумал дурсса чувшиврияту.

Гава буттукьярава ганал дуккан дурна кІяласса, ккутІари хьусса ппалул катІригу.

- 55 шинни на вай катІри ядуллай, - куну, ганал зурзу тІисса каруннах столланий дирхьуна катІри,- цанчирчан, га яла бявкъусса январь, февраль зурдардийгу вай катІрал ххассал дайва ттул кару дякъия. Вайнний гьарца кІиссуран цанма-цанмасса къаттагу бухьувкун, ттуща бюхъайва, вай къалирккунма, битлангу. Зу Дагъусттаннаясса бакъарув? Вайгу зул Дагъусттанная гьан дурсса катІрир.

Ганал бувсмунил ттул чурххавун бявкъусса зурзу буллауна. На, анаварну катІри ларсуну, уруглан ивкІра.

- Ургу шикку дурсса чичрулух, - куну, ганал ттун ккаккан дурна катІрал ялувмур чулий ятІулсса ххалуи шарщусса хІарпру.

Д-н

М – ша

З-наб

Га чичру ттунна ккаккайхту, на хІаллания лавгун ивкІун ия. Циняв, нигьа бувсуну, ттул лагма лавгун:

- Вин хьумурвагу цирив? – тІун бивкІун бия.

Жаваб дулунсса хІал ттуву бакъая. Дяркъусса щинал стакан буллауна.

- Вай ттул ниттил шарщусса катІри дур,- дахьвасса чІуний ливчуна ттува. ЧІалай дурив ва чичру? «Д-н» - Дагъусттан: «М – ша» - вагу хьанай дур жул шярваллил ца - Меусиша; «З – наб» - Зайнаб, - ттул ниттил ца.

Гайннал ѳьрчІругу, ттул ѳьрчІругу куннаща куннал ласлай, хьинну тамашалий бия гай катІрай.

-Та чІумал, мукьцІаллий шанку щинал на ивкІра дахьра мййра шинавусса, кІилчинмур классраву дуклакисса ѳьрчІ. Вайнна вай хІарпру, чагъарданул чІапІуй чирчуну, дадахьхьун дуллауна мукьулчинмур классраву дуклакисса ттул ссил, ниттилгу катІрай шарщуна вай хІарпру. Вай катІригу, кахри дакъасса хьачІугу, къаркънисгу дирхьуну, ниттил гьан дурна абрайн посылка.

- Тайлассар, посылкалувусса кахри дакъугу, катІригу цаймийннан дуллауна, амма вай катІри ттун дуллауна, мыйжан бувна къужлулгу на тІимур. Цимий душман ккуччу ан, ивчІан кумаг бувсса катІри духъунссар вай... Та нисирал тІин-тІааьнгу хІакъинусса къинигу дакІния къабуккай. Нисмур жу дарчІуссия атакалийн нанисса зувия аьскарнайх. Га дия жува бякъакъин, хІанттил ца-ца буллаийний, дувансса къацІучинна. «Ва ххаллилсса къацІучинна дур», - тІий, барчаллагърай бия циняв. Нину ттигу сагънура дурив?

Ганал гукунсса суал булайхту, ттун нину дакІнийн дагъуна, хъиннура ттул дакІ къума ларгуна, къакъарттуй дия, чару кунна, ца зат дарцІуну, мунияту на жавабран кІанай так бакІ галай дурссия, сагъну дакъашиву бувчІин бан. Цахъи хІаллава, ттуйна нава учІайхту, на бувсуссия ниттил хІалкъа-зиялия.

- Цурда ккашилну дунура, биривсса ччатІул касакгу жун булайва. Мув бакъассагу, аьрайн ци-дунугу гъан данмуних дикІайва. Бюхъайва, нава чІарав ивкІссания та дирчІайни, муксса къурчІишиву къадикІан ттун цІана. На шагърулийн дуклан наниний, нину дуркІуна, на тІайла уккан. Цурда дирчІансса кІулну духъунссия. Ттухъ, якъамагу дурккуну: «Багъишла рити на, ттул арс», - куну, ттуцІун ларчІуна. ТІайламур бусан, ттуща хІакъинусса къинигу бувчІин къашай, циванав нину ттухъра багъишла рити тІий диркІсса. Цурда, хъхъу-къини къакуну, ххяп-шап тІий, адаминал дан аьркинмургу цурда дуллай, цилла къадуркуну, биривсса ччатІул хъяншагу жун буллай диркІн тІийяв, ягу тІартІсса янналуву жу хъуни хъуну тІияв, ягу оьрчІний, на тІулдакъашивуртту дурний, нигъачІакІул увну тІияв? Ягу...

Гания шиннай ттун га къаккаркссар. Тай шиннардий машинартту къабикІайва, нажагъ бириярчан бакъа. Ттуингу, нину аьпалухъхъун ларгунни куну, щилчІав баян къабувна. Яла, нава зана хъуну увкІсса чІумал, лавгссия ниттил гъаттайнгу, кІяла чаругу нава бацІан бувссия, га дурсса ва диркІусса чІунгу чивчуну. Амма ниттил увкусса махъва махъсса махъру: «Багъишла рити, арс», хІакъинусса къинигу хъама къабитай. Ттигу бувчІин бюхълай акъара мий мукъурттил мяъна: цукунсса ци тахсир хъунур на ттулла нину багъишла ритан аьркинсса?.. Бюхъайссар, га гукун тІийгу диркІун дикІан ва дунияллийцири ласру, арсру дяъвилийн гъан битаврил савав, нинухъру хъусса кунна, га дяъви цалва, ниттихъал бацІан бан аьркинну бивкІсса кунма, тІийгу дикІан.

- Мда-а, захІматну ссихІ бивгъуна къужлул. Ва дунияллийцири бутгахъашагу, ниттихъашагу щаллу бан шайсса масала бакъар мув. Бюхъайссар та-дунугу мукунсса чІунгу дучІан...

ЖУЛ ЩАРНИЛ ЖЯМАТРАЛ ХЪЯРЧРУ АБШ - АБЛАМАТ

Цалва ттуккугу бувцуну, Набси лавгун ур кьурувн уртту дан . Гикку цанна ттирхусса, яъни, дурцусса уртту ххалшайхту, ганал анаварну, цучлав ялун укканнийн, ттуккуй урттул хьуннасса гьивугу дирхьуну, авчун ур махьунай.

Ганал кьатригу диркӀун дур так бивкӀсса кӀанай, ххишалларан, кьатрачӀансса ххуллугу бивкӀун бур лап утта-кӀюласса, кьумасса: ца чулуха инсантурал кьатри, вамур чулухагу - чӀаххуврал кьасса цӀияллу.

Шавайн нанисса ххуллий Набсин, кӀулсса хьунаавкьуну, ганащал яхши-хаш буллай унува, ттукку цувппа лавгун бур шаппайн. Ххуллулссаннащал яхши-хашгу бувну, шавайн зана хьусса, ттукку кьалявкьун бур шаппа, амма цалва ттуккуй бивхьусса кӀуриялу бивкӀун бур чӀаххуврал цӀияллай. «Ва ци иш-аьламатри, лажиннича, ва нава ттулва ттуккуй дирхьусса гьивурир? Чун бакьахьуссар цувппа, чапурну бивчӀиву?», - ссигу бивзун, Набси ттуккух луглан ивкӀун ур. Амма ттукку бунила бювкьусса кунма, чувчлав кьалявкьун бур. Бан-битан бухлавгсса Набси зана хьуну ур шавайн. Ургарча, чӀахху-чувнал уртту ппив дурну, цалва кьатрал хьхьичӀсса цӀияллийх, Набсил ттукку тӀурчан, гайннал хӀаятрал хьхьичӀ бавцӀуну. «Ва ци ишривав, лажиннича, Аллагьнан ссибивзссарив ттуйнма, нара чил дурцусса уртту ларсун увкӀун тӀий. Цукуннивав ттул ттукку чил хӀаятрал хьхьичӀун багьсса?», - буруккинттарай ивкӀун ур Набси.

Иширах бургарча, ттукку чил цӀияллийх цалла хӀаятравун нанисса, гьилул кӀушиврул цӀиялу леркьуну, ттукку чӀаххуврал хӀаятравун бювкьуну лавгун бур, гьиву тӀурчан цӀияллийра лирчӀун дур. ЧӀаххучувналгу, ттуккугу буккан бувну, урттул гьиву ппив дурну дур цӀияллийх, кьакьаншиврул.

ДУКЪРАССА БАРТ

Цалва оьл баххан ччисса Набси ккурчӀав цӀарду дуллан ивкӀун ур, вьйксса-тайксса накӀ дулай цал оьлил, кӀира-шанна хьатуксса барт дихьай накӀлил ялув, цирдагу дукьрара дукьрасса,- тӀий.

Ца шяраваллил махсарачинан ххуй кьабивзуну бур Набсил цалва оьлия дуллалисса цӀарду, буллалисса пахру, мунияту ганалгу, хьинну-ва лащан буллай куну бур:

- Муния гьична, жул оьлил дулай миксса накӀ, мукун кьанкьасса барт дишай гайннул ялувгу, ччан бизарчангума инсан кьаоь-кьансса.

КЪУРКЪУССА ХЪАРУ

Щарсса мудан аързирай дикІайсса диркІун дур ласнайн, ажарттул ца зат ритлай дакъар ахъуву, ппив-ххив дуллай, - тІий.

- Яр, чапар дунура, ажари цукуннив ахъувун буххайсса?

- Левххуну!

- Хъинни, на муницІухсса банна, - куну, щарссанил аързирдая бизар хъусса ласнал, бувгъуну ажаригу, къуркъуну дур ганил хъару.

Утти ажарттуща чапарданул ялтту леххан ча хъувив, аьнакІуйгу-ма щябикІан къашайсса бивкІун бур. АьнакІив ккунукру къабуллан бивкІун бур, гъай-гъай, къуртІнийнгу къабагъну бур.

КЪАЛМУКЪНАВУССА ЧІУН

ХІасантай хІухчуну зий ивкІун ур Къалмукънаву. Цимийлвагу ганал оьллу бувххуну, колхозрал хъуру дуркуну, ппив-ххив дурну лякъайсса диркІун дур. Мунияту ца къини, увкІун совхозрал хъунаманал, гъужум бувну бур ганайн:

- Агар цал ттигу вай хъуруннайн оьллу итабавкъуну лякъирчан, на ина вилва кулпатрацал вилла миналинайн махъунай гъан антІиссара!- куну.

- КІа Хъунасса Заннайн хъа буллай ура, ххишала на оьллу хъуруннал чІарахвагу буккан къабитанна, - куну, махъ буллуну бур ХІасантайлул совхозрал хъунаманахъхъун.

Гания шийнмай цимийвагу гъантта лях лавгун бур. ХІасантай ца мурхьирал ххютулу, рахІатну ччаннайх ччангу бувтуну, чай хІачІлай унува, совхозрал директорнал машина найсса ххал хъуну бур. Гассят цалла щарссанихъ:

- Дулу, лечу, на ххассал дара, ттун кумаг бара тІий, лехха-личІаву рути, - куну, леххаву куну бур. Ласнал аьмаллу кІулсса щарссагу: «На ххассал дара, кумаг бара ттун!» - тІий, лерчун дарчун дур совхозрал директорнал чулухуннай.

- На ина дирчІанна, валлагъ, къаританна, - тІий, рикІгу ларсуну, щарссанил хъирив хъуну ур ХІасантай. - Лажиннича, вин къабучІиссарив ца лахІзалийссарагу вай ризкъилух дурган, винния чІалай ия на тикку зузисса! - куну, ганал, щарссанийн къашунну, рикІ итадаркъун дур.

Тти ванал цалла щарсса дирчІавай дурхха тІий, нигъа увсъсса директор, ХІасантай паракъат хъунмур буллан ивкІун ур:

- Ярч, вяксса зарал цІанийгу щарсса дирчІанна тІун икІайссарив, паракъатхъу, буттауссу ХІасантай, - тІий.

- Валлагъ, биллагъ, на мунил мув нетІя личин къадурссаксса,

игъакъалаганссара! Ярчув, муни хъинну ххуйну кІулссархха на ххаллилсса, гъарцанначІа хІурмат лавайсса инсаннахъхъун, цувагу совхозрал хъунамахъхъун адаминал махъ буллусса! На мунил начливун увтуннахха, тай гъаттара хъуруннайн гъан бивтун.

ХІасантайлул лехха-личІаврия цалва бакІ ххассал бан ччисса совхозрал директор, анаварну цалва машиналийгу щяивкІун, лавгун ур гикка. Ганан дакІнинмагу багъну бакъар ганияр ца - кІира нюжмардул хъхъичІ цахъхъунма буллуна бивкІсса «адиминал махъ».

ТУЗИКІЛУЯССА БУСАЛА

Тузик бия ккакманан ххуй бизансса, гъарнал ххира байсса Мажар ХІажинал шагърулия лавсун увкІсса чІивисса ккаччи. Ца къини Мажар ХІажи хІаятравун увксса, Тузик левчунма бувкІун, ганал хъхъичІ бивхъуна цІусса, тІитІин бувасса ххюазарда къуруширттал пачка.

Ххарину, цилва зумуну хІав-хІавгу куну, пачкагу къацІлива личин бувну, цила залуннал каравн тІанкІ дурна. Мажар ХІажи лагмава урувгуна, амма чІалайнийх цучІав акъая.

- Ина вай арцу ча ласав? Булу ларсъсса кІанай диша вай,- куну, амру бувна ганал ккаччийн.

Ккаччи, цилва куццуй къацІул пачкагу лавсун, левчун бавчуна. Мажар ХІажигу авчуна ганил хъирив. Кучалул зуманийн ивсса чІумал, ганан ххал хъуна, инсантал бавтІуну, куннайн кув дяввай.

- Зун нач дакъарив, дахъва цІана буссия шикку ххюттуршазарда къурушрал пачка, чуврив туну ва? Зу бакъа щиллив ва шикка ласун?! Вана вассят бишара пачка шикку! - сситтуй леххаву тІий бия лагма бавтІуцириннайн пенсия бачІайсса хъамитайпа.

- Ина тти жу цуркинтран ккалли буллай бунуккара! – ганиярва лахъну сситтуй гъалгъа тІий бия пенсия ласун бувкІмийгу.

Амма, цилла магъ тия-шиягу ришлай, левчунма бувкІун гайннал хъхъичІ арцул пачка ТузикІлул бишайхту, циняв, маз хъама бивтсса кунма, учин-бусан къахъанай, ккаччих тамашалий буруглай ливчІун бур.

ОЪРВАТІАЛ КОНЦЕРТ

Ца бяруя арх акъа ялапар хъанай ивкІсса адамина бизар хъуну ивкІун ур оърватІал къяр-къюр тІисса чІурдая. « Вагу тти бакІрайсса ци баларив», - куну, ганан пикри хъуну бур оърватІив нигъа бусан бан. Ларсун ца кутук, руртун дур бяравн. Ца лахІзалийсса бакъа-къатІа хъуну бивкІун оърватІив, ялагу бувккун щинава, га адаминал руртсса кутукрайгу щябивкІун, хъиннува лахъну къяр-къюр тІун бивкІун бур.

Ванил мораль укуссар: « Цащара дан къабюхъаймур, дуллан къааркинссар».

АРМИЯЛИЯССА ГЪАЛМАХЧУВ

Ва иш хьуну бия ХІасбулат Къалмукънаву хІухчуну зий ивкІсса чІумал.

КІи дия цилла аргъирай. Бувна хъунмасса марххала. Га шинал яттин дичинсса лазунигу дия чансса. Мунияту ХІасбулатлул, марххала бунугу, кьинцІ учинсса ци-дунугу дириянссархха куну, ятту буккан бувна чулланийн.

Цана цувалу яттищал авлахърайсса ХІасбулатлун вертолетрал чІу бавуна. Лавай урувгсса, вертолет дия ганал чулиннай лагъну най. Яхши-хашлин кунма, ганал бакІрайсса къяпа ливккуну, кІутІу буллан ивкІуна. Вертолет хъиннура лагъ хъанан диркІуна. Ахиргу, га авлахърай дацІан дуруна. Гивагу бувккуна шама сахІибурхІайл дусса, ххуйну ларххусса арантал. Гайннава цаннал ХІасбулатлухъ цацІана гъан хъу тІисса ишан дуруна.

«Нара дайсса тІул», - ХІасбулат уний микІ лавчІуна. Ялагу гайнначІангу гъан хъуну, ссалам буллуна.

- Гъа, бусласу, жу бацІан буннухха ина, цукунсса ци диял дакъашивуртту дур, ци аьркинну дияв?- цІувххуна гайнналгу, ганахъхъун ссаламгу буллуну.

« Валлагъ, вай хъунисса къуллугъчитал бунуккар. Балики кумаг бан», - пикри хъуна ганан.

- Вай совхозрал яттил ттурзанни, нагу, туну, вайннул хІухчу. Къутанналий дакъар диялсса вайннун дичинсса лазуни, мунилсса байссагу цучІав акъар, мунияту ва буранналувухгу марххалттанун тартсса авлахърайн буккан бан багъунни, балики, цанна кьип учинссарагу дириян хъуви тІий. Аьрщарай кумаг банма акъахъувкун, гъаваллавух левххун нанисса зувагу кумаг банссар тІий уссия.

- Мув цумур совхоз дурив, цІа ци дурив? Вилламур фамилиягу буси,- куна, гайннал хъунаманал. ЧІарав авцІума тІурча чичлай айивхъуна. Мукун, цІухху-бусугу бувну, гай, цалла вертолетрайгу щябивкІун, лавгуна.

Гъунттимур кьини цимийвагу машина лазуннарал бувкІуна фермалийн.

- Ина ттинийн ттухъ циван къабувсѣссия, вина Обкомрал цалчинма секретарь кІулшиву? Вин га ча, цукун кІулссияв? – цІувххуна совхозрал директорнал.

- Ванияр зувира шинал хъхъичІ жу цацІу армия лавхъуссар. МахІатталсса иш бакъаривла, вертолетрай ссавнийх най унува, аьрщарайсса на увчІуну, вертолет дацІан дурна. Ттигу цичІар аьркиншинна дагъарчан, цацІана ухъхъу увкунни.

Рязий акъа ганахгу урувгун, директор лавгуна, цала машинагу ссур бувну.

ЩЯЙТІАННУЛ ХЪЯРЧРУ

Га бия кІинтил яла баявкъумур барз - декабрь. Цимийвагу гъантта хъуна, марххала буллай, хъунисса пиягъру багълай. Ккашилсса барці кунма, марчгу бия кучардавух, зунттал рахІавух, вацІлувух щютІа тІий лечлай. РухІ думур къатІурдай дуклай дакъая. Га гукунсса къуру къини ттун багъуна чІахху шяравун ачин.

Колхозрал ххаллилсса чай НякІуйгу щяивкІун, на ссур бувну най уна, ттун бакІрайн агъуна авадансса мехрал рахІувусса адамина. Ганал чу бия, буххуну бивкІссияв, аьрчча тІисса цила заллу кунма, зунчавун къутІавай, гужрай гива буккавай, тІирхха тІий най. Ганил хъхъуригу дургъуну, заллугу ия ахътта най.

«Чай бургтти икІан бюхълай унува, ва адамина ахътта циван най урвав? - пикри хъуна ттунма. - Бюхъайссар, щаву дирну, щяикІан къабюхълайгу икІан».

- Ассаламу аьлайкум! - ттулва чугу бацІан бувну, ссалам буллуссия на адаминахъхъун. Га ия оьрмулук мукъцІалла - ххюцІалла шинавусса.

- Вааьлайкум вассалам, - аьркку, бакІрая къяпагу гъаз бувну, ца лахІ-залийсса авцІуна. Ганал къяпа гъаз байхту, ссихІирал ттурлу гъаз хъуна.

- Дус, ина ахътта нанисса?

- Ш-ш-ш, - куну, ганал тІивтІу кІисса бивхъуна мурччай, гьалгъа матІра тІий, ттун бувчІин буллай.

Тайлассар, нава махІаттал хъуссия, тти ва авлахърай жулва ихтилат баянссагу цучІав акъахъувкун, ганал ттухъра, ссихІ мадуккара тІий, къадагъа дишайхту. Ганал мюрщисса, щюллисса иттавн урувгра, балики, ва авлия-ахІмакъ ухъунссархха, куну. Юх, ттулва пикрилий, га ия аькълулук увчусса адамина, цукунчІавсса шилтагъшиву ттун хІисав къархъуна.

Хъунмасса манзил битарду жу, куннахъ куннал ссихІ къадуклай. Ялагу, ссагур дух ларгухъунссия, ганал, ттухгу урувгун, цІувххуна:

- Ина колхозрай ревизия бан нанисса ревизорвагу акъарав? - куну.

- Юх, на ревизор акъара, на учительну зий ура.

- Колхозрал фермарду дур, цилла чІумал ремонт къадурну, оьллу бякъил литІлай. Районналул хъунимийнначІан гъанна тІий уссия аьрзираи, амма ца захІатсса иширахун агъну, гъан къавхъунни.

- Да, мьяйжанныгу ина захІатсса иширахун агъну ухъунссара, мунияту чай бургтти икІангума къабюхълай бунуккар вища.

- Пу-у, ахъувун бувхсса мютІи бакъа къяца кунма, ва мазгума цІана мютІий хъанай бакъар ттуин.

- Ина хІухчунувагу зий акъарав?

- Юх, гьалмахчув, оьллан аьрччасса хІухчу къаххирассар. На къутанналул къаралчира. Ва ишир.., ялагу цалва мазрая цалва къацІ куна ганал.

- Мув вилва «ишгу» цуппа битича, бусан, хъама битан къабучИс-са, ачу, ва ттулмур чай шьякІу, на кумаг баннача, - учава на ганахъ, чал хъхъуригу дургъуну, зунчавун бахълавгсса авлахърайх, пащагу тІий, нанисса ганай язухъ бувну.

- ХІакьину ва ттул чайн цукунчІав цаманал ссихІвагу шун къаб-учИссар, цаманахъхъун хъхъури ча дулуви. Мунин бувну, гьалмахчув, насу вилва ххуллийх, нагу цукун-унугу вил хъирив лаяннача.

Гьунттимур кьини шавайн зана хъусса, на махІаттал увна лахъхъусса ххуллулсса, чугу ххяххан бувну, жулла шяравун увкІун ххалхъувкун. Лахъхъу ссихІ дуккан къабучИсса инсан, хІакьину ия тяхъа-тазану, мурччив мурччайн къадиллай.

- ХІакьину, ттул дус, ттулва оьрмулугу яла ххаллилмур кьинир тІий ура!- куна ганал ххарисса чІуний, ттухъгу яхши-хаш бувну. - Вай жулва хІакинтурах на ца мурчИсса кІапІикІ къадулунтИссия. КИ-ра - шанна нюжмар хъуна ттул ниттил, азарханалий утту дирхъуну, амма хІакинтураща цичІав бан къавхъуна. Ниттил лякълуй операция бансса ихтияр дула тІий бия гай ттухъ. Гаксса хІаллай цукунчІавсса кумаг бан къавхъусса хІакинтурахъхъун, ттулла ниттия касакру банъяв на рязий хъун аьркинсса, къарязий хъура. Шардайн дурцуссия. Гьан-санчи Хазабел тІурча ца хъхъу кьининин хъин дунни. На лахъхъу ганичІатуяв нанисса. Ганил бувсуна нину къашайшаврил савав. КІа Заннайн хъарашав, лахъхъу на чай буртти къаивкІсса, ганий буссия ЩяйтІан АхІмад. Хазабел ттуй къадагъа дирхъуна, ЩяйтІан АхІмад ччяни къаччан бикІайсса буссар. Инава чай цу увцуну наниссаравгу щихъчІав бусан къабучИссар, мув бакъассагу, вил чайн щилчІав ка щунгу къабучИссар, куну. Агар, Хазабел тІимур на биттур къабувну бивкІссания, ЩяйтІан ттул чая лихъантИссия. Мунияту, дус, лахъхъу вищал ихтилат бан къавхъуна ттуща.

- Мув цу ЩяйтІан АхІмадрив? Ттунния цучІав ххал къавхъуна? - къабучІуна ттун ганал тІимур.

- Ина бакІрава уклай урав? ЩяйтІан чІалан къабикІайссархха! Хъ-хъичІава га бикІайссия Ххамислул ласну, яла га бивчІайхту, ЩяйтІан АхІмадлул бувцуссар Хазаба. Утти Хазабан ЩяйтІан АхІмадлул лахъ-хъин бувну бур гьарзат, ганища дан къашайсса сунна - савав дакъар ва дунияллий. На цІанакул ганичІату най ура, ЩяйтІан АхІмадгу биян бувну. Ганин лякълун бия жул бухкІуллул чурттулу бувччусса, ттул ниттин бувсса бахІу. Га бахІу, ттунма чІалай, ччувччунни Хазабайл. Утти мукІруну икІу увкунни вилла нину сагъну личІаншиврий. Ганил дуллулсса, арулва щаращугу ларсъсса щинавух царай хъахъисса щингу хІала дурну, кьунну жу нину дирсуссия. Гассят ниттивун хІал бувкІуна.

- Хазабал арцу чІярусса ласайсса дусса дур цила дурсса гъавав-сававрдах. Вияту циксса ларсурич?

- Ганил багъа, ттучаннайсса багъри кунма, баххана къашай. На дулав шаназарда къурушгу, ца митІра бархатІралгу, ЩяйтІаннун бакъухъ бансса ца литІра нагълилгу, ца ссахІ иникІмалулгу. Бакъухъ къабарчан цинма, ЩяйтІаннул чанкІ учин къаритара тІива Хазабайл.

- Агъ, хІурмат лавайма, ЩяйтІантру бакъанутІийрихха, мий щинчІав ххалгу къашайсса. Ина кунмасса ахІмакътурайрихха ми гъансанчитал, шарлатантал хъяхъисса!


- Ина тІутІимурвагу цирив?! Аллагънахъ цІими чІа уча! Хазабайн баярчан, Аллагъ инава буручча!

- Инава чІа уча Аллагънахъ цІими, цал ттигу инава мукун хъяврин къахъуншиврул. Утти дири укку, вил нину захІматну дур тІарча. Нину кІюрххилла аьпалухъхъун ларгунни куну учингу, ттул дакІнил къамул къабувна, хъиннура ганал дакІ ччуччин къаданна тІий.

*Дарги мазрая.
Таржума – Сиянат ХІАЖИЕВАЛ.*



Тарихрал ххуттардыва



Абдуссалам
МАГЪДИЕВ

ККУРККУЛЛАЛ ЧЧЯНИВАССА ТАРИХРАВА КИУЛМУР

(«Алжаннул ккурккай Ккурккул» тИсса луттирава)

Цалчинсса бутIа

Ккурккул. Зунттавусса цанниха ца лархъхъусса шархъавасса ца. Га заманнай шархъан дирзсса царду чIалай дакъар. КIанттул халкъуннайн цIа хIисаврай учайсса бивкIун бур цалла лагма-ялттусса тIабиаьтрал лишан, хъусса иш гъанулу бивхъуну. Масалларан, цIанасса Ккурккуллал насру ялапар хъанай бивкIун бур къасса къурнил ухнила гъаз хъусса ххяллил-сунув. Гай чIалай бивкIун бур, къурнил бартний ялапар хъанай. Ванийн бувну га заманнай гикку ялапар хъанахъимийннайн Бартнийхьи учайсса бивкIун бур («хьи» мукъул махъун лачIун байсса суффиксри, мазраву «халкъ» тИсса мяъналий бувчIлачIисса. «Бартнийхьи» – бартнийсса халкъ тИссар). Щарнийнгу – Бартнийхьи чайсса бивкIун бур.

ЧIалачIисса куццуй, шярваллил цIания шикку ялапар хъанахъисса халкъуннал цIа хъуну дакъарча, халкъуннал цIания шярваллил цIа хъуну дур.

ЧIумул тIабиаьтравунгу, халкъуннал оьрмулувунгу дайщун къашайсса дахханашивуртту дутай. Даххана шайссар царду, баххана шайссар махъру. Укун Бартнийхъияйн Бартняхьи тIун бивкIун бур. Ганияр махъ Бартняхъиял аьрщарай мина дирхъусса Къирим-татарнал ханнал арнал Гарай-ханнул, (ганал насрулул) шарнийн Питдагаул тIун бивкIун бур. (Зунттул лувсса шар тИссар тIар.) ЧIун ларгун махъ, лакку мазрацIун дакъин дурну, КIанттул халкъуннал Питтагъул тIун бивкIун бур. Ганияр махъ шарнийн Ккурккул тIун бивкIунни. Ванил мяъна дурчIлай дакъар балжину.

Гарай-ханхъал чичрулуву бур цалва мина дирхъусса уртту-шинал бувччусса, тІутІал бувгъусса къурнийн «гул-гул» тІисса цІа дизарду тІий. Чун ларгун махъ ва цІа Ккурккул тІисса цІанийн кІура дарну, щарнил цІа хъуну дикІангу бюхъай.

Оърму къурату дуркІмунил щаллу буллалисса заманнай халкъ мина дихълай бивкІун бур дугъансса хъу дусса, ризкълул уртту-щин дусса кІанттай. Укунсса кІюрххи-къунниялай чІяруну дихълахъисса вихтту-руллул дуллалисса хъатлулул къурагъшиву хъун къаритайсса, къасса лухІи аърщарал къур бур Ккулариялу. Ккурккуллал никирая никирайн бусласаврийн бувну, ва аърщарай диркІун дур 7-8 къатта бусса чІирисса щар. (Га заманнай укунсса щархъу чІярусса диркІссар).

Бюхъай вай Бартняхъияту бивзун бикІангу шиккун оърму бутлансса сантирдачІан гъанну.

Вайва тІардах вичІи дирхъуну, чІун ларгун махъ Ккуларив ялапар хъ-анахъимий Бартняхъивн кІура бавну бур, кІирагу щарнил хІала-гъурттушиву хъунна хъуну, мачча-гъанначІа бикІан. Бюхъайссар Ккуларивсса халкъ Бартнийхъиящал дахІаву дакъасса, бикІлила мина кІикку дирхъусса халкъ бикІангу. Тай чІунну диркІссар халкъ мюхчаншиврун кунначІа кув бацІлацІисса. Ккуларивмийгу бюхъайссар гъаншиву къадиркІнагу бизан БартняхъиячІан, мюхчаншиврун кІивайнналагу маслихІат бувну.

Ккуларив халкъ ялапар хъанай бивкІшиву тасттикъ буллай бур кІиккусса къатрал гъанурдал, къурух ппив хъусса чІирттал чарттал. 30-кусса шиннардил ахирданий жулла шиккусса лухччинийн лаглагиний ттунгу ккаркссия шикку щарнил лишанну. 50-60 шинал хъхъичІ кІиккун лавгмийгу бикІайва къатрал лишанну кІиккура дур тІий.

Ккурккуллал щар хъунна хъунсса, халкъ чІяву хъунсса, щарнил лажин даххана хъунсса, агъулланул багъу-бизу ххуй хъунсса ишгу хъуну бур тарихраву. XV ттуршукулий Ккурккуллал аърщарай мина дирхъуну дур Къирим-татарнал ханнал арснал Гарай-ханналгу, ганащал бивкІ-мийнналгу.

Шиккун увкІун махъ Гарай-ханналгу, ганал насрулулгу цаятурагу, Ккурккуллаягу дурсса чичрурду XX ттуршукулул 40-кусса шиннар-дийнингу диркІун дур Гарай-ханнал цалва къатлуву. Ккурккуллаву бур дяъвилул шиннардий вай чичрурду АьтІикІатлул (Гарай-ханхъал насрулул Шариплул кулпатри) чукІначунан дарххуну дур тІисса бюкъу. Вай щин дарххуну диркІссарив, щичІа дуссарив кІул хъун къахъанай буссия ккурккул. КІира шинал хъхъичІ ттун кІул хъунни гай ЧукІнатусса Улумиев МинкаиллучІа душиву. Циняв дуссарив, пели-хъели хъуну лирчІ-мур дуссарив. Ттухъ дулунна куссия, къадуллунни, Дагъусттаннай акъа тІий. Ттуллагу хъирив уккансса чІун къархъунни. Хъул личІлай акъара. Дириярча вай чичрурдал тамансса щаллу банссия Ккурккуллал тарих. Вайнналмунищал цаймий щархъалссагу.

Гарай-ханхъал чичрурду Ккурклиясса Щайхов ТажуттиннучІагу дуса дур тІий баюнни ттун 60-кусса шиннардий. Тажуттин ия угъарасса, инсаннан бансса хъинбалларах луглагисса, аьраб маз, оьрус маз кІулсса динналул инсан, шаэр. Ттун щак бакъая Тажуттиннул цацІара думур, ккаккангу дурну, дуккингу тІишиврий. Лавгра ТажуттиннучІан. Бувсунни Гъанжилийсса тарихрал институтрава архивраву дишин дула тІий бувкІун, дакъар чин ламус хъуну, чІярусса чичру гайннахъхъун дуллушиву. Дия циксса дуссияв вай чичрурду СССР-данул элмурдал академиялучІасса Дагъусттаннал тарихрал институтрал архивраву. Ттухъхъунгу, цаймийннахъхъунгу дуллай бакъая дуккин, жу га институтрал зузалт бунагу, директорнал шихъхъунчІав мадулав куну, цаяра ихтияр къаларсна. Ихтияр къадуллунни. Вай ттуцІарагу диртессия куну, ххюра дягъиву чичрурдал ларсун увкІунни Тажуттин ттуцІан ларзулусса тахлийн къатлува.

Тажуттиннул ттухъ увкуна, вай чичрурду циняв дуккин ччай унагу, къархъунни, куну. Цал щяивкІун, дуккин къашайссар. ХІакъину на вихъ ца кІулну бикІан аьркинмур буккинна, куну, чичрулух урувгун, ттухъ таржума буллан ивкІунни. «Ттул кІунттихъ буссия Къирим, Чаргас. Уссуйл, ханлугъ цахъхъунна ласун ччай, мудар жуйнба къаршину, жушала дявирдай бивкІсса оьруснал кІиниязтуращал дакъаву дурну, кІивайвагу ттушала дявилий бувккунни. Ттун лихъан багъунни.

На Ганжа, Щимаххи мютІи бав. АцІиния ххюра шиная къиблалул чулухсса Дагъусттаннай каялувшиву дав.Уссу, гайва оьруснащала архІал увкІун, шиккугу ххявххунни ттуйн. На ттулагу, ряхва цаймийгу кулпатирттащала зунттал чулинай ливхъра, уссуйн къалякъинсса, ялапар хъунсса кІанттух луглай.Лякъунни.Къатри барду, мина дишарду. Ца шиная жучІан зувиллий цава кулпат ялагу бувкІунни. Шяраваллин цІа дизарду ГъаркІас. Ларгунни І2 шин. Жу бусса кІану кІул хъуну, уссу шиккун увкІунгу, ххявххунни жул ялун. Ва ттигу нигъачІийна ия, на цувагу экъи увгун, ханнал кІантту къабугъан. Талатавриву ттул ца арс ивкІунни. Шяравалу лекъа-пІякъу дурну, ччурччунни. Бювхъумий ливхъру Аьрабустаннай. КІира шиная цІунилгу увкІра Дагъусттаннай.Ттигу авчурара архсса зунттавул, душманнан къалякъайсса, оьрму бутан сант дусса кІанттай мина дишин. Ттушала, ттуламур бакъасса, ІІ кулпат цаймийгу буссия. Лякъунни ялувсса ссав тІиртІусса, илкинсса, щинал дурччусса, урттул тавтесса, тІутІал палцІа тІисса, цамур бакъасса куццуйсса мина дишин ххуйсса кІантту. КІанттун цІагу «гул-гул» дизарду. (Татар мазрай «тІутІал дара» тІисса мяъналийн букІлай бур. Мйяжаннугу, чІярумий зунттал щархъал лухччив дур зунттул тийх-шийх, ратІнил тий-ший. Ча уругарчагу, лухччинул илкиншиву чІалай дакъар. Ккурккуллал лухччи къукълакъисса зунтту дакъар, учІан-лахъан куртІсса ратІру дакъар. Ссавнилун чачин дурсса зунттал ссиртру дур, шарнил дазайх чІиртту бувну чІалай. Шяравун ххяххабаргъгу щай, лагабаргъгу щай. Шарнил ялувсса

сравгу лахъсса, гьартасса дур...) Шикку, жу бучаннингу, 25 къатта арманинал бия... Цалва жяматравун къамул банну вайннал жуяту 10 туман арцул лавсунни. Амма мина дишин, къатта-къуш бан ихтияр дуллунни шяравату архсса (300 м тийнмайсса – М.А.) хъхьунцӀуллул кӀанттай.

Ва зат чичлай ура Мирза-баг, Гарай-ханнал арс, буттал чича куну, оьрчӀая гихунбайгу кӀулну бикӀаншиврул. 886 ш.» (Цанасса жулла шиннайн дурцуну, ва хъанай дур 1481 шин.)

Гайксса чичру дурсса Гарай-ханхъал чувчӀав шяраваллил цӀа чирчуну дакъар. Ккурккуллал къурув ливксса чӀумал шяраву 25 къатта арманинал бия тӀисса Мирза-баглул махъ чивчусса куйли бувчӀлай бур чӀявумийннан. Ккурклив, Лаккуй мина дирхъусса армани бивкӀссар тӀисса зат бакъар тарихраву. Инсантурал диц-куц, маз ччяни даххана къашай. Ккурклив арманинал аьш дусса цичӀав дакъар – вайннаха лархъхъусса лажин дусса, бакӀрал чӀара дусса я адамина акъар, я хъами дакъар, я щин-дунугу цӀа дакъар. Укунна къурувгу дакъар арманинащал дархӀусса цӀа, мазравугу цавагу махъ бакъар арманинал. Ва кутӀасса мутталий кӀанттул халкъуннал аьш-бакӀ дакъа къашайссар.

Арманинащал бавхӀусса пикри ванийн букӀлай бур. Га заманнай Кавказнаву арманинал григориянскӀай ххач-парасрал (христианство) дин диркӀун дур. ЧӀярусса шархъаву дур дахъларгсса, микку-тикку чӀалабарзру ливчӀсса хӀатталлу. КӀанттул халкъуннал вайннуйн Оьрус хӀатталу ягу Чапур хӀатталу учай. Ттуршрахъул шиннардил хъхъичӀ жулла даралуву оьрус къабивкӀссар. Шархъу дишинуксса, хӀатталу хъунуксса - бувагу. Ххач-парасрал динналушал дархӀусса хӀатталлийн Оьрус хӀатталу тӀисса, га заманнай жучӀава оьрус бивкӀссар тӀий бавну бакъарча, жулва халкъуннан ххач-парасрал халкъ оьрус бакъа къакӀулну тӀийри. Динналул аьш дургъунур халкъуннайн буклакисса. ЖучӀарасса «Оьрус хӀатталлу» дур арманинал ххач-парасрал дин диркӀсса заманнайсса жулва халкъуннал хӀатталлу.

Гарай-ханхъул Ккуркливн бувкӀсса XV ттуршукулий Лаккуй мусулманнал дин къамул къадурсса шар къадиркӀссар. Цалла чичрулуву Мирза-баг ур шяраву мизит барду тӀий. Ца чӀирисса шяраву ххач-параснал мизитрал чӀарав мусулманналссагу бан къабитайссия. Мирза-баггу акъар, шяравусса армани мусулманнайн кӀура баен бувну, барду тӀий мусулманнал мизит. Мирза-баг ур шяравалу хъунна хъанакъини ца мизит цалвагу барду тӀий. Шяраву хъхъичӀ арманинал дин диркӀшивугу кӀулну, шиккусса халкъуннайн ца учайссаривгу къакӀулну, лацан бувну (образнайну) тӀий бухъунссия Гарай-ханхъул Бартняхъияйн армани.

Бартняхъияйн армани махӀла тӀий бикӀайва XX ттуршукулул 30-сса шиннардийгу. Ва чӀумалнин лирчӀсса ялун цӀа дур ва Бартняхъияйн ларчӀсса. Ккурккуллал шаэр МахӀмудил цанма ччисса душничӀан (ЧивидушничӀан) чивчусса чагъаруннийгу бур:

*Армани махІлалий,
Магъилул хІабий,
ХІаби кунба лахІлай,
ХІайран маара.*

Гарай-хангу, ванашал бувкІмийннавугу дурккусса, дунияллул тагъар кІулсса, бакІдугъулт хъун бюхъайсса, цивппагу авадансса, цалва хъирив халкъ бачин бан кІулссагу бухъунссия. Бакъания, Мирза-баг ур, чІун ларгун, кІанттул халкъуннашал хІалашиву хъуну махъ, шяравусса динналулгу, аьдлу-къадагъалулгу бакІчитал циппа хъушиву буслай. Ялагу чичлай ур, шяраву Гарай-ханхъая бурхъничув уссаксса, щарнил бакІ дургъуну цивппа бикІан тІиссару, тІий.

Зайду чичлай ур Агълар-ханначІа Къирим-татарнал ханнал вакил хІисаврай Гарай-ханхъаясса чув ивкІссар тІий къуллугърай. Гай 60-кусса шиннардийгу Гарай-ханхъайн Аждагъахъул чайва. Цилва чІумал гуж бусса тухум бивкІун тІий учайхъунссия.

Ттуршрахъул шиннардил дяний Бартняхъиял щар хъунна хъуну дур. Сунух най Бюрунналун дурккун, гикка АннибакІул чІаврайн лархъунни. Жяматран цуксса къаччайнагу, къиблалул чулуха щар суннил ухнилусса къанивнгу дурчІун дур. Ва чулуха щарнил Гарай-ханхъал къатта вивн лавсун бур. Ахирданий шяраву 3 ссакІа хъуну бур. 40-кусса шиннардия шихунмай «ссакІа» хъамабивтун махІла учай. Ягу авл.

Авл тІисса цІа Гарай-ханхъая нанисса дур. Щарнил шаммагу ссакІлуйн гайннал «аулла» чайсса бивкІун бур. Татар мазрай ва щар тІисса махъ бур. Аулланийн Ккурккул авл тІун бивкІун бур ягу махІла.



Качар
ХІУСАЙНАЕВА



ЦА НУЗ

Лакрал шамма виттирикІлай

*Ца нузгу тІиртІуну,
Цагу ларкьуну,
Зурухгу ялугьлай,
АьтІий лякьара.*

Лакрал халкьуннал поэзиялуву, фольклорданиву ва шамма яла язимур, ягу яла дакІний личІаймур бакьахьунссар. Амма, циваннив, ляличІину бюхлай бур. ЛяличІи ттюнгьасса сурат хьхьичІ дацІлай дур. Бувагу урчІва махь. Мяъналул куртІшивруллив, асардал бюхлахишивруллив ва шаммалуца дуняяллийх машгьурсса японнал ХОККУлушчал ччалли букан бюхъанссия. Цуриив ва нузах бавцІусса жагьилсса хьамитайпа? Ссахарив, щихарив ва макь рутІлатІисса? Ссаярив ванил кьумашиву? Циваннив ванин хьхьунил лякьлувугу шану бакьасса? Кьатлуву цамагу цу-унугу урвав, юхссагу цуппалу бурвав? Ца тІиртІуну, ца ларкьуну ккаккан дуллалисса нузал кьулагьасравугу цирив ца ссихІиргу, ссигьагу бур. ХьхьичІ дацІлай дур бувцІу зурул чаннал накІ руртІусса зунттал пахь дагьсса хьхьу. Шанавух ларгсса шярваллил тІиртІу цІияллу. Щарнил лагма, кьаралланий кунма, бавцІусса зунттал цІансса хьархьаллу. НузацІух бавцІусса язугьсса хьамитайпалул чІалай-кьачІалачІисса кьаралти. Кьатлуву нахІу шанавух урвав, ванил мукьал сабавчи? ДакІниву цама уна, ккаккун кьаччисса, чунчу кусса ласривав га? Юхссагу, жагьилсса кулпатгу кьабивтун, хІалтІилул гьурбатрал циява яуцан увсса ччисса ласнахсса кьурчІисса макьрив ва рутІлатІисса? Кьатлуву зулмукарсса ласнал нинурагу дакьарвав? КьакІулли жунна ва душнил мукьал савав. Амма, зурул чаннаву нузах бавцІусса кІул бакьа душнил язугьсса макь жуннагу дюхлай дур. ДакІ цурхьхьу тІутІи дуллай дур.

Жувагу пашмансса пикридавун бичлай буру. Ттюнгъасса, илагъийсса пикридал ва асардал дакІ дуцІин дуллай дур. Жулла жулламыйгу зурул хъхурду, жулла-жулламыйгу макъру дакІнин дичлай дур.

Ца. Ва так ца чІирисса, лакрал рувхІанийсса культуралул, фольклорданул, лакрал дакІнийхсса поэзиялул ххазналувасса ттиркьюкьи дур. Азарвагу азаруннивасса ца шамма. Амма чІявуссаннан кІулссарив хІакъину вай? Шаммарду. Лакрал фольклор, поэзия. Лакрал балайчиталли тІий балай тІутІинах вичІи диширча, гайннан чІявумийннан лакрал балайрдал ххазналия хаварвагу бакъашиву тастикъ хъанан бикІай. Цавагу лакрал шаэрнал лу канил къабувгъушиву чІалан бикІай. Ца-ца чІумал, так сценалийн бувккун мукъах, цанма кІулцири лакку махъру хІала бивчусса нахІу дакъа ккурчгума дикІай балайлул, назмулун кІанай. ПасихІшиву цирив, мяънагума дакъасса, «бавкку мазрайсса». Цуппагу ттун ина ччай бура (ура), нану, нану тІисса мяъналия тийнмай арх къабувцусса. Бутултрал мажлис бялахъан бан, тяхъашиврий чурх кІутІу-кІусу бан вагу бучІихъунссар, балики. Амма...

БувчІлай бур, хІакъину балайчинал щалва хІарачат арцу лякъин бур. Аъй дансса кІанугу бакъар. Пиша. Ва буния мукъах, кулпат ябан аьркинни. Амма пишалуву усттаршиву ххи дулларча, гъунар ххи булларча, кІулшиву куртІ дулларча къахъинссарив? Репертуаргу муниха зузисса дикІан аьркинни. Гамур чулуха, яла лакку макъангу, махъругу кІулмара тІисса балайчи уккарчагу, вичІи дирхъумийннангу хІакъину так «къавтІаврил макъан» ччай дур. Публикалул тІалав бувмур биттур бан балайчитал, музыкант-талгу чялишну бур. Гъарнал репертуарданува къавтІаврил журалийсса, гъалаксса, аварасса, анаварсса макъанну чІярур. Ххишалларан музыкалул фонограммалува, балайлува цурдара къавтІаврил макъанналул биялсса, къюкІ-мурчІи уллалисса парчагу буссар. Халкъ рязий бан, бухханнин, буччиннин къавтІун бизаншиврул бухъунссар. Ттул чІаххувщарнил къачирчагу, тти заманнай «вичІи дишай» балайртту бухлавгун, циняв «къавтІавурттал» балайрдайн кІура бавну бур.

ХІукуматрал идарарттай зузимий балайчитурал репертуарданух къулагъас дансса, хъхъичІава бивкІсса худсоветру хІакъину бакъар. Так цалла, балайчинал мяърипатрал, культуралул, дуккаврил, динияллул культуралия хавар бушиврул, интеллектрал даражалул, къаралланул иш бур. Къаччан бикІлан аьркин бакъар. Цалчин, цинявнная тІий бакъара, кІилчин уттисса балайчитурал зуматусса «ттиркьюкьив» шикку кІицІ лагларча, къатІааьнну бикІанссар балайчитурангу, буккултрангу. Шиккува кІицІ лаган, ва так ца лакрачІа хъанахъисса иш бакъар, Дагъусттаннай хІакъину циняв миллатру мукумма тІий бур цалва балайчитурая. Мунийну жулла дакІру рахІат дуклай дакъар, амма...

Гъай-гъай, хъина, агарда балайчитурал итадакълакьисса дискирдал, тІутисса балайрдал чанссавагу ялувбацІу профессионалул чулуха диркІссания. ТІайлассар, ттунмагу къакІулли мув хІакъину цукунсса, ци журалул бикІан аьркинссарив. Амма хъхъичІа заманнайгу, буттахъачІагу къабивкІссархха мув. Амма таний, миллатгу, Лакку билаятгу сакисса, уттавацца чІумал, ттунма бувчІлачІиссаксса, жамятрал цалва язи


бугъайхъунссия ххуймий, цџанихмий, гъунар ххимий балайчитал. Мий-
нналмий цџарду щалвагу улклууй машгъур шайхъунссия, хъатџай, байра-
миртџай, мажлисиртџай, тяхъашивуртџай балай тџиний. Нагу мџайжанну-
гусса, хџакъсса лакрал балайчитурах вичџи дишин талихџи хъумийнна-
ясса бура. Ттул оърмулул инсантуран дакџинийссар. Лаккуй шџравусса
хъатџал, ссухџбатиртџал, гъар къурату личџи-личџийсса чџурдай тџутџисса
балайрдал караматсса чџурду хъама битџайссарив оърмулийгу! «Шџарал
мукъуртџий», каниччул хъусса мукъуртџий балай тџутџимий итталу
къабикџайва. Масалларан, жулва тџагъират Махаммадовал, Ссапижат
Хџусмановал, Мариян Дандамаевал, утџимийннава Лариса Хџажиевал,
балай тџисса чџумал ххалбара, цуксса къулагъас дурну, язи бувгъусса бу-
рив балайлул махъру. Цуксса бакъин бувну бузив макъанналухун. Цуксса
ххуйну баллай, бувчџлай, бюхлай бузив гай жунма.

Балайчи лакрал шаммардалмур ххазнагу вџих бивхъусса икџан аърки-
на. Макъанналух, чџуних, такъвалухуксса къулагъас тџутџисса мукъурт-
тихгу дайсса. Мукунсса балайчиначал сийгу, хџурмаггу лавайсса бикџайва.
Цџана культуралул идаралул инсанталгума лакку макъаннаягу, лакку на-
змурдаягу арх бувцуну бур. Ца-ца чџумал цара ца концертравугума гай-
ва гай каниччул хъусса махъру кџи-кџийннал балайрдавугу тџикрал хъа-
нан бикџай. Балай тџий уния мукъах, циваннив махъругу къалахъхъин?
Ялагу музыкалуха, цалва пиша хџисаврай, профессиональнайну зузисса
инсантуран кџулул бикџан аъркинни, агарда композиторнал, масалларан,
Мазагъиб Шариповлул цалла макъан вай мукъуртџицџун ляхъан дур-
ну духъурча, ганал га макъанналуву гай мукъуртџил чантџи учин бувсса
асардугу хџисав бувну чивчуссар. Гай личџи буллан къабучџиссар. Къ-
атџайлассар. Авторнаща, цалла ихтияр дуручлай, судрахъхъунгума бу-
лун бучџи бувну буссар. Амма лакрал балай учаврил къџяйдалул къамул
буллай бур кџа жува байбихъулийва кџицџи бувсса кунмасса халкъуннал
шаммарду, ччимур, кџанихун дакъаймур халкъуннал макъанналухун уча-
ву. Тџайлассар, халкъуннал макъанналийсса балай учин хџакъину сисин-
мий хъинну чанни. Цанчирча микку гужсса чџугу, такъвагу, усттаршиву-
гу, гъунаргу аъркинну буну тџий.

На вай махъру щин-бунугу къаччан бикџан баву мурадрай чичлай
бакъара. Хџакъину, мазгу, тарихгу, багъу-бизугу мархлуцџакул баххана
хъанахъисса чџумуву, аьчухнува учин, бухлагаврил зуманицџун бил-
лалисса (амма тџигу, талихџиннаран, биян бувасса!) чџумал, лакку ба-
лай цукун бунугу учаврихлугума барчаллагъ учин багълагъисса за-
мана бувкџун бур. Нарив вай бювхъу-къабювхъусса махъру ттуллагу
дакџи цџий дунутџий чичлай бура. Жулла культуралуву ххуй чулиннайсса
дахханашивуртту хъуну ччай бунутџий чичлай бура. Лакрал поэзиялул
ххазналуву цимийгу азарда тџиркъюкџи душиву дакџиний бичиншиврул,
га ххазна уттаранува ччишиврул дард ца чџивисса шаммалул мисалла-
ний кџаккан дан хџарачатрай чичлай бура.

Бусияра зувагу, зулвамур пџкри.

Рязиналгу, къарязиналгу.



Сулайман МУСАЕВ

ХІАВИНАХЪАЛ САЗДЛУЛ МАГЪИР ЛИТЕРАТУРАЛУЛ ПРОЗАЛИЙМИЙ АСАРДУ

Сазд Габиевлукту ихтилат буллалийни, насрулий (прозалий) чивчумий асардал чІарах увккун, ганал творчествалун багъайкунсса кымат бищун къабюхъантІиссар. «Габиевлул литературалул ирсираву насрулийсса асарду циван къабикІавив, гъаманки, гари хъанахъисса лакрал литературалу мув жанр сукку дурмавагу», – тІий ур Апанни Хъасиев. Насрулийсса цалчинсса ганал произведенияну хъанай бур оьрус мазрайсса шеъри «Безумец» («Авдал»). Магъир (художественный) литературалу мув ххуллул гъану бивзманан ккалли ай хъунасса пролетар чичу Максим Горький. ТІайлассар, ца-цавайннал бусаврийн бувну, Саздлул мув журалул асарду чичаву – мув, гъала, Михаил Лермонтовлул бувтсса шавкъирал ищри тІар. Романтик Саздлун, гъалбатта, салахІ бизлай бивкІссар Горькийл «Песня о Соколегу» – циватусса «вирттаврал авдалшиву» («безумство смелых») иминну дагъну дур «Безумец» аллегориялувун ва «В народ» повестьравун, «Песня о Буревестникегу», халкъуннал цІаний цалла къюкІ хъазамравату дурксса Данкагу ва мийннул асар бияврил хІасилну хъанай бур «Безумец» аллегория.

Ваниву къуццу тІутІима ур цІа кІицІ къадурсса герой. БакІрайра «билятрай диркІун дур цІансса, цичІар ххал къахъанахъисса хъхъу». Лагмавагу бивкІун бур «ажалланул ва оьттул бувтсса ццах», лухІисса ххяллу, аьжаивну угь тІутІи дуллай, ва, цимийлгу махъунмай бизлай, къума ратІувух буклай. «Марххалану кІяласса муххал сурувраву дирхъусса азгъунсса зунттал» бакІру диркІун дур, цІуцІаврил къарчІ диртсса кунна, лагмарагу дуруглай. Иттав щун чаннал тІиму диркІун дакъар. Амма бищай оьккисса марч, бутІай оьсса чывхъа, яла шай чанигу, битай баргъгу, дагъай шадшиву ва рахІатшивугу! Амма мув неъматсса зуманийн

биян цинявннаша къашай. Чъавумий личІай зулматравува. Тайннаисса цІимилул дасмача буклай бур талихІрайн бувкмийннавасса цаппара. Амма, лахъи къалавгун, паракъат шай ва бувччусса гай цІунилгу багъай оърмулул неъматирттахун. Апанни Хъассиевлул тІайлану тІий ур, мий, дугу-дурккуну, иш бавчусса инсанталгу хъуну, анжагъ цалвасса бакъа къабуллалисса дагъусттанлувталли, тІий. Анжагъ ца ур цІаннаву ливчІмийгу чаннайн буккан бан ччисса. Ганал хІукму бай тай ххассал бансса жами бан. «Бувччумий» бур ганайн «авдал» тІий, ганай хъай, га къякълухун ихълай. Гарив, тайгу ахттар къабувну, дуллай ур цалла даву. «Ахиргу, къуртал бувну жамигу, бивгъуну лагай «авдал» цувалу». ЩатІив аьратталну бишлай бур, жами, тІаннул цІалціи кунма, тиху-шихун бутлай бур. БикІийча лагмацири: «Авдал! Авдал!», – тІий. БикІийча. Бишлайнма бикІийча оьсса щатІив. БикІийча. Амма къянкъасса «къаст лархІусса авдал» бивгъуну най ур: «Я чани ва оърму, я цІан ва ажал!» – тІий, къянкъану тикралгу буллай.

Асардануву бувсун бакъар «авдал» цІанначІан ивсса, къаивсса. Амма цукунчІавсса щак буккучІа личІлай бакъар га ниятрайн иянтІиширийн, ялунгума ганал чувшиврул илгъан бур жувунмагу бухлай.

Произведениялул гьартасса анализ дуллуну дуссар А.Ю. Хъассиевлул.

Авданнахъал Саэдлул прозалийсса цамур произведениену хъанай бур къуртал къабувсса повесть «В народ» («Халкъуннавун»). Га бишлай бивкІссар «Заря Дагестана» («Ххяххабаргъ») кказитрал 1913-ку шиналсса мукъва номерданий, бацІангу бувссар, кказит лакъаврийн бувну. С. И. Габиев сагъсса чІумала бувксса «Очерки лакской дореволюционной литературылий» Апанни Хъассиев: «ЦІанасса ппурттуву автор цалва повесть къуртал буллай уссар», – тІий ур. Амма даву къуртал дурссарив, къадурссарив кІулну бакъар. «Ганал арсенал (Жайран-МахІаммадлул – С.М.) РАН-налул Дагъусттаннал элмийсса центрданул каних чичрурдал фондравун дуллусса Габиевлул архивраву ганил ахир дакъар», – тІий ур В. ХІ. ХІажиев.

«Петербургуллал луххал рангсса ттуруллувух, пацагу тІий, лагу-лахІлай, ца бакъа я бакъасса хъунмасса шатта кунма, най бур Николай муххал ххулийих поезд».

«Лагмарагу инт дур... Арнил ва шагърулул чІарахсса багъирдал щюллишиву дур аргъираву... ЧІалачІиссаксса, ухссавнил ттуруллал ва къяркъарал къунуцІун биян бувну бухъунссар агълу. ЦІанагума – багъирдаву лелуххантрал къарал дакъасса чІев-чІев сукку хъуну, зимизиртталгу бизар уллалисса зев-зев бачин бувну махъгума, – гъава бур ттарли хІаллил щюллишиврул къункъал янхъа тІийнма, ухссавнил ссавгу дур ттуруллал цукуннивсса пуркІурал дургъуну», – укун бур къисса байбихълай.

Оърмулул поездралгу, лагмасса тАбаиьтрал суратру ва мийннуцІун бавхІусса щугълурду лагал хъанахъаврилгу дакІнийн дутлай дур Саэдлул цалчинсса хъунмасса произведение «Лаки, их прошлое и бытрал» дайдахьу: гагури мукума кьарал дакъасса суккушиннараяту, чІуннал ва миллатиртгал лагал хъанахъаврияту буслай байбихълай бусса. Шиккугу, тикку куна, ур автор ккаккан дан ччай тАбаиьтрал загьиршиннардал дянийсса хІасил-сававртгал ара, лякъин ччай ур мийннул кьарал дакъасса лагал хъанахъавриву цалий дарцІумур бакІдайдахьу, мий кюрщант лархсса ххал, Гетел увкумур ишла буллай, бацІан бан ччай ур лахІза, га лахъи буккан бан, ганил ялун къачІалачІимур мугъали аьлтту бан, ганий цалагу тамаша бан, цаймиьгу буллали банмур бан, бюхълай бухьурча, ганийн цалвамур асаргу биян бан.

Мув иминсса суратравун бивгъуну, къувтІуну буххай «цила икІай-кунсса кавказчу» Жайран ва «жагъилсса бика» Надежда, «цузив ца штатскийнал» ва «хъун чІири» бусса мямма-кашишнал пикрилий, Аьрасатнал паракъатсса ялапаршиннаравун «вай циняв забастовкартту, вай вахІшисса оьшивуртту» духхайсса кунна. Ваца хъанахъисса ишру баххана шаву магьиршиврийну аьлтту дан ччисса кунма, произведениялул мазрал экинанавил кьарал цакуну даххана хъуну, гьулусан дуккай. Мунияту захІматри рязий хъун: «Габиев художникнаяр ххишала публицист ур», – тІутІисса А.Ю. Хъассиевлул пикрилушал. Гьалбатта, Авданахъал Саэд – яргсса пафос бусса, аьратталсса публицист ур, дакІниву аьжаивсса гуж бусса чанигу, цІугу лархъсса. Мукун бунугу, дакІ дарцІуну учин бюхълай бур, мазрал магьирмур къяйдалияту публицистмунийн кІура аяву мьйжансса оърмулувугу, мув ккаккан буллалисса къиссалувугу хъанахъисса дахханашивуртту ккаккан дансса яла цІитІ бивкІмур ххулу мув буну тІийри, мазралмур тонгу даххана дурсса, куну. Мунирвагу гужнугу учин бюхъансархха. Къисса публицист произведениялула лацан буллалисса лишаннагу анжагъ ца дур – миву хъанахъисса ишру чансса анавар буккан бувну бушиву. Амма, хъиннува аьщу-мукъуй ацІларча, мунил сававгу цамур душиву исват буллан бюхъансар – мув повесть кказитрай бишлашисса бушивруцІун дархІусса анавар уклакавур, куну.

Къиссалул геройтурал цІардугу дур цив символсса: Жайран – тархъаншиву ччишиврул ва дурккусса ушиврул символ (жайран поэзиялул сипатиймур мазраву бакъа, оърмулуву ишла шайсса махъ бакъархха), Айнул-Хаят (аьрабрай *аьйнул-хІаят* тІисса «чаннал оърму», «янил оърму» тІиссар) – нязшиврул, иминшиврул ва оърмулул кутІашиврул символ, Надежда – оърмулул яла агъаммур щаращи умуд бакъарив (хІатта Надеждадал фамилиягума, Волховская, куну, цила лас, декабрист С.Н. Волконскийл хъирив Ссибирнавун лавгсса виричувсса хъамитайпа Мария

Николаевна Волконская (муниха, генерал Н.Н. Раевский (душни (муниха лашан дурсса язи дургъуну дур)), Бюрни – инсаннал ка щун дурасса, марц (сса т)абиа (трал символ.

Къуния шанна шинавусса Жайраннул сипат ккаккан дурну дур, ч (Яру къадурну, да (дарц (уну дирхъусса ца-к (ира яргсса аьщуйну. Га ур к (ирисса жагъил, гъарцагу алвагъшиврух, узданшиврух, марц (шиврух аьшукъ хъусса. Жайран хияллал ласайсса жагъил ушиву гара ссят ч (алан бик (ай: «Ганал пашмансса шугълурдал бувгъусса яру ч (явуну хъхъич (унмай, хъхъич (унмай буругайва, поездраяр хъхъич (ун уккан ччисса куна, Кавказуллал ссиртру ва марххалттанилусса хъархъаллу ккаккан анавар уклакисса куна».

Ганал сипат ч (алач (и даншиврул жунма мукъурттих луглан къабакъай, авторнал цала дурну дур ганал сипат. «Университетрал жагъилсса студентнал хъхъич (ц (усса ххуллурду, ц (усса горизонтру дия т (ит (лай, цаннияр ца ххуйсса». Га ур цалва буттал к (анай ц (усса оьрму бачин баврил хияллай, «цалва агъулланун цашава шайсса кумаг бувну, цалла к (улшивуртту гайннаих дач (лай, элмулийн, магъирлугърайн, аьмну прогрессрайн багъаймур, лялич (ину Аьрасатнаву хъуннав, щаллагу дунияллий хъуннав хъанахъимур бувч (ин буллай». «Оьрму халкъуннан булун, аьт (унгу, ххари хъанангу, зунгу, игъалаглангу анжагъ халкъуннал ц (аний» т (исса хияллал виувц (усса жагъил ур Жайран. Амма мий биттур бан къашайсса, аьдадасса, к (ияхавайсса хияллу бакъар. Мий бур «ниттил мазрайсса литературалиясса, ххуйсса школалиясса, агъалинал маэшат авадан бавриясса» хияллу. Мукун хъун бансса ххуллу ванан ч (алай бур агъали чант (учин бавриву (просвещениелуву), дуккавриву. «Халкъуннал пикрилий ик (ан, ласласисса ссих (гу гайннан хас бан» – мув так язи-мийннащархха анжагъ шайсса. «Халкъунनावух хъун», «ттуршуннахлу, азаруннахлу зун», «хъхъич (унмай шаврин, чаннайн буккаврин дайшиш-руну дусса къаркъсса схоластикалул оьнкъарахун диян дурсса жулла бусурманнал аьламрайгу» Баргълагаваллил билаятирттай XV ттуршукулий, яьни, Ренессансрал заманнай, хъанай бивк (мур хъун баншиврул – вай бур Жайраннул хияллу.

Хияллал х (айран увсса жагъилнал ва да (к (ирисса ватанххирачувнал хъхъич («ххяххабургъил туран дур дизлай». Амма Жайран анжагъ хияллаву акъар. Буттал шяравун увк (увкун, ганал «цайнува цала бувсса школа» сакин бай, ганиву оьрч (ру х (арачат буну дуклай, цалва гъунардугума ккаккан буллан бик (ай.

Амма Жайран, Надеждал къачирчагу, т (айла ац (ан ан къабюхъайсса хиялчи ушиврущал, идеалистгу ур. Мьяйжаншинна ганан ч (алай дур, цаца ххассал хъун къашайсса, азгъунсса щат (ал гъалак хъун бувсса щинал зунтурду хъусса, аьратталсса океан кунна. Мунил гуж муксса бурхха ц (акъсса ва хъунмасса, «жува бюкъан х (адурсса балаллушал таланссавагу гъира къабитлатисса». Буч (ант (имунихлу талан аьркинссару,

«жувува левшун бивкІсса умуд чантІ учин бансса маякрачІан бияннин» тІий ур га. Оьрму бур цІана бумунил ва бучІантІимунил дянийсса къавгъа. «...Дайдихълай дуссар къизгъинсса талатаву! Жан дулун бюхъайсса талатаву!...» Жагъилтураву дикІайсса дакІ дацІаврищал тІий ур Жайран: «ЧІявусса литІунтІиссар къадарданийва чивчусса питналуву, так диювча жамилул цІалцІиврагу ниятрал къирийн. Чанссавагу мурадлайн бианссар тІисса кІулшиврул къувватгу, тазашивугу яхъунтІиссар сагъну ливчІмийннаву, инсаниятраву цавувагу лахІан бан къашайсса гуж бушиврийнсса вихшиву гъаз дуллантІиссар!»

Амма къиссалул агъамма геройгу кІихІуллану личІан най ур, «ганал дакІнил паракъатшиву... лирну дур». Цурдагума ца чулуха дакъарча кІихІуллану, цимийрагу чулуха. Надежда Волховскаяривкъай, юхссагу Аьйнул-ХІаятрив; цалва миллатрал агълу, чантІ учин буллай, зунтгаву-варивкъай ацІантІисса, юхссагу «умудрал хъару хъун дурну, талихІсса ялун бучІантІимунил цІаний талай, полициянал канихъхъун биривсса цалва дустал» ххассал банмур баннив гъантІисса; баррикадарттай «къучагъсса зузалтращал авцІусса» революциялулмур ххуллул цІанийривкъай, юхссагу цукссагу «аькълу буну къуццу бан шайсса эволюциялул мунихлулив» талантІисса – вана вай бур Жайраннул кІихІуллашиврул объектру. Мийннул къурхъругу къиссалуву дур дирчуну. Амма, га къуртал къабувнува ливчІун бухъувкун, мий ишру ссайн буккан тІий бивкІссарив, мийннул ахир цукунсса дучІантІий диркІссарив кІул хъанай дакъар.

Повестъраву сукку бувсса масъалартту гъарзасса бур. Уттинин кІицІ бувмий бакъасса, аьлтту бан ва ца чулийн бутан аьркинну бур жяматраву хъаннил бугъантІимур кІанттайн багъаймургу. «Надежда Михайловна! Бусила, лажинни, ссал бурув зу ва нааьнарай бавцІусса хъуншагърулийсса курсирдайн бучІан буллай? КІа Заннайн, ттун зун, хъаннин, ччимур букъавчІай: лажинни, зу къарязийрув нинуну, кулпатну ва ласнал кумагчину бухъурча? Ттун хъинну ххуйну кІуллихха, зуву чІявумийннун я курсирдалсса, я зу муксса бацІаву дакъа гъалгъа тІутІисса дакІнил аваданшиврулсса ва, ахиргу, чара бакъа арантуннащал архІал бацІансса гъираралсса буллай бакъашиву. Гимназиягу къуртал бувну, зуву чІявумий (на вияту гъалгъа тІий акъара, цанчирча, вин дуну тІий анжагъ 19 шин) тиху-шихунмай занай, билаятрал къирагъирттайсса шагърурдал бульвардавух, багъирдал аллеярттавух буклай бикІай. Ялугълай бикІай, буцинма укканнин. Оьнмасса ланкІу-шанкІурду буллай, шагъраисса умудругу левххун лавгун, бат хъувкун, зу анавар буккару тахшагърулийн, курсру буклан...»

Та заманнай хъаннил ихтиярдал хІакъиравусса масъала цІанасса заманнайнир аьнт бакъа къабивкІссар. (ТІайлассар, цІана жулва билаят мунийн яржа бунувагу бакъар. Масалларан, ЦачІунхъу Европанаву,

Европарламентрал хІакъиравусса законналийн бувну, мув институтрал шанма бутІул ца бутІа – мунияр чан бакъасса – хъами бикІан аъркинсар тІий бур ва мув масъалалияту циятувагу аьмну ябуцан къабай). Та заманнайгу, так ца Клара Цеткин бакъа, мув масъалалулсса буллай бакъа къабивкІшиву дакІнийн бутарчагума, гъархха. Мунияту мув цувппа гъаз бавугума къачІивир – мувгу оьрмулул хъуннасса тІалавшин хъанай диркІссар. Амма С.И. Габиев, анжагъ масъала гъаз бувну, къабитан ччай акъахъунссия. Мув мукун бухъунссар учинсса хІуччагу анжагъ ца Разият Даитбековал «Ххяххбаргъ» кказитрайнсса чагъардануву бакъа бакъассар учин къашайссар. Та чагъарданий махъ революционер МахІаммад-Мирза Хизроевлун щар хъусса Разиятлул, 19 шинавусса зунттал душнил, «Заря Дагестана» бучІаннин, цувппа цуксса ялугълай бикІайссарив ва, кказит лакълакьисса хавар бавну, цинма мув иш цуксса къурчІи бивзссарив бувсун буссар. Ча, повестърал героиня Аьйнул-ХІаятлул сипат дахъра, цукун-дунугу, дарзитурал мазрай учин, анжагъ ххал руртун тІиссаксагу, къариртун, дузал дансса мугълат къавхъуну, лирчІун дунугу ва Жайраннул лахъисса ихтилатравагу мукун чІалай бунугу, хъаннил эмансипациялул масъала ваца риторикийсса накъичран сукку бувсса за бакъассар. Мунияту: «Жяматраву хъаннил кІану ци бикІан аъркинссарив бусласисса Толстой пикрирдал асар биян бувну, Жайраннул бусласисса лахъи насихІатру ва мунихара лархъхъусса Надеждал жаваб жяматрал ва политикалул иширттал вибувцІусса ва цал-цал бястлихунгума багъсса бур», – тІисса Апанни Хъассиевлуй рязий хъанарча, жува бакъа чулийнмай ччех бикІан бюхъайссару. Габиевлул аькълу-кІулшиллул гъарташиву жунна кІуллихха, мунияту мий аьмсса мукъурттийну гъашиву ганал къаданссия. Ци хІайпнугу, произведение къуртал бувну бакъар, мунияту ихтилатгу «бухъунссар-бакъахъунссардал» даражалияту личин бан бюхълай бакъар. Амма «щалвава повесть, гъаманки, мув ххуттавухва най бур» тІисса мукъурттий рязий хъуннив захІматри, «авторнал къаст дур уттизаманнул Къапкъазуллал зунттал агьулланул оьрму ккаккан бан» тІийгу бухъувкун.

Ттул пикрилий, «халкъуннавух хъун» («идти в народ») тІисса мукъул циллара мяънагу, Саэдлун муниинин диркІсса ва та ппурттувинин хъхъичІра духларгсса народовольчество кунна, дурчІайсса къадиркІссар. КІулсса куццуй, га теориялул чулухагу ххит дурну, жяматийсса суккушин хІисаврайгу ХІХ ттуршукулул ахирданийра муксса ккал дакъа хъуну, итгала дагъну диркІссархха, мув утта дуккан дан я Авданнахъал Саэдлул, я цама щил-бунугу бакІрайн къаласунссия. Ттулва пикрилий, «халкъуннавух хъун» ганал тІий ивкІссар агъали чантІ учин баву (просвещение) тІисса мяъналий, мув тІурча Саэдлул жяматран хасъсса программалуву яла гъанумур масъалар бивкІсса. Ва масъалалул хІакъи-

раву на акълай акъара, чІявусса автортурал ишла бувсса, га «дунияллий яла тІайламур элмулучІансса» ххуллук, яъни, марксизмалук луглайнава ивкІссар тІисса пикрилуцІун. Мув теория ганан ххуйну кІулну диркІ-шиврийн щак бакъассар (Надежда Волховская: «ХІатта лахъхъугу циняв буссия, Кант, Гегел, Ницше, Толстой тІий, цІана тІурча цинявннал зумув ур Маркс, Энгельс ва социализм», – тІий бур.) Ттулва пикрилий, Маркслул ккаккан бувмур ххуллугу цанма кІулну бунува, га къанкъану най ивкІссар цаламур ххуллийх, бюхъай хІатта утопия къанкъассагума бивкІун бикІан, амма цалвалусса, цалва бутлатисса ххуллийх.

Габиевлул прозалий чивчусса цамур произведениену бур «Месть Аслан-бека» («Аслан-беклул къисас») тІисса бусала. Мув асарданияту уттинин цичІав чивчуну бивкІун бакъар. «Гъартасса буккултрал ккуран-налун бакъа, хІатта касмулул заллукъруннангу «кІул бакъа луну» хъанай дия цалчин жу итадакълакисса ва пурмалулгу, мурадиралгу яргсса «ми-ниатюра»», – тІий ур мунил хІакъираву профессор Владилен ХІажиев.

«Урттилсса, хІайран ансса, пашмансса ва аъзисса дур Къапкъазул-лал тІабиаът. Лахъисса ссинжир кунма, ЛухІи хъхъирил гъалаксса зуман-ния паракъатсса КаспийрачІан дияннин къюкъа хъуну дур марххалттал-лусса ссиртру. Мву азгъунсса къюкълудин тІайлану, ваца ганицал ччалли дукканна тІисса кунна, дур цамургу мунияр чІирисса, хъхъичІмуницал бястлийсса ссирт... Мув цІасса Дагъусттаннал зунтталмур ссиртри. Шикку ххяллавугу, дарардавугу ттурирахъул шиннардий ярагъуннил зяр, оъшиврул ва душманшиврул чІурду бухкъалагайсса бивкІссар», – укун тІий байбихълай ур бусала Саэдлул.

Цукун куртІсса ва марцІсса ччаву дикІан аъркинни аъзисса зунттах, га заманнайсса захІматшивуртгал, нигъачІишивуртгал, леча-ххичалул бувцІусса оърмулувух укун аъчухсса, бюххансса мукъурттийсса бусала чичин! *«НякІ талатисса азгъунсса ссав дахълаган дуллалисса зунттая хІайран хъусса я буцан бан къабюхълай личІай; бияла бакъа чурххавух дурххун нанисса тирхханну, кІул бан къабюхъайсса аъжаивсса асар бикІай дакІнивун бувххун най!»*

Шикку бур тамашасса бизантту, кІюласса жегъир ххуллурду, «цува хІухчу МахІаммад кунма, иминсса щютІуххул тІааънну экъи нанисса макъанналул чІу бур баллай». *«Зунттул ссиртлил лултту, шатта кун-ма, лахІлай най бур жегъир ххуллу, вахІишисса даралуву оъккисса ххурх-ху буллай дур Хъун-нех. Лагмасса ххялал чІуен дурну, ваца ххурххупта-лунун бавкъусса аслан кунна, вяъ-вяъ тІий, хъхъичІун дагъмур ппив дан хъуну дур га... Азгъунну ганицІун ларчІун, га бугъ дан къасттирай, га лув ликІинмур буллай дур къума ратІ... Ххаллишиву вил, Дагъусттан-нал тІабиаът! Ва чІумал дурчІлан дикІай дакІнийнугу, акъълудийнугу Къапкъазуллал тамашасса тІабиаътрал аъзамат¹». Цуксса хъунмасса талихІрал заллу акъар «оъруснал паччахІнал тажравусса маржсанну*

¹ аъзамат – ляличІисса ххуйшиву

хъанахъисса Къапкъазуллал» арснун лявхъума! Ххаллишиву вилвагу, вил арсурвавралгу, Къапкъаз!..»

«...Аъжаивнува бакъайхха зунттацун бусаларду, лувлякъурду. Къапкъазуллал зунттавусса гъарца ххяли, цукунсса бунугу ца бусала къюлтІ буллалисса кунна, чІалан дикІай, гъарца ратІнивату лувлякъу буккансса кунма, щаращул мув бусалисса кунма буссар. Ца мукунсса хавар бувсун бур Саэдлухъ Ибрагъин тІисса угъарасса цулуцалалгу. Ганангу га бавхъунссия, лухчинува бувккун, цІунилгу ххяллувун бувххун лагайсса щаращул лукъ-лукърацІа.»

Бусала цувппа ляличІину бахханасса бакъар. Бургъунай тІисса шяраву ялапар хъанахъанисса жагъилсса Салим ва Оьмар бур, хъинну эшкъи хъуну, авадансса, къинилул заллусса ХІажи-Гъаруннул душ Рабиях. Эшкъигу мийннал дур «КІирисса, янхъа тІисса». «Ссавнийсса цІурттигу мудан цІай-цІай тІий къабикІайхха; мудангу, дуниял уттара хъун дуллай, яргесса бургъил тІинттугу къадикІай!» Амма муданмагу ххаллилли Рабия. Ва базилух «Бургъунайллал изажал лажиннаравухгу цІансса ттурлу дакълан диркІунни. Мунил сававгу хъунни ганил марцІсса ва алвагъсса дакІниву Салимлул чулухунмайсса аъжаивсса, ттининту кІул бакъасса асар хІасул шаву. Ганал тІурча ххуйшиву! «Яла гужма зузала, къучагътуруаву яла цІанихма, га щаллусса бакІрал ия бюхттулну махъмийнна-яр». Амма ва бур цІанихсса узданнал душ, га тІурча – лагъарттуннаясса. Лагънал ненттабакІрай тІурча «аскишиврул, хІакъиршиврул, къадаршиврул мугъру бикІайссар. Га яла учІи акъама узданнангума га къюкъин ан бучІиссар, ганалгу бухІан аьркинссар». Мукун бунугу, «магъравусса ххуйшиврул заллу» бур, мий дайшишурду ккал къадан хІадурну.

Амма зунттал агълу, анжагъ ччавурду дуллай, ва, шаппасса ужагъ ябуллай, къабикІайссархха. «Дагъусттаннал зунттурду бувцІуну буссар вирттаврал, цивгу арвавсса Гуржиял дарардавух лехлахисса... Ай, буссияча къучагътал!» Гайннан «хІатта мажнунсса эшкъигума за дакъар... буттал улклухлу гавуртуращал биян багъувкун». Вана цІанагу гай бавчунни, ирглийсса ссапар бавхІуну. Ххюва барз шай ссапарданий. Ахиргу, зана хъунни. «Амма мурдалсса Иблис шанай бакъахъунссия». Лавгния зана къавхъунни Салим. Мув къурчІисса хавар лавсун увкІунни РабиячІан Оьмар. Агъссар увкунни жула къучагъсса Салим. Талатавриву га, магъравасса дэв куная, жиндрал хъусса аслан куная, амма къазахънал ккуллалул увтун, Къабра неххачІа ливчІунни, увкунни.

«Оьмардул тІутІисса цалчинмур махъ баяйхтува, кІулшилия лавгун, багъунни Рабия». Амма Салимма увтсса къазахънал ккуллалул акъаявча, га увтун ия къадарсса Оьмардул бивтсса ккуллалул. Мув бувчІунни Салимлул дус Аслан-багнан, хІукмугу бунни «я цува ивчІан, я лавмарт утан». Давлалия зана хъуну махъ, сант руртун, лавсун нувчІабихъугу, ишан лархІуссия. Амма «къадарсса къел дан га къаивтунни Аллагънал». Га мукІру шай Оьмардухъ, цува га ивчІан къасттирай ивкІшиврий ва ачу

учай, лажин лажиннарайн бувккун, цума ялтту уккайрив ккакканнуча, куну. «Чани хъя-хъя чавривун, лагай кIиягу бурттигы икьрал дурсса кIанайн... Пар учай чаннаннил ххяххабургьил мусил тIинтталу ва кIиягу виричув дучрацалва багъай щяв». Мув сурат ххал шай чIава хIухчин.

Байчарасса Рабия, хьумур бувчIуну, дардирдал аькьлулува буккай. Дардирдал ивчIай хьунав хьу ХIажи-Гьарунгу. «Ххуй душнил хIайрансса, хажалатсса балай, щатIив хьуну, лехлай бур цIанихсса Бургьунайллал шяраваллил ялтту, Дагьусттаннал ттюнгъа бувксса арсурвавраву ватанналул таний диркIсса бюхттулсса цIаниясса пахру чантI учин буллай, ваца цIусса гьунарду бан букки тIисса кунма».

Укунсса бур ва лувлякьу, ххуйсса ва личIисса накьичру дакъасса, амма яргсса, авадансса мазрал литературалул жанжа чIалачIи бувсса.

Авданнахьал Саэдлул цаймийгу бивкIун бур прозалийсса асарду. Мукунсса мийннул цану хьунтIиссия жуж «Новеллы Дагестана». ЧIявучин кIулсса аьлимчу филологиялул элмурдал доктор А. Ю. Хьассиев цIухлай ивкIун ия мув жужрал хIакьираву. 1956-ку шинал апрельланул 25-нийсса чагьарданий Саэдлул ва жаваб дуллуну дия: ««Новеллы Дагестана» 1914-ку шинал, полицинал цIухла бувсса чIумал лавсун, багьссия цензуралул комитетрал хазнардавун, тиккур мув багту хьусса. Букканхьуви та-бунугу, нагуния, оьрмулий укьакканссара тIисса кIанава ливчра (Ежовлул дуснакьравату ххассал шавриятур ихтилат)». Ци хIайпнугу, «Новеллы Дагестанамий» лякьавкъуссар.

«С.И. Габиевлул текстру ххуйну ххал бувкун, агана ганал мув касмулун ххишала чIун харж дурссания, ххуйсса беллетрист, ххуйсса чичу уккан тIий ивкIшиву чIалай бур. Мува пикрилийн цаймийгу специалистал, литературакIултал букIлай бур», – тIий ур профессор В.ХI. ХIажиев. Жува ххал бивгьусса цинявгу асардал жухьхьуннагу ихтияр дуллай дур, ганал тIутИмуницIун бакьин.



Буккултрал назмурдава

Х. ЦАХХАЕВА

НУРМАХАММАДЛУЛ АБПАЛУН

*Дурккунни лухИ ттурлу,
Бюхттул зунттал мицIавун,
ЛарчIунни чявхъа гъарал,
Маоьлий дур тIабиат.*

*Къув-аьс тIий дур дуниял,
Дагъусттан маоьлий бур,
Виричушиву дурну,
Жан дуллу вирттавря.*

*Чявхъа гъарацал архIал,
АьтIий бур лакрал миллат,
Лакрал ххаллил вирттаврал
Дуллайсса чувшиврия.*

*НурмахIаммад, виричуй,
Бюхттулсса миллатрал арс,
Жанналий рахIму бакъа,
Виричушиву дурсса.*

*Вил ниттицал, буттацал,
Маччанацал, гъаннацал,
КъурчIишиву кIидачIлай,*

Дягъуй бур лакрал миллат.

*Ссавнийн ссапар бавхIусса,
Миллатрал бюхттул барзуй,
Алжаннул ххари аннав,
Малаикну лякъиннав.*

*Вицал дяъвилий бивкIсса
Бюхттул миллатрал арсру,
Дяъвигу къуртал хъуну,
ТIовайн зана бикIаннав!*

*Лякълул оьрчIал дард ккаккан,
ЩинчIав нясив къаданнав,
Виричушиву дурмий
Мудан дакIний личIаннав!*

*Бюхттул зунттал мицIавун,
Дурксса лухИ ттурлугу,
Мурчал ларсун ларгуну,
Бургьил нур лахъан даннав!*

КЪУРБАНОВА ПатIимат

ВИРИЧУВНАХА

Н.ХIажимахIаммадовлун хас буллай бура

*Украин аьрцарай, душманнал дяний,
Вилва жагьил оьрму къукьин бувайний,
Лажинни, виричув, цан язухъ къабав,
Вилла аьзиз ниттий, гьалбарцIсса буттай?*

*Лажиннича, буси: вил чIара жалин,
ЦIуну був чIивитIу, карав бувгьуну,
КъабавцIунав вил хьхьичI, никирттайн багьну,
Аьзизма, лажинни, ссавур дува, тIий...*



ХIабибат МАГЪДИЕВА

НУРМАХIАММАДЛУХА

*Дучраву ххаллилмур
Ххуллурдай кIул шай,
Вирттавраву хьинма
Оь кьини кIул шай.*

*Ватанналийн дурксса
Оь кьини духIан,
Вричув цалчинсса
Жул НурмахIаммад!*

ДУЧIАЙХХА ЦА-ЦА ЧIУН

*ДучIайхха ца-ца чIун ва оьрмулуву,
Я аьтIун макь къанай, я хьян къахъанай,
Къумасса дакI дачIин цучIавгу акъа,
ЩийнчIав леххаву чин мажалгу бакъа.*

*ЧIарав бацIанмийгу чIарату лагай,
ДакI дачIинччимагу вия арх уцай,
Угь тIийна оьрмугу хIаллициIух лагай,
Вилла дардилдалсса инава ба тIий.*

*Дунияллун жува хьамабитару,
Лагай ва оьрмугу, рахIму къабувну.
Ссутнил силул ччурччу тIутIал ар кунна,
ХIаллих лерицун лагай жагьилишивугу.*

*Угь-къаклий ва оьрму буру гьан буллай,
Ванияр оьккисса къабучIаннав тIий.
ЦIуллу баннав жулва лякьлул оьрчIру тIий,
Ххирасса Аллагьнахь буручча жу тIий.*

ЧЧИВА ТТУН

*Ччива ттун зана бан га лавгсса оърму,
Ца чансса хАаллайсса талихІрай яхъун.
Ччива ххира буван нитти-буттагу,
Аъзизсса уссугу, ххира ссурвалгу.*

*Ччива лагма батІин кІай щарнил агълу,
Га хъхъичІва кунмасса мажлис тивтІуну.
ХъхъичІва заманнул балайрдугу тІий,
Ххира буттал аърици аъраххан дуван.*

*Агъ, чувшиву ххисса щарнил арамтал,
Виртталну лахъайва зу тай къинирду.
Агъ, аъзизсса щарнил яхІлувсса хъамий,
Бувайва зу захІмат, зуйва къааътІий.*

ОЪРМУ

*ДухІан багъай жунна ва дунияллий
Оърмулул сси-къащи, захІмат къинирду,
Дакъа ливчІсса чІунгу, къянатишивугу,
ДакІний щаву хъунсса бивцу махъругу.*

*Оърмулул щатІивгу цасса къабикІай:
Кув чІумал гъалаксса, кувний – пахъ багъсса.
Цаннила укканнин, гамур ялун най,
Бан-битан бухлавгун, кумаг чІа тІисса.*

*ХхялтІа шай гъанчувгу, лагай дусталгу,
БачІва шай дакІниву хумар хияллу.
Духлагай ду чІунгу, жагъилишивугу,
Бухлагай цинявппа хъуни махъругу.*

*Лаглай бур гъантригу, лаглай дур шинну,
Лаглай бур оърмугу, жунма къакІулна.
Лаглай буру жува кувннал хъириг кув,
Къариртун гъарзатгу ва дунияллий.*

ХЪЮВХЪУ ТИЙ ДУРХХА ГЪАРАЛ

Къума-цІанну дурхха къатІув дунял,
ЛачІлай дурхха гъарал, дацІаву дакъа:
Цув аьтІий уривав, къуману ливчІун,
БувкІсса балаллува уккан къахъанай?

Цимий ятин урвав ниттийн оьвтІисса,
ЩилчІав дур аякъа диял къахъанай?
Цимий нину дурвав кІири макъ рутІлай,
Оьсса къадарданул лякълул оьрчІ лавъсса?

Дакъарахха, бавай, ина ххал хъанай
Дакъарахха бавай, ина ххал хъанай,
Ваксса оьвтІий буна, ина ккаккан ччай.
Дакъара щинату ина най чІалай,
Щинал бувцІу урша хъарай бивхъуну.

Ина щядикІайсса лахълу дачІра дур,
Бакъар чІаххуврайсса хъуни хъамигу.
Ххари-шадсса чІунну ххялтІа дурккун дур,
Пашиманну ливчІун бур щалва махІлагу.

Узданну дикІайсса вил ххаллил хІаят
Язугъну лирчІун дур, урганма акъа.
Ина ччатІ шахъайсса хъунма кІарагу,
БачІи-къачІи левкъун, бувчІинну бакъар.

Агъ, ца ччивахха ттун га чІун зана дан,
Вил чІарав щябикІан ца чансса хІаллай.
БачІва хъусса къатта цІу лаган буван,
Цинявпта чІаххулгу цачІунмай батІин.

Буссия чІаххул хъинну ххаллилсса,
Куннал куннан мудан кумаг бувайсса,
ЦарайнначІа дурмур цинявннал канай,
Оьнийгу, хъиннийгу чІарав бачІайсса.

Дакъахъунни чІунгу, циняв чІаххулгу,
Лавгунни барачат щалла щарния,
Ларгунни нинухъру, жува къабивтун
Ва бувчІин къашайсса заманалуву.

НИНУ

АьтІутІи ттул яру мурчІи хьунцІакул,
АьтІутІи ссавнийсса лухІи турруллив,
Дакъассарча утти жул ххира нину,
На бучІаннин шаппай, тти ттух ялугълай.

Ина заназисса уздансса хІаят,
Цурдалу лирчІун дур зананма акъа,
Язугъну чІалай бур вил чІиви къатта,
ДакъанутІий ина гиву цядиркІун.

Ина дияв яхІлий жу хьуни буллай,
Дуччиннин къаканай, чурххайн къалахлай,
ЩиярчІав оьккину жу къабитан ччай,
Хьхьунияту ина къини дувайва.

Утту бишин бувну вилва оьрчІругу,
Ялагу захІмат бан ина лагайва,
Ина шанашаи чІун жуна кІул къашайва,
Дигъалагансса чІун вил къадикІайва.

Мий вилла карунних захІматгу байва,
Ина мий карунних жуна ччатІ шахъайва,
Мийра карунних жу ххирагу байва,
Цукссава гуж бия мий вил каруннай.

Ина занай диркІсса кІюла ххуллугу,
ОьрчІи-кІури тІутІал буцІин буванна,
Ина цядикІайсса хьулухалугу,
Зияратри куну, цинявннахъ чинна.

Агъ, нинуй, ччива ттун ина ххира дан,
Вил дакІнийсса дардру ттучІанна ласун,
Ина руртІу мукъал, бувсса захІматрал
Шайссарив тачІавгу жуца хІакъ лахъан?!

ш. ТІюхчар

Аксана МИХАДОВА

НУРМАХАММАДЛУН

*Ниттил бувай арсру, наслу ябуван
Буттал тарбия бай, мяърипат дулай.
Нинугу, Ватангу вил цари куну,
Мийннахлу жан дулун хІайп машара чай.*

*Шин кІула кІул бакъа бала ялун биянсса
Вил чІава оърмулий пачат бищунсса.
ЧІара гъинтнил гъарал дярххун ларгунни,
Базу-базурдува бякъин бувунни.*

*Украин аърицарай къув-аъс увкунни,
Зунттал мюрици цархъайн паранну щунни.
ЧІавасса вил оърму ччувччун лавгунни,
ЧІара гъинтнил гъарал вах чайсса кунна.*

*Агъ, чумартесса дакІнин ци асар хъунав?
Зунттал барххул яру лакъин буннихха.
Аъзиз ниттил симан хъхъичІ дарцІунавав,
Ххаллилсса буттал яхІ дакІнин багъунав?*

*Ниттил буллу ккукку хІалал бувунни,
Буттал ас-намусгу ина ябунни.
НурмахАаммад тІисса вил бюхттул цІанил
Нурданун лавхъунни щалва Дагъусттан.*





Бахтгун ГЪАЗИЕВА

Нурмахаммад
Хіажимахаммадовлун

Ина був гьунарданул
Ил махІаттал бувунни,
Жанналий хІайп кьакуну
Винма бивкІу лавсунни.

Ватанналул ххирашив
Ина мьайжан бувунни,
Аьзиз нину, ххира душ,
Мийгу хьхьичІ кьабавцІунни.

Биявкьай дакІниву зид
ОьхІалсса душмантурайн,
Нигьгу дакьа хьхьичІунай
Ххьавххунна душмантурайн.

Вав-шав тІунссар вил нину:
«Нурмахаммад, ттул арс!» – тІий.
Мукьал бьавххун нанссари
Аьзизсса ххира кулпат.

Вил цичІар хьхьичІ кьадарцІун
Винма бивкІу лавсунни,
Бюхттул зунттал чувшиву
Ина чІалачІи бунни.

Бьявкьусса марч укунма
Бюхттул зунтавух бившсса,
ЧІапІи кунма, левххунни
Вил хавар зунттал щархьайх.

НякІ микІирайн дурккунни
Ина кІулмийннал дакІру,
Щахъаннивун дагьунни
Вил аьзизсса щарссагу.

ЧичинтІиссар вил цІагу
НякІ ссавний цІурттал дяний.
Лиххан дан кьабюхъайсса
Хььюму мусил варакьрай.

3.03.2022

Индекс годовой 63334

Индекс полугодовой ПМ980



Мирза ДАВЫДОВ,
дагъусттаннал
халкъуннал шаэр

АБАДЛИССА УТТАРАШИВУ

Поэма

**...Аьрасатнал яла бюхттулмур зунттуйн
Вилва миллатрал цIа ина гьаз дунни,
ЦIурттавусса яла чаннамур цIукуй,
«Дагъусттан» тIисса махъ цIурттай
чивчунни.**

**Лак тIисса махъ тачIав къабавмийгума
«Хьурдай лаккучувну» тIутIи бувунни,
Цукунна ца ниттил арсра чинтIисса,
Щалва Аьрасатнал арс хьуну уна.**

**Вил зунттал халкъуннал виричувшиву
Тарихраву дуссар, мусий чирчуну,
КъахьунтIиссар лиххан дуван мув чичру
ЦIараца, щинаца, я бураннаца.
Га чичрулул ца хIарп тти инагура,
Миллатрал пахрулул чанна цIукура!**